

Rukaxi Niuki 'aixia manuyine kemiraka'utia

Teukiru kemitiutawairitia

¹ Yumiireti mekaniuyuwairiya memiteti'utianiki naime hepaitisita kemitiuyi kemiraye'a tatsata,

² yemeki kememitate'uxatia miki matiari paiti memunenierixi, ni'aritsixi memaki niuki 'aixia manuyine memikuxata.

³ Neta, naiti kemitiuyi matiari paiti nekatiniuti-wauni kemitiwayaki neyukweriwayurieti. 'Ayu-mieme, pemimariwe Teukiru 'aku, nepinewairiya xexuime naime nemimaraka'utiirieniki,

⁴ mipai yuriki yapemiretimaniki kemitiyuri 'iki niuki pemuta'ikitiaie.

Wani Ti'iyame kemitinuiwakekai

⁵ Merikitsi kepauka Herurexi miti'aitametikai Kureya kwieyaritsie, mawari wewiwame 'akaniuyeikakaitini Tsakariyaxi titewati, mawari wewiwame 'Awiyaxi teiterimama wahamatia katini'uximayakaitini. 'Iyaya 'Eritsaweti mikita 'Aruni nuiwarieyatsie mieme kanihikitikaitini.

⁶ Yunaiti heitseriemeki yamekateniyuriekaitini Kakaiyari hixie. Yamekatenikahukaitini Ti'aitame kemiti'aitakai naimetsie, wahetsie karahiwakaku.

7 Nunutsi mepikahexeyakai
'Eritaweti mikayiwekaiki meta
mekani'ukirawetsixitikitiniri.

8 Merikitsi heiwa Tsakariyaxi mawari
wewiwametiti katini'uximayakaitini Kakaiyari
hixie kepauka 'Awiya teiterimama wahetsie
mitiunakixi.

9 Mawari wewiwamete kemitiwayeyaritikai,
hetsiena katiniunake heiwa Ti'aitame tukita meu-
tahaniki pitsi mitaiyaki.

10 Kepauka maye'a pitsi mitaiyaki tukita, yunaiti
teiteri takwa mekaniyunenewiekaitini.

11 Hiki 'ana Tsakariyaxi niuki tuayame kaniux-
eiya Ti'aitame hetsia mieme mana 'utiweme mexa
pitsi taiyame tserieta.

12 Tsakariyaxi 'ixeyati kaniuyuitarieni
yu'iyaritsie, kaniutimani.

13 Hiki niuki tuayame mipai katinitahiawe:

—Pepikamaka, Tsakariyaxi 'aku, 'anenewieri
kaniu'enierieni. 'A'iya 'Eritaweti nunutsi
kanayexeyamiki 'aniwetime, Wani peka-
tiniteriwamiki.

14 Pekani'atemawiekamiki waikawa, 'a'iyari
kwini mieme ninaki'akamiki, yumiireti
mekaniyutemamawiekakuni kepauka
mitinuiwa,

15 kanimariwemiki Kakaiyari hixie. Kaxie
winuyari yatini xeime winu pikaye'eni, 'Iyari
Mitiyupata kaniwiyamiki mitinuiwatsie paititi.

16 'Ixaheritsixi teiteriyari yumiireme ta'aurie
kaniwaraxiriemiki, Ti'aitame memayexeyaniki
yukakaiyari.

17 Miki meri kananuyeyerimiki, Ti'aitame hixie, 'Eriyaxi hepai tiuka'iyariti tirikariyaya hexeyati, wa'ukiyarima ta'aurie kaniwaraxiriamiki yitiriyama memiwara'eriwaniki meta miki memikaheu'enana ta'aurie kaniwaraxiriamiki miki heitseriemeki yamemitekahu wahepai memiteyikihaweniki. Mipai katiniwakuha'aritamiki teiteri, Ti'aitame memikwewiekaki.

18 Hiki Tsakariyaxi mipai niuki tuayame katini-utahiawe:

—¿Ke'aneme 'iniariki yanepitimaika? Nekani'ukiratsitiniri meta ne'iya tukarieya ranutitiri.

19 Hiki niuki tuayame mipai katinitahiawe:

—Ne Kirawieri nekanihikitini, Kakaiyari hixie nekaniuweni. Yanemimatitahiaweki nekaneyeni'arieni, nemimatsitaxatianiki 'iki niuki 'aixia manuyine.

20 Peru, 'eki yuri pemikatiuta'eriki neniukitsie, kayuwati pepitiyerini, pekanuweti pekanayeimiki mexi ka'aye'aweni. Pepika'utaniukani kepaukake tukari maye'ani naiti yamitiyini.

21 Merikitsi teiteri Tsakariyaxi mekanikwewiekaitini, mekani'iyarixiekaitini 'emireutewikaiki tukita.

22 Hiki kepauka muwayetia kaniyutatexieni warahiaweti, hiki miki yamekatenetimani ke-name tixaiti tiuxei tukita, yumamaki xeikia kaniwaku'iniaritiwakaitini, 'aniukateitini kaniuweti.

23 Hiki heutipareku 'uximayatsikaya, yukie kaneyani.

24 Hiki 'ana reutiyetana 'iyaya 'ayehukati kanayani 'Eritaweti, hiki kaniyu'awietakaitini 'auxiwi metseri mipai 'utaiti:

25 «Kami, 'ipai katiniuyurieni Ti'aitame, yuwairiyati 'aixia minetsiyurieniki, teiteri memikanetsinanaimakaki».

Mariya kemitiutahiawarie Ketsutsi kemitiitiniwakeupai

26 Merikitsi 'ataxewirika metseritsie Kakaiyari yuniuki tuayame Kirawieri kaniutani'ani, Karereya kwieyaritsie kiekari Natsareti mirakutewatsie,

27 'iimari miyuxewikai hetsia kani-tani'ani Mariya mititewakai hetsia, kan-itiwikiximekaitini, 'uki Kutse titewati kanitiwitinikekaitini, Kutse Rawiri kaninui-warieyatikaitini.

28 Hiki Mariya hetsia heutahaka niuki tuayame, mipai katinitahiawe:

—Ke'aku. Ti'aitame 'aixia katiniuka'iyarini 'ahetsiemieme, 'ahamatia puyeika.

29 Miki yu'iyaritsie kaniuyuitiarieni, yatiniku'eriwakaitini titayari mipai mitiwaritia.

30 Niuki tuayame mipai katinitahiawe:

—Pepikamaka, Mariya 'aku. Kakaiyari 'aixia pitika'iyari 'ahetsiemieme.

31 Hikiri pe'ayehukati pekanayeimiki, 'ukitime pekanitiniwemiki meta Ketsutsi pekatiniteriwamiki.

32 Miki mariweti kanayeimiki, 'Amutewi Nu'aya katiniuteriwariwamiki. Ti'aitame Kakaiyari kanipitiamiki Rawiri 'uwenieyatsie mayeriniki, tut-sieya.

³³ 'Ixaheritsixi teiteriyari katiniwata'aitiamiki yuheyemeki. Kemitita'aita pikaheutipare hatsuaku.

³⁴ Hiki Mariya mipai niuki tuayame katiniutahiawe:

—Merikite, ɛkepatiti mipai pitiyini, 'uki nepikamate?

³⁵ Niuki tuayame mipai katinitahiawe:

—'Iyari Mitiyupata 'ahetsie kaninuamiki, kemi'ane 'Amutewi yutirikariyaki kamani'etiriwiyamiki. 'Ayumieme nunutsi mitinuiwa kanipatsiemiki Kakaiyaritsie mieme, Kakaiyari Nu'aya katiniuteriwariwamiki.

³⁶ Kami, 'a'iwa yatewa 'Eritsaweti 'ayehukati kanayani 'ukaratsititiri, 'ataxewime metseri kaniyurieka 'iya kaniweweme memixatakai.

³⁷ Kakaiyari pikayutatexieni, naimeki kaniyiweni.

³⁸ Mariya mipai katinitahiawe:

—Merikite, ne Ti'aitame nekatini'uximayatameyatini. Kepemaine yaketiuyini.

Hiki niuki tuayame kaneyani.

Mariya kemireku'iwataxi 'Eritsaweti hetsia

³⁹ Hiki miixa tukari ka'anukayeiwekaku yukuha'aritiaka kaneyani Mariya, yumexiitiati kiekaritsie kaneta'ani mihiriyatsie Kureya kwieyaritsie.

⁴⁰ Tsakariyaxi kiita heutahaka 'Eritsaweti kaniutawairitiani.

⁴¹ Merikitsi 'Eritsaweti kepauka Mariya wairitsikaya mu'eni, nunutsi neukuyuaxiani yuriepana. Hiki 'Iyari Mitiyupata kaniwiya 'Eritsaweti.

⁴² Mipai kaniutayini karima:

—Waikawa 'eki 'aixia pepi'itiarie, hipati 'ukari temika'itiarie hepai, meta 'aixia kani'itariemiki kemi'ane pemitinuiwitiani.

⁴³ ¿Nehetsie ketinake neti'aitiwame warutsieya minetsi'iwatamieki?

⁴⁴ Kami, 'awairitsika ne'u'enieku, nunutsi yutemawieti neukuyuaxiani neyuriepa.

⁴⁵ 'Aixia pekani'itariemiki yuri pemitiuta'eriki kename 'aye'ani naiti kepemitiutahiawarie, Ti'aitame kemimaretahiawixi.

Mariya kwikarieya

(Ruk 1:46-53 - 1Tsam 2:1-10)

⁴⁶ Hiki Mariya mipai kaniutayini:

—Ne'iyari mipai paine, Ti'aitame kanitirikaiyeni,

⁴⁷ ne'iyari kaniyutemawieka Kakaiyari hetsie Netsiwikweitsitiwame,

⁴⁸ kaneniuxeiya ti'uximayatameya kenemitihiki hetsiena mieme tsepa tixaiti nemikatihiki.

Kami, 'uxa'a warie yunaiti nuiwarite 'aixia ne'itariiekame mekaneni'eriekakuni,

⁴⁹ kemi'ane mitirikaiye mariwemek kaneni-uyurieni.

Miki Patsiekame kanixatsiwani.

⁵⁰ Kaniwanenimayaka yunaiti memeyemakaxe, meta waniwema kaniwanenimayaka.

⁵¹ Yikimana kemitiyuriene kanimatsiikini kemititirikaiye,

kaniwareutaweyaxiani miki
memiteyukatawe'erie yu'iyaritsie
kememiteku'eriwa.

⁵² Kwiepa te'aitamete kaniwarunawairieni tita memite'aita,

miki tixai memikatehime pita kani-
waruhiritiani waikawa.

53 Memeuhakakwikukai kaniwarutihiniya 'aixia
miti'aneke,
peru memeuka'ukai kaniwareutani'axiani
memamaweme.

54-55 Kanitsutiani tatsiparewieti 'ixaher-
itsixi teiteriyari hetsiana mieme
temite'uximayatamete,
he'eriwati kemitiwarutahiawixi
ta'ukiyarima,

'Apirahami kaninenimayaka,
meta kataninenimayaka yuheyemeki tame
hetsiana temiyeki.

56 Merikitsi Mariya 'Eritaweti hetsia
kaniukateitini 'etsiwatikaku haika metseri, 'arike
yukie kaneyani.

Wani Ti'iyame kemitiutinuiwaxi

57 Merikitsi tukari kanaye'ani 'Eritaweti
mitiniweniki, 'ukitime kaniutiniweni.

58 Hiki 'ahurawatari maremama
yunaiti mete'utamariaka Ti'aitame
waikawa kemitanenimayataxi, hamatiana
mekaniyutemamawiekaitini.

59 Hiki 'atahairieka tukaritsie mekaniu'axiani
me'i'iniaritanike nu'etsi huriyutsixi wax-
itekiyaki. Tsakariyaxi mekateniteriwakekaitini
'ukiyarieya hepai,

60 'ana warutsieya mipai kaniutayini:

—Tixaitsieti. Wani katinitewakamiki pita.

61 Miki mipai mekatenitahiawe:

—Peru 'amare mipai titewati pumawe.

62 Yumamaki mekanitahiawe paapaya,
kemitinake mipai mititeriwarieniki.

63 Xapa 'uta'iwauka, mana mipai katiniu'utiani:
«Wani katinitewaka». Yunaiti mekanihixiyani.

64 Hiki yapauka nenieya kaniuxinarieni, kani-
utaniuni, hiki 'aixia 'utaiti Kakaiyari hepaitsita
kanayani.

65 'Ahurawatari yunaiti mekanimamakaitini,
meta naitsarie Kureya hiriyaritsie kemituuyi mipai
katinikuxaxatsiwakaitini.

66 Yunaiti memi'enanakai mekaniyu'iyaritiakaitini
mipai meteyikihaweti: «¿Ke'aneti payani 'iki
nunutsi?» Miki meta, Ti'aitame yitirikariyaki
kaniparewiekaitini.

Tsakariyaxi kwikarieya

67 'Ana Kakaiyari 'Iyarieya Mitiyupata
'iwiyakaku nunutsi 'ukiyarieya Tsakariyaxi
kaniutaniuni Kakaiyaritsie mieme mipai 'utaiti:

68 «'Aixia ketikihawariwani Ti'aitame, kemi'ane
'ixaheritsixi mitakakaiyari.

Kanitsutiani yuteiterima wa'iwiya, 'aixia
'iyurieneti memixinarieniki.

69 Tatsi wikweitsitiwame tirikaiyeme
kataneyeni'airieni,

Rawiri kie mieme, ti'uximayatsiriwame

70 (meripaiti kemutayikai yametekuxatakaku
niukametemama memipatsie hetsiena
mieme),

71 mitatsitawikweitsitianiki miki
memitatsi'aye'unie memikatatsi'a'iwaki,
meta miki memitatsi'uxiwe'erie
memikatatsi'a'iwaki,

72 mipai mitiwatinenimayataki ta'ukiyarima

kemiraye'eri tiratu mipatsie kemitiuwewi.

⁷³ Kemitiuyuhiritia yatikihiaweti ta'ukiyari
'Apirahami:

⁷⁴ Kename tatsipitianiekai tekamamati
'atemu'uwaniki,
tatsi'utawikweitsitiaka miki
memitatsi'aye'unie wahetsia,
temeyexeianiki kemitinake,

⁷⁵ hetsiena mieme tepatsieti, heitseriemeki
yatetekahuti,
hixiena te'u'uwati mexi te'ayeneniereni.

⁷⁶ 'Eki meta, nunutsi 'aku, kemi'ane 'Amutewi
niukameya pekatiniuteriwariwamiki.
Kariki Ti'aitame pepanukuhaitiya huyeya
'aixia pemiyurieniki.

⁷⁷ Teiterimama wikweitsitiarika pekaniwata-
hekiatiamiki,
kemitiwareuyehiwirieni miki 'ax-
amemite'uyuri pehaiti.

⁷⁸ Mipai katiniyuriemiki takakaiyari
mitiyukanenimayaki.
Mipai kemi'ane taheima mimieme
kaninuamiki.

⁷⁹ Miwahekiariwiyaki miki yiwipa memu'uwa,
meta miki mekwi'iwari meti memiyiriyarie ni-
wahekiariwiyamiki,
ta'ikate katanitseiriyamiki teme'u'uwaniki hake
'aixia temitetaxeianiki Kakaiyari matia».

⁸⁰ Merikitsi nunutsi kaniwerekaitini,
'Iyarieya tirikaiyeti kanayani, makumawetsie
kaneyeikakaitini mexi tukarieya ka'aye'awekai
'akuxi matsiikiti mayaniki 'ixaheritsixi wahixie.

2

Ketsutsi kemitiutinuiwaxi (Mat 1:18-25)

¹ Merikitsi 'ana 'aitsika neutani'ariexiani Tsetsaxi 'Akutsitu hetsia mieme, mipai 'utaiti, yunaiti kwiepa memitama xapatsie memayuka'utianiki.

² (Miki matiari teiteri kememite'aka'utsie pituiyi kepauka Tsireniyu mihiritiariakai Tsiriya kwieyaritsie).

³ Hiki yunaiti mekaneutayeixiani memayuka'utiaxianiki yuxexuiti yukiekaritsie.

⁴ Hiki Kutse Karereya kwieyaritsie Natsareti mirakutewatsie kanayeyani. Kureya kwieyaritsie kaninuani Rawiri kiekariena Wereni mirakutewatsie. Rawiri kie kanimiemetikaitini, Rawiri nuiwarieya kanihikitikaitini.

⁵ Maka'utiarieniki kaneyeyani Mariya 'awititi miki mayehukakaiki. 'Iyaya kanayanikekaitini.

⁶ Mana mexi me'u'uwakai, tukarieya kanaye'ani mitiniweniki.

⁷ Hiki yumatari kaniutiniweni. Tuwaxateki kaniku'eima, wakaitsixi wakanuwatsie kanikateni mikaxuawekaiki wahetsiemieme memiwa'axianikekaitsie.

Taheima miemete niuki tuayamete kememitewarutahiawixi muxatsi wahiwemete

⁸ Merikitsi 'ana muxatsi wahiwemete mana mekaniu'uwakaitini, yeuta meniawahitiwekaitini yumuxatsi yiwikita.

⁹ Hiki wahixie niutakeni niuki tuayame Ti'aitame hetsia mieme. Wa'aurie nakuxawatikaitini Ti'aitame hekariyayaki, waikawa mekaniutimamani.

10 Peru niuki tuayame mipai katini-warutahiawe: «Xepikamamaka. Hiki nenixetaxatiamiki niuki 'aixia manuyine, waikawa kanixuawekamiki temawierika yunaime teiteri wahetsiemime.

11 'Iki tikaritsie tiyuwikweitsitiwame kanetinuiwa xehetsiemime, Rawiri kiekariena katineyini, Kiritsitu kanihikitini, Ti'aitame kanihikitini.

12 'Iki 'iniariki xekaneitimaikuni: Nunutsi xekanexeyakuni tuwaxateki 'eimeme, wakaitsixi wakanuwatsie heyekaime».

13 Hiki yapauka niuki tuayame 'aurie mekaniuti'uni muyuawitsie miemete yumireti, 'aixia me'utiyuati Kakaiyari hepaitsita, mipai me'utiyuati:

14 «Taheima witsikatinikihawariwani Kakaiyari, kwiepa 'aixia mekatenixeyariekuni teiteri miki wakimana minaki'a».

15 Merikitsi niuki tuayamete muyuawitsie meheutiyunixiaku, mipai mekateniyikihawekaitini muxatsi wahiwemete: «Hikimitsiari tepiyehu Wereni paiti, tepi'ixiariyu kemainekai, Ti'aitame kemitatiutahawixi».

16 Meyumexitiati mekanekine, mewaruta'iwauka Mariya mame Kutse mekaniwarutaxeyia, nunutsi meta wakaitsixi wakanuwatsie yekaime.

17 Mewaruxeyaka mekatenikuxatakaitini kememite'utahawarie nunutsi hepaitsita.

18 Yunaiti memi'enanakai mekanihixiyakaitini kememitewarutahawixiki muxatsi wahiwemete.

19 Matsi Mariya ni'wiyakaitini yu'iyaritsie 'iki naime, yu'iyaritiati hepaitsitana.

20 Hiki mekanekine muxatsi wahiwemete
'aixia metekuxatati Kakaiyari hepaitsita naime
kememite'uxeiki naime kememite'u'eniki, naiti
yakatiniuyini kememite'utahiawariekai.

Tukita kemit'i'at'arie Ketsutsi

21 Merikitsi 'atahairieka tukari
mekani'in'iaritiani huriyutsixi teiteriyari
waxitekiyaki. 'Ana Ketsutsi katiniuteriwarieni,
niuki tuayame kemititeriwaxi yumaamatsie
ka'ayekaiku 'akuxi.

22 Metatsiere kepauka tukari maye'a,
Muitsexi kemitu'aitakai niwekame hepaitsita
memiyu'itieniki, Kerutsareme mekanekine
nunutsi meheyetuanike Ti'aitame hetsia.

23 Mipai katine'uka 'iniari xapayaritsie,
Ti'aitame meripaiti kemainekai: «Yunaiti
'ukitsi matiari memitinunuiwa, miki
mekanipatsiekakuni Ti'aitame hetsiemieme».

24 Meta mekaniwarutimawa Ti'aitame
kemainekai 'iniari xapayaritsie kemire'uxa:
«Kukuruxi xeiparitsi yatini weuraixi tirixi
yuhutame».

25 Hiki tewi Kerutsareme kaniukateitini
Tsimiyuni titewati, miki heitseriemeki yatikamiet
Kakaiyari kanayexeiyakaitini, kanikwewiekaitini
'ixaheritsixi teiteriyari wanitiwame. 'Iyari
Mitiyupataki kanihinekaitini,

26 mipai katiniuhekiatsitiyariekaitini 'Iyari
Mitiyupataki, kename kwiti kam'nikikai,
'ixeiameke Ti'aitame hetsia mieme Kiritsitu,
'anarike kanim'nikiekaitini.

27 Hiki 'Iyari 'iniku, huriyutsixi
watukita kaninuani. Kepauka Ketsutsi

nunutsi paapamama memeutahaxia
me'eye'atianike kemitiwayeyaritikai, huriyutsixi
kemitiwayeyari, 'iniari niukiyaritsie kemire'uxa.

28 'Ana Tsimiyuni kanenutuni, 'aixia kaniutayini
Kakaiyari hepaitsita, mipai 'utaiti:

29 «Hikirixia nekutsiyari 'aku, pepeye'atia 'aniuki,
ne'iyaritsie neka'uximatiariekame
keneneuka'uxipitia ti'a'uximayatsiriwame.

30 Hikirixia nekimana nepitiuxei
kepemitiwawikweitsitiani teiteri,

31 nepixei tita pemitih'a'aritia yunaime teiteri
wahixie:

32 Kaniwahekiariwiyamiki hipame nuiwarite
meta witsite'aneneme katanayeitiamiki
'ateiterima 'ixaheritsixi».

33 Hiki paapaya meta maamaya
mekaniyu'iyaritiakaitini mipai mainekaiki
hepaitsitana.

34 'Aixia xepi'itiarieka kaniutayinita Tsimiyuni,
mipai Mariya katiniutahiawe nunutsi maamaya:

«Kami 'iki nunutsi yumireti 'ixaheritsixi
mematixirieniki meta yumireti memanuku'uniki
kani'ayumiemetini, 'iniari kaniyimiki
kaniniukimariekamiki,

35 'Ekita 'a'iyaritsie pekanitsekiemiki
hiwerikaki, kumu 'ixipara kemitiyutsewe.
Miki kemitiyurieneni, yumireti mematsiikiti
mekanakinikuni kememiteyikihawe
yu'iyaritsie».

36 Xewitita 'akaniuyeikakaitini 'ukaratsititi
Hana titewati, miki Kakaiyari niukameya
kanihikitikaitini, Penuheri kaninu'ayatikaitini,
'Atsexi nuiwarieyatiti. Kanitseiyekaitini, nauka

tewiyari heimana nauka wiyari kanihikaitini,
'utiwikieka 'atahuta wiyari piteitakai yikina,

³⁷ 'umiku yuxaita 'eniukateitini. Tuki kuraru-
yarita pikawayeyeikakai matsi yuhakietu yune-
newietu pi'ayumiemetikai tukariki tikariki.

³⁸ Hiki 'ahurawa 'uyaka pamipariyutsi
kanipitiani Kakaiyari, Ketsutsi hepaitita
tiniwakuxaxatiwakaitini Kerutsaremetari
memita'ikwewakai memixinarieniki yunaiti.

³⁹ Hiki meheye'atiaka naime kemire'uxa 'iniari
xapayaritsie, Ti'aitame kemainekai meripaiti,
Karereyatsie mekanekine, yukiekaritsie
mekaneta'axiani Natsareti mirakutewatsie.

⁴⁰ Merikitsi nunutsi kaniwerekaitini tirikaiyeti
timaiwetu kanayeiximekaitini, Kakaiyari 'aixia
pitiuka'iyarikai hetsiena mieme.

Temaikiyari Ketsutsi tukita kemitiyeyeikakai

⁴¹ Merikitsi xexuime wiyaritsie paapa-
mama Kerutsareme mekaneta'axekaitini
'ixiararipa kepauka meme'eriwakai, Kakaiyari
kemitiwarayewiti yuteiterima.

⁴² Hiki kepauka tamamata heimana huta
wiyari mihikai, mana mekaneutiyune, teiteri
kemitiwayeyaritikai 'ixiararipa.

⁴³ Hiki heutipareku, yu'utima
mehahuximekaku, Ketsutsi Kerutsareme
kaniyuhayewa, 'atsimekatemaikaku paapa-
mama.

⁴⁴ Teiteri watsata 'uyeikame me'erietu, xeitukari
mekaniuhukaitini. 'Ana yu'iwama yumarema
wahetsia mekanitiwautikine.

⁴⁵ Meka'itaxeiyawaweti, Kerutsareme
mekanakunuaxiani me'ikuwautiweti.

⁴⁶ Hiki hairieka tukari menitaxeiya tuki kuraru-yarita 'ayekaima, te'ikitamete wahixiapa 'ukaima. Kaniwa'eniekaitini kaniwaku'iwwiyakaitini.

⁴⁷ Yunaiti memi'eniekai mekanihixiyakaitini timaiwemekiki kemitiwaku'eiyakai.

⁴⁸ Hiki paapamama me'ixeyati mekan'i'iyarixiekaitini, maamaya mipai katinitahiawe:

—Neniwe, titayari miya petatiuyuri. Tepimatsikuwautiwe tetahiweriet'i 'apaapa matia.

⁴⁹ Mipai katiniwarutahiawe:

—'E'e, kari xepinetsikuwautiwekai. ¿Tami, 'atsixekatemalaikai, meuyewetse ne'ukiyari kiya hepaitsita nemi'ayumiemetiniki?

⁵⁰ Miki 'atsimepikateheitima niukieyatsie ke-mainekai.

⁵¹ Hiki wahamatia kaneyani, Natsareti mekaneta'axiani, kememaitikatei yakatiniekaitini. Maamaya yu'iyaritsie ni'iwiyakaitini iki naima.

⁵² Ketsutsi timaiwet'i kanayeiximekaitini, kaniwerekaitini, Kaka'iyari meta teiteri matsi waikawa 'aixia mekatenixeyakaitini.

3

Wani Ti'iyame kemitikuxataikai

(Ruk 3:2-10, 16-17 - Mat 3:1-12, Mar 1:3-5, 7-8)

¹ Merikitsi 'ana Tiweriyu Tsetsaxi tamamata heimana 'auxiwi wiyari kaniyuriekaitini ti'aitati, Punitsiyu Piratu kuwexinaruri kanihikitikaitini Kureya kwieyaritsie, Herurexi kanihiritiariiekaitini Karereya kwieyaritsie miti'aitaniki, Peripe Herurexi mi'iwayatikai

katini'aitakaitini 'Itureya kwieyaritsie meta
Tirakuniti kwieyaritsie, meta Ritsaniyaxi
katini'aitakaitini 'Awiriniyatsie,

² 'Anátsi meta Kaipátsi mekanihiritiariiekaitini
mawari wewiwamete. 'Ana Kakaíyari yuniuki
Wani kaniupitiani Tsakariyaxi nu'aya, maku-
mawetsie 'uyeikakaku.

³ Wani naitserie Kurutani hatuxameyari
manuyeka kaniuyeikakaitini, mipai tikuxatati
teiteri memitehayewaki 'axameteyurieti meta
memika'iyarieniki mipai mitimatsiikíniki kename
mete'uhayewaxi 'axameteyurieti.

⁴ Yakatiniyurienekaitini kemire'uxa
Kitsariyaxi xapayaritsie, Kakaíyari niukieyaki
kemitikuxatakai:

«Xewiti makumawetsie mipai pírehiwa:
“Xekeneukuha'aritia Ti'aitame huyeya,
xexeurawime huyeya xekeneutiwewi.

⁵ Naiti 'aki kananuparekutiarixiamiki,
naiti yemuri 'emutiti 'etsimutiti 'akuweriti
kanayeitiariemiki.

Tita mititutune xexeurawiti katinayeimiki,
tita mirakutetexiya 'akuharuaniti
katinayeimiki.

⁶ Yunaiti teiteri mepixeiya kemitiyuwikweitsitiwa
Kakaíyari”».

⁷ Wani mipai katiniwakuxaxatiwakaitini teiteri
memi'axekai miwaka'iyaki:

—Kuterixi waniwema. ¿Kemi'ane mipai
pitixe'utahiawixi xemi'yuta'unaki kapa
'uxa'atiniwarie xe'uyehekarieniki?

⁸ Miki memite'uhayewaxi kememiteyurie
wahepai xeketenyurieka, kemireuyewetse.

Xepika'itsutiaka yu'iyaritsie mipai
 xeteyikihiaweti: “Tepinaki'eriwa ta'ukiyari
 temexeiyaki 'Apirahami”. Mipai nepitixekihawe,
 Kakaiyari kaniyiweni 'iki tetexi teiteri
 miwarayeitiani 'Apirahami niwemama.

⁹ 'Ari hatsa kaniukuha'aritarieni kiyexi
 maxirieniki, 'ayumieme naiti kiye 'aixia 'aneneti
 mika'utixuxuawere kanaxiriyamiki, taipa
 kaneuxiriyamiki.

¹⁰ Teiteri mipai mekateniku'iwwawiyakaitini:

—¿Kamitsi keteteyurieka?

¹¹ Mipai katiniwarutahiawe Wani:

—Kemi'ane huta kamixayari mexeiya, kemi'ane
 mikaheixeiya ke'umini, kemi'ane 'ikwai mexeiya
 yaxeikia ketiyurieneni.

¹² Meta kuwiyexinu hetsiemieme tewawamete
 mekanu'axiani, memika'iyarieniki. Mipai
 mekatenita'iwwawiya:

—Ti'ikitame 'aku, ¿keteteyurieka tame?

¹³ Miki mipai katiniwarutahiawe:

—Kexemite'u'aitiarie, heimana mieme
 xepikatewauka.

¹⁴ Meta kuyaxi mipai mekatenita'iwwawiya:

—Tameta, ¿keteteyurieka?

Miki mipai katiniwarutahiawe:

—Xepikatenawayani, 'itarikaki
 xepikawatawiwiyani. Xekenenaki'aka
 yu'iwarikaki.

¹⁵ Merikitsi 'ana teiteri mekanita'ikwewakaitini
 yu'iyaritsie meyu'iyaritiati yunaiti Wani
 hepaitsita, xika miki Kiritsitu hikitini mexika
 katixaitini, me'utiyuati.

16 Peru Wani mipai katiniwarutahiawe yunaime:

—Neri haki nepixe'uka'iya. Peru 'ukanamieni kemi'ane waikawa mitirikaiye, nekatirikaiyekaku ne. 'Aixia nepika'ane nehetsie mitinakeniki nemiparewiekaki ninemenakuwenirieniki kakaiya kwitaxiyari. Miki pita kanixeka'iyamiki 'Iyari Mitiyupataki meta kanixe'itimiki tai kemitiyu'itiwa.

17 Kuxari 'itiwame pakwe'e, tiriku miti'itieniki kuxari manuyewiwieniki, tiriku kaniti'utamiki kaxetunitsie, peru kuxariyari pita pititaiya tai mikatiwetsie.

18 Matsi waikawa kaniwatuikakaitini teiteri, niuki 'aixia manuyine kaniwakuxaxatiwakaitini.

19 Hiki Herurexi miki kwieyari kanihiritiariiekaitini mana miti'aitaniki. Yu'iwa kaniu'iyapieni, Heruriya titewakame kaniutiwitini, waikawa katiniyurienekaitini Herurexi 'axatiyurieneti, 'ayumieme Wani kanitate'akaitini.

20 Hiki Herurexi nayuye'atiani 'ax-akemitiyurienekai, Wani kananutahiani katsariyanata.

Ketsutsi kemitiuka'iyarie meta nuiwarieya

(Ruk 3:21-38 - Mat 3:13-17, 1:1-17, Mar 1:9-11)

21 Merikitsi kepauka yunaiti teiteri memuka'iyarie, Ketsutsi kaniuka'iyarienita. Mexi yunenewiekai, taheima kananakatenire,

22 'Iyari Mitiyupata heimana kanakaneni hetsiena kaninuani, kukuru hepai katiniyux-exeiyakaitini. Hiki xewitita taheima mipai

kanetayini: «'Eki pekanineniwetini nekamani-naki'erieka, 'akimana nekaniyutemawieka».

²³ Merikitsi Ketsutsi xetewiyari heimana tamamata wiyari yakititi kanihikaitini kepauka mitutia mipai tiyurieneti. Kutse kaninu'ayatikaitini, mekateniku'eriwakaitini,

mikita 'Eri kaninu'ayatikaitini,

²⁴ mikita Matati kaninu'ayatikaitini,

mikita Rewi kaninu'ayatikaitini, mikita Meriki kaninu'ayatikaitini,

mikita Kanahi kaninu'ayatikaitini, mikita Kutse kaninu'ayatikaitini,

²⁵ mikita Matatiyaxi kaninu'ayatikaitini, mikita 'Amuxi kaninu'ayatikaitini,

mikita Nahumi kaninu'ayatikaitini, mikita 'Etsirie kaninu'ayatikaitini,

²⁶ mikita Nakahi kaninu'ayatikaitini, mikita Mahati kaninu'ayatikaitini,

mikita Matatiyaxi kaninu'ayatikaitini, mikita Tsemehi kaninu'ayatikaitini,

mikita Kutse kaninu'ayatikaitini, mikita Kura kaninu'ayatikaitini,

²⁷ mikita Kuhana kaninu'ayatikaitini, mikita Xetsa kaninu'ayatikaitini,

mikita Tsuruwaweri kaninu'ayatikaitini, mikita Tsaratieri kaninu'ayatikaitini,

mikita Nerie kaninu'ayatikaitini,

²⁸ mikita Meriki kaninu'ayatikaitini,

mikita 'Arie kaninu'ayatikaitini, mikita Kutsani kaninu'ayatikaitini,

mikita 'Erimurami kaninu'ayatikaitini, mikita 'Eri kaninu'ayatikaitini,

- 29 mikita Kutsuhe kaninu'ayatikaitini, mikita
'Eriyetsexi kaninu'ayatikaitini,
mikita Kurimi kaninu'ayatikaitini, mikita
Matati kaninu'ayatikaitini,
mikita Rewi kaninu'ayatikaitini,
30 mikita Tsimiyuni kaninu'ayatikaitini,
mikita Kura kaninu'ayatikaitini, mikita Kutse
kaninu'ayatikaitini,
mikita Kunani kaninu'ayatikaitini, mikita
'Eriyakimi kaninu'ayatikaitini,
31 mikita Mereya kaninu'ayatikaitini, mikita
Mainani kaninu'ayatikaitini,
mikita Matata kaninu'ayatikaitini, mikita
Natani kaninu'ayatikaitini,
mikita Rawiri kaninu'ayatikaitini,
32 mikita Kitsahi kaninu'ayatikaitini,
mikita 'Uweri kaninu'ayatikaitini, mikita
Wuhutsi kaninu'ayatikaitini,
mikita Tsarimuni kaninu'ayatikaitini, mikita
Nahatsuni kaninu'ayatikaitini,
33 mikita 'Aminarawi kaninu'ayatikaitini, mikita
'Aramini kaninu'ayatikaitini,
mikita Hetsirumi kaninu'ayatikaitini, mikita
Paretsi kaninu'ayatikaitini,
mikita Kura kaninu'ayatikaitini,
34 mikita Kakuwu kaninu'ayatikaitini,
mikita 'Itsahaki kaninu'ayatikaitini, mikita
'Apirahami kaninu'ayatikaitini,
mikita Teraki kaninu'ayatikaitini, mikita
Nakuxi kaninu'ayatikaitini,
35 mikita Tseruki kaninu'ayatikaitini, mikita
Rakau kaninu'ayatikaitini,

mikita Pereki kaninu'ayatikaitini, mikita 'Ewexi
 kaninu'ayatikaitini,
 mikita Tsara kaninu'ayatikaitini,
³⁶ mikita Kainani kaninu'ayatikaitini,
 mikita 'Aripatsari kaninu'ayatikaitini, mikita
 Tsemi kaninu'ayatikaitini,
 mikita Nuhexi kaninu'ayatikaitini, mikita
 Rameki kaninu'ayatikaitini,
³⁷ mikita Matutsareni kaninu'ayatikaitini,
 mikita 'Enuki kaninu'ayatikaitini,
 mikita Kareri kaninu'ayatikaitini, mikita Ma-
 harareri kaninu'ayatikaitini,
 mikita Kainani kaninu'ayatikaitini,
³⁸ mikita 'Enuxi kaninu'ayatikaitini,
 mikita Tseti kaninu'ayatikaitini, mikita 'Arani
 kaninu'ayatikaitini,
 mikita Kakaiyari kaninu'ayatikaitiniri.

4

Ketsutsi kemitiuta'iniatsie

(Ruk 4:1-13 - Mat 4:1-11, Mar 1:12-13)

¹ Merikitsi, Ketsutsi 'Iyari Mitiyupataki hineti
 mana kaneyeyani Kurutani hatuxameyaritsie,
 meta 'Iyari Mitiyupata kaneiwitini makumawet-
 sie.

² Mana huta tewiyari tukari kaniuyurieni,
 meta kauyumarie kanita'iniata. Mipai-paimexia
 tukari pikatikwakai, hiki 'anarike kaneka-
 hakamikatiyani.

³ Hiki Kauyumarie mipai katinitahiawe:
 —Kamitsi, 'eki xika Kakaiyari penu'ayatini, 'iki
 tete mipai ketineutahiawi, paa payuyeitiani.

⁴ Ketsutsi mipai katinita'eiya:

—'Utiarika mipai paine: “Tewi xika paa xeikia kwaka, mikiki pika'ayeyurini”.*

⁵ Hiki Kauyumarie wapaiti heiwitika, kwiepa memitama wakwie naima kanixeitsitiani xeinieriyariki.

⁶ Kauyumarie mipai katinitahiawe:

—Heitserie nepimatsipitiaka 'iki naima hepaitsita, yunaiti witsimemimatekiahaweniki nepimatsipitiaka, 'iki naima nekaniyetuiriyarini, heitserie nepexeiya nemiminiki kemi'ane minetsinake.

⁷ 'Ayumieme 'eki nenewieri xika penetsi'upitiani, 'iki naiti 'apini pirayani.

⁸ Hiki Ketsutsi mipai katinitahiawe:

—Kenemie Kauyumarie, 'utiarika mipai paine: “Nenewieri pepipitiani Ti'aitame 'akakaiyari, miki hikiaame xeikia pepayexeiyani”.

⁹ Hiki Kauyumarie kaneiwitini Kerutsareme, watuki yekirita kanenutiwitini, mipai katinitahiawe:

—'Eki Kakaiyari xika penu'ayatini, 'ena keneukatsuna.

¹⁰ 'Utiarika mipai paine:

»“Yuhetsia miemete niuki tuayamete
pitiwa'aitiaka 'ahepaitsita
memimatsi'iwianiki.

Yumamaki mepimatsituikani,

¹¹ kapa tetetsie pe'uti'ikamireki”».

¹² Ketsutsi mipai katinitahiawe:

—Mipai paineta: “Pepika'i'itsipaneni Ti'aitame mi'akakaiyari”.

* **4:4 4:4** RV60 meta hipati mepenaniitia *Kakaiyari kemutayi, niukieya naiti peuyewetseta.*

13 Hiki Kauyumarie naimeki 'ita'iniataka kaneyani 'ariketa 'ita'iniatake.

Ketsutsi kemitiuyuri Natsaretitsie

14 Merikitsi Ketsutsi yu'utima kaneyeyani Kareya paiti, 'Tyari 'itirikariyakaku, naitsarie kaniutamariwa hepaitsitana.

15 Katiniku'ikitanekaitini tukiteta, hiki yunaiti 'aixia mekatenukuxatakaitini hepaitsitana.

16 Hiki Natsareti kiekariyaritsie kaninuani, matawerixitsie, hiki kemitiyeyariyatikai, tukita kaneutahani 'uxipiya tukaritsie. Kananukukeni tititeriwake,

17 hiki xapa kaniuhuritarieni Kakaiyari niukieya maye'uxa, Kitsariyaxi kemiraka'utia. 'Itaweraka kanitaxeiya niuki hakewa mipai maine:

18 «Ti'aitame 'Tyarieya kaneniuwiya,
 Kaneniuhiritiani niuki 'aixia manuyine
 nemiwakuxaxatiwaniki tixaiti
 memikateheuxeiya.

Kaneneyeni'ani nemiwaranayexirieniki
 miki memiyuhiwerie yu'iyaritsie,
 yanemitiwatahiaweki miki memanu-
 taxiriya kename me'utixinarie,
 meta yanemitiwatahiaweki miki memakikipe
 kename me'anutaneniere,
 nemiwaxinaki miki memiwiyarietika,

19 nemitikuxataniki kename tukari 'aye'a
 kepauka Ti'aitame muyuwairiya 'aixia
 mitatixeyaki».

20 Hiki 'itakwikwieka xapa, 'iyetuirieka tiyuparewiwame, mana kanayerini ti'ikitame

'uwenieyatsie. Yunaiti tukita memayetekai kwi mekanixeyakaitini,

21 hiki kanitsutiani mipai tiwakuxaxatiwati: «'iki tukaritsie kanaye'ani 'iki 'utiarika kemaine, xe'i'eniekaku xeme».

22 Yunaiti mekatenihekiatakaitini me'i'enieka, mekanihixiyakaitini niuki witsimanuyine tetana mayeneikakakai. Mipai mekanutiyuanekaitini: «'iki Kutse nu'aya katihiki?»

23 Mipaita katiniwarutahiawe: «Patsi yuriki xeme 'iki niukiyari xekanenitaxatiakuni: “Tiyu'uayemawame 'aku, 'akimana keneuyu'uayema. Ketemite'u'enana Kaperunaume kepemireyuri, 'enata 'akiekaritsie yaxeikia ketineuyuri”.

24 Tawarita mipai kaniutayini: Yuriki mipai nepixerahiawe, nixewiti Kakaiyari niukameya pikanaki'eriwa yukiekaritsie.

25 Yuri nepaine, 'Ixaheri kwieyaritsie yumireti wiuraxi mekanu'uwakaitini kepauka 'Eriyaxi 'amuyeikakai, kepauka muyuawitsie mireunamie haika wiyari heimana 'ataxewi metseri, kepauka haka mutawe naitsarie kwiepa.

26 Miki wahetsia pika'utani'arie 'Eriyaxi nixeime hetsia, Tsiruni kwieyaritsie pita kaniutani'arieni Tsarepita mirakutewatsie wiura hetsia.

27 Miki meta, yumireti 'amekanu'uwakaitini 'Ixaheri kwieyaritsie kwiniyaki meka'itiatikaiti kepauka 'Eritseu 'amuyeikakai Kakaiyari niukameya, nixewiti tima pika'u'itiya mana kiekatari, tsiriyatanaka pita kaniu'itiyani Nahamani titewati».

28 Hiki me'i'enieka kemitikuxataakai, mekani-uyeha'ani yunaiti tukita memayetekai.

29 Me'anuku'uka, kiekaritsie mekaneyeweia, yemuritsie mekaneihana kiekari hetsiena mawewiyakaitsie, mana tekia memekahianiki.

30 Peru miki wahixiata heutayuneka kaneyani.

Kakaiyari mika'itiya tewi kemitiwiyakai

(Ruk 4:31-37 - Mar 1:21-28)

31 Merikitsi kiekaritsie kaninuani Kape-runame mirakutewatsie Karereya kwieyaritsie, mana 'uxipiya tukaritsie tiniwa'ikitiakaitini.

32 Miki mekanihixiyakaitini 'ikitsikayaki, heitserie hexeiyaati mitaniukakaiki.

33 Hiki tukita nayekateitini tewi kakaiyari mika'itiya 'iwiyakaku.

34 Karima kaniutahiwa mipai 'utaiti:

—'Aii, kepetati'uximatia Ketsutsi natsaretitanaka. ¿Petatsika'unake kari pepunua? Ne nepimatsimate kepemipaiki: 'Eki pepihiki Kakaiyaritsie mieme pemipatsie.

35 Hiki Ketsutsi kanitatieni mipai 'utaiti:

—Kayuwati. Keneuxina miki tewi.

'Iya kakaiyari tewi 'atihiaa wahixiapa, kanixina katikwinitiaa.

36 Yunaiti mekaniutimamani, meteyukuxaxatiwati mipai mekaniutiyuanekaitini: «¿Ke'aneme niuki pexeiya? Heitserie hexeiyaati kaniwarutate'ani kakaiyarixi memika'itiyatika tirikariya hexeiyaati, miki mekaniwatixinani».

37 Naitserie kiekari 'aurie kanikuxaxatsi-wakaitini, Ketsutsi kemitiyurienekai.

*Ketsutsi kemirenayehia Pekuru warikaiya
(Ruk 4:38-43 - Mat 8:14-17, Mar 1:29-38)*

³⁸ Merikitsi tukita wayeyaka Tsimuni kie kaninuani, hiki hiiya yemeki kaniwiyakaitini Tsimuni warikaiya. Ketsutsi mekaniutawawirieni miparewieniki.

³⁹ 'Auriena 'utakeka, hiiya kaniutatieni, hiki hiiya kanihayewa. Yapauka 'anukukeka kaniwarutiparewietiyani.

⁴⁰ Hiki tau 'akayuneku, yunaiti memiwarexeiyakai tekwiwkikate miireme kwiniyaki memitekukuyekai hetsiana mekaniwa'atiani, yuxexuime wahetsie 'utimeka 'aixia metehue'eriekame kaniwarayeitiani.

⁴¹ Kakaiyarixi 'axamemi'anene kaniwaruta'aitiani memiwatixinaki yumiireme memitewakwinitiakai, miki mekaniutihiwakaitini mipai me'utiyuati: «'Eki Kakaiyari pekaninu'ayatini». Peru Ketsutsi warutate'ati kakaiyarixi pikawapitiakai memitiniuniki memimaikaiki kename Kiritsitu hikitikai heitserie mupitiarie.

⁴² Hiki 'ukatareku kaneyani teiteri memikahaxuawetsie. Teiteri yumireti mekanikuwautiwekaitini, me'itaxeiyaka mepikuhanakai mikaheyeikanikiri.

⁴³ Peru miki matsi mipai katiniwarutahiawe: «Kaneuyeweka hipame kiekaritetsieta niuki 'aixia manuyine nemikuxataniki, kemitiyini Kakaiyari ti'aitakaku, peuyewetse nemitikuxataniki, 'ayumieme nepeyeni'arie».

⁴⁴ Hiki kaniyeweyakaitini tikuxataneti huriyut-sixi watukiteta.

5

*Kemi'ane meri muwaranayexei
teyu'ikitiwamete*

(Ruk 5:1-11 - Mat 4:18-22, Mar 1:16-20, Wa 1:40-42)

¹ Merikitsi Ketsutsi Kenetsareti harakunayari tetsita kaniuyeikakaitini tikuxatati, yumiireti mekanitsaipinakaitini Kakaïyari niukieya me'eniekuti.

² Hiki kanuwa kaniuxeiya hutame hatetsita 'aheikame ketsiteweyamete wakanuwa, ketsiteweyamete me'anatikinaka yuwipi mekani'ekwakaitini.

³ Hiki xeimetsie kayerika Tsimuni kanuwayatsie, kanitawawirieni harakunatsie 'etsiwa meutahaniki. Kanuwatsie yekaiti katiniwa'ikitiakaitini teiteri.

⁴ Hiki yuxatsika 'unika, mipai katinitahiawe Tsimuni:

—'Emeukatewatsie keneuyeye'a, mana wipi xeneukawiwixia tsapari xemiwaratixirieniki.

⁵ Hiki Tsimuni mipai katinitahiawe:

—Ti'ikitame 'aku, tikakita naime tepayekexi, tepiteta'uxitia yaki xeikia, tixai tepikate'umi. Matsi miya pemaineki, wipi nekaneukawiwixiamiki.

⁶ Mipai mekatenuyurieni, hiki mekaniwaratixirieni ketsite kwini mieme meyupaimeme, wipi kanititsanikekaitini.

⁷ Hiki yu'iwama xeime kanuwatsie memiyetekai yumamaki mekaniwarumawiya memakineki memiwaparewieniki. Miki mekaniu'axiani, yukanuwate mekaniutihiniyaxiani hutame, 'etsiwa'ikaku mekaniukayunixiani.

8 Hiki naime tiuxeiyaka Tsimuni Pekuru mititewakai, kaniutitunumakeni Ketsutsi hixie mipai 'utaiti:

—Ti'aitame, keneneuhayewa, ne 'ax-anepitiyuruwame.

9 Kaniutimakaitini miki meta yunaiti hamatiana memu'uwakai mekaniutimamani miya yupaimeme memiwaratixiriki tsapari.

10 Yaxeikiata Tsewereu niwemama mekaniutimamani Kakuwu meta Wani, Tsimuni hamatia memite'uximayakai. Hiki Ketsutsi mipai Tsimuni katiniutahiawe:

—Pepikamaka. Hikitsi 'ena mitiyehane teiteri pita pekaniwakuxeirimiki.

11 Hiki kanuwa me'anatihapaka kwiepa, naime mete'uku'eirieka, Ketsutsi hetsie mekateniuwiya mekaneiweiya.

Tewi kwiniyaki mika'itiyakai

(Ruk 5:12-14 - Mat 8:2-4, Mar 1:40-44)

12 Merikitsi xeime kiekaritsie kaniuyeikakaitini Ketsutsi, tikwikame mana kaniukateitini mika'itiyakai naiti heupiniti. Hiki Ketsutsi 'uxeiyaka, kaniutihiximakeni, mipai titawawirienike:

—Ti'aitame, xika pe'awairiyani, pepiyiwe peminetsi'u'itieni.

13 Ketsutsi yumama 'utatseraka kanimayiani mipai 'utaiti:

—Nepinewairiya, pe'itiyati peke'uyuhayewa.

Yapauka kwiniya kanihayewa.

14 Hiki Ketsutsi mipai katinita'aitiani 'atsimikatitahiaweki xeime. Mipai katinitahiawe:

—Kenemie mawari wewiwame matsixeyaki,
pemu'itayaki ketineutimawa Muitsexi
kemitu'aitaxi pemitwatahekiatiani.

¹⁵ Perutsi matsi kwini mieme katinikuxax-
atsiwakaitini hepaitsitana, teiteri yumiireti
mekaniyutixexeriwakaitini memi'enieniki
'aixia memite'uka'eritiariwaniki kwiniya
kememitehexeyakai.

¹⁶ Ketsutsi matsi makumawetsie
kaneyekakaitini yutanenewienike yuxaita.

Ketsutsi huriekame kemiranayehia

(Ruk 5:18-26 – Mat 9:2-8, Mar 2:3-12)

¹⁷ Merikitsi xeime tukaritsie katini'ikitakaitini,
mana menayetekaitini huriyutsixi teiteriyari
yuyeyariki memipatsiekai paritseutsixi
memiteyuteriwakai, hipatita huriyutsixi
wa'iniariki memite'ikitametetikai. Naime
kiekaritetsie Karereya kwieyaritsie Kureya
kwieyaritsie mekaneyekinekaitini meta
Kerutsaremetsie. Kaka'yari tirikariyaya kanixu-
awekaitini Ketsutsi 'aixia mitiwaruka'eritiwaniki.

¹⁸ Hiki teiteri mekaniu'axiani me'ehanati
huriekame 'itaritsie yekaima. Ketsutsi
miwakateitsie mekani'atianihekaitini hixiena
me'itenike,

¹⁹ peru mekaniyutatexieni meheutahaxianike
teiteri memiyumiirekaiki, 'ayumieme kii heima
meneutimamake, tekayari meha'unaka, Ketsutsi
hixie mekaneikatuani tewi 'itari naime teiteri
wahixiapa paiti.

²⁰ Hiki waruxeyaka yuri kememite'eriekai,
mipai kaniutayini:

—'Eki 'aku, 'axakepemituuyuri
pekatineuyehiwiyarieni.

21 Hiki paritseutsixi meta 'iniariki memite'ikitametetikai, miki mekanitsutiani mipai meteyikihaweti: «¿Kepipaiki 'iki 'axamutaine Kakaiyari hepaitsita? ¿Kepaiki piyiwe mitiwareuyehiwirieni 'axamete'uyurieyu, Kakaiyari xeikia piyiwe?»

22 Ketsutsi retimaika kememiteyikihawekai mipai katiniwarutahiawe:

—¿Titayaritsi miya xeteyikihawe yu'iyaritsie?

23 ¿Tita matsi katikwaniwe, ketikwaniwe mipai xika 'utayini: “Ke'axapemitiuyuri pepireuyehiwiyarie”, katikwaniwe matsi mipai mutayini, “Kenanukukexi kenekuyeikani”?

24 Peuyewetse mipai xemitemaikaki, Yuri Tewi kenemititewa, heitserie nekanexeyani kwiepa nemitiwareuyehiwirieniki miki 'axamemite'uyuri.

'Ana mipai katinitahiawe huriekame:

—'Eki 'aku nepimarahiawe, kenanukukexi, 'a'itari kenanukwe'i, 'akie kenemie.

25 Yapauka kananukukeni yunaime wahixie, titatsie mirakatei kaneikweni, yukie kaneyani 'aixia 'utaiti Kakaiyari hepaitsita.

26 Hiki yunaiti mekanihixiyakaitini, 'aixia mekanituyuanekaitini Kakaiyari hepaitsita. Waikawameki mekanimamakaitini mipai me'utiyuati: «Mamariwaweme tepite'uxei hiki».

*Rewi kemitiuta'ini hetsiena mitiwiyaiki
(Ruk 5:27-32 - Mat 9:9-13, Mar 2:14-17)*

27 Merikitsi kaneyani, tewi kuwiyexinutsie mieme tiwawame kaniuxeiya Rewi titewakame

memite'ayutituayatsie 'akaime. Ketsutsi mipai katinitahiawe:

—Nehetsie ketineuwiya.

²⁸ Hiki Rewi 'anukukeka, naime tiuku'eirieka, hetsiena katiniuwiya.

²⁹ 'Ana Rewi 'ikwai kaniuwewieni yukiita Ketsutsi hetsiemieme, yumireti kuwiyexinu hetsiemieme tewawamete, meta hipati teiteri mekatenikwakaitini hamatiana.

³⁰ Peru paritseutsixi meta 'iniariki memite'ikitametetikai memiyinikai, miki mekaniniukixiekaitini mipai metewakihaweti hetsiana miemete teyi'ikitiwamete:

—¿Titayarikuta miki tewawamete meta 'axateyuruwamete wahamatia xetekwa'a meta xete'ie?

³¹ Hiki Ketsutsi mipai katiniwarutahiawe:

—Miki 'aixia memiteheu'erie mepikaheiyehiwa tiyu'uayemawame, miki memitekukuye pita mekaneiyehiaka.

³² Nepikanua newata'inienike miki heitseriemeki yamemitekahu, miki 'axamemiteyurie pita newata'inienike nekaninuani memitehayewaki ke'axamemiteyurie.

*Kemitiuta'iwawiyarie hakiya hepaitsita
(Ruk 5:33-39 - Mat 9:14-17, Mar 2:18-22)*

³³ Merikitsi mipai mekatenitahiawe:

—Wani hetsia miemete teyi'ikitiwamete mepuyuhakixime meta mepiyunenewixime miixa, meta paritseutsixi wahetsia miemete yaxeikia mepiteyurie. ¿Peru 'ahetsia miemete titayari yametekwa'a yamete'ie?

³⁴ Hiki Ketsutsi mipai katiniwaruta'eiya:

—ǂKetiyiwe miwahakieka neneikeme
'inierimama mexi neneikeme wahamatia
'uyeika?

³⁵ Tukari kanaye'amiki kepauka neneikeme
mitihanieni watsata, miki tukaritsieke
mekaniyuhakikuni.

³⁶ 'Iki 'ixatsi hepaitsita tikuxatati tini-
waruti'ikitiatiyani mipai 'utaiti:

—Tewi kapitatsana 'ixuriki hekwame,
mimanetsikitianiki miye'i. Xika mipai tiuyurieni,
hekwame pitatsanekeyu, mihekwa matia miye'i
'axapitiyuxexeiyanikeyu.

³⁷ Meta nixewiti tsixai miyeye'itsie pika'ikatu'a
kaxie winuyari mihekwa mikwanaki. Mexika
mipai tiuyurieni, winu mihekwa tsixai kanitit-
sanamiki, winu kanitayeuriweni, meta tsixai ka-
neuyewautseni.

³⁸ Matsi kaxie winuyari mihekwa kaneuyeweka
tsixai mihehekwatsie mikatuarieni mikwanaki.

³⁹ Tewi meripai mieme 'anieku 'anuti'ieme,
kwaname pikaheu'imikini, mipai paineni: “Meri-
pai mieme 'aixia kana'aneni”.

6

*'Uxipiya tukaritsie tiriku kememite'utikwai
teyi'ikitiwamete*

(Ruk 6: 1-11 - Mat 12:1-14, Mar 2:23-3:6)

¹ Merikitsi 'uxipiya tukaritsie Ketsutsi tiriku
ma'iwiyatsie kaniuyeyani, teyi'ikitiwamete tiriku
miayeyari mekananutihurukakaitini, yumamat-
sie me'ititiminati mekanikwakaitini.

² Hiki paritseutsixi hipati mipai mekanu-
tiyuani:

—¿Titayarikuta xeme kemikareuyewetse xeteyurie 'uxipiya tukaritsie?

³ Ketsutsi mipai katiniwarutahiawe:

—¿Kari, tima xepika'ekateriwawawe kemitiuyuri Rawiri kepauka memuhakakwi miki meta hamatiana memu'uwakai?

⁴ Kakaiyari kiyata kaneutahani, paa muwa Kakaiyari hixie mamanekai 'anaka'ika, kanitikwani, miki heitserie pikahexeyakai mitikwaniki, mawari wewiwamete xeikia heitserie mepexeyakai. Metatsiere kaniwarumini miki 'utimana memeu'uwakai.

⁵ Mipaita katiniwarutahiawe:

—Heitserie nekanexeyani 'uxipiya tukari hepaitsitata Yuri Tewi nehikititi.

⁶ Merikitsi tawari 'uxipiya tukaritsie tukita kaneutahani, hiki kanitsutiani ti'ikitati. Tewi muwa kanayekateitini mimamawakikai yutserieta,

⁷ miki 'iniariki memite'ikitametetikai meta paritseutsixi mekanihupiekaitini, tsiparatsi xika 'uxipiya tukaritsie 'enayehianike tima, me'utiyuati, mikiki memitaxanetaki.

⁸ Timaiti kememiteyikihawekai, mipai katinitahiawe tewi mimamawakikai:

—Kenanukukexi, tahixiapa keneutakexi.

'Anukukeka mana kaniutakeni.

⁹ Hiki Ketsutsi mipai katiniwarutahiawe:

—'Ipai nepitixeku'iwawiya: ¿'Uxipiya tukaritsie tiheitserie 'aixia mitiyurieneni, nutsu 'axamitiyurieneni? ¿Tiheitserie para tewi mutawikweitsitiani, nutsu mika'unaki pita?

¹⁰ Yunaima waranuxeiyatiyaka, mipai tewi katiniutahiawe:

—'Amama keneutatsera.

Mipai tiuyurieku mamaya 'aixia 'aneti kanayani.

¹¹ Miki kwinimieme mekateniuyeha'ani, hiki mekanitsutiani metekuxatati Ketsutsi kememiyurienikekai.

Tamamata heimana huta ni'ariekate
(Ruk 6:13-16 - Mat 10:2-4, Mar 3:16-19, Ni'a 1:13)

¹² Merikitsi 'ana hiritsie kaneutiyune yutane-newienike, xeitikari nenewieri kanipitiakaitini yukakaiyari.

¹³ Hiki 'ukatareku, yu'aurie kaniwarutahiawe yuhetsia miemete teyi'ikitiwamete, watsata kaniwaranuyeteixi tamamata heimana yuhutame, ni'ariekate katiniwaruteriwa miki:

¹⁴ Tsimuni ('arike Pekuru mititeriwaxi), 'Atirexi Tsimuni 'iwaya, Kakuwu, Wani, Piripe, Wariturume,

¹⁵ Mateu, Tumaxi, Kakuwu 'Aripeu nu'aya, Tsimuni tserutitsita mititewakai,

¹⁶ Kura Kakuwu nu'aya, Kura 'Itsikariutitanaka 'arikeke miyetua.

Ketsutsi kemitiwaruparewi yumireme
(Ruk 6:20-23 - Mat 5:3-12)

¹⁷ Hiki wahamatia 'ukateka, makuweritsie kaniwakeni. Yumireti hetsiana miemete teyi'ikitiwamete, meta yumireti teiteri naitsarie Kureyatsie Kerutsaremetsie memeyeki, hipati haramara tetsita memeyeki Tiru 'aurie Tsiruni 'aurie,

¹⁸ mana mekaniu'axiakaitini memi'enieniki, 'aixia metehau'erieti memayeitiarieniki kwiniya

kememitehexeiyakai. Miki kakaiyarixi 'ax-
amemi'anene memiwanikai 'aixia meteheu'erieti
mepayeitiarie,

19 teiteri yunaiti mekanimayiakukaitini
tirikariya hetsiena mayeneikakaiki yunaime
'aixia meteheu'eriekame muwarayeitiwakai.

20 Merikitsi yuhetsia miemete teyi'ikitiwamete
waxeiyati mipai kaniutayini:

«'Aixia xekani'itiarieka xeme tixaiti
xemikatehexeiya,

Kakaiyari xekanexeiyani tixe'aitiwametime.

21 'Aixia xekani'itiarieka xeme hiki xemeuhakak-
wiku,
xekanitihuxaikuni.

'Aixia xekani'itiarieka xeme hiki xemutitsuana,
xekaniutinawekuni.

22 'Aixia xekani'itiarieka xeme kepauka teiteri
memixe'uxiwe'erie,
kepauka memikaxenaki'erie yuhetsia,
kepauka 'axamemutiyuane xehepaitsita,
kepauka memixexani'erie 'axaxemi'anene
me'utiyuati,

Yuri Tewi hetsie xemitewiyaki.

23 »Xekeneyutemamawieka waikawa 'iya
tukaritsie, xeketeneuye'ani, waikawa taheima
mieme xekana'iwakuni. Wa'ukiyarima yaxeikia
mepiwaruyuri Kakaiyari niukametemama.

24 »Matsi xia'ui, xeme xemixikutsixi,
'ariri yunaki'eriya xekanaye'atiani.

25 Xia'ui xeme hiki xemihuxa,
xepeuhakakwikuni.

Xia'ui xeme hiki xemutinawe,
xepiyuhiwerieka xeputitsuanani.

26 Xia'ui xeme kepauka yunaiti teiteri witsimemu-tiyuane xehepaitsita.

Xe'ukiyarima yaxeikia mepiwaruyuri
Kakaiyari niukametemama
memite'itawakai.

*Kemireuyewetse memitatsi'aye'unie
wahepaitsita*

(Ruk 6:29-30 - Mat 5:39-42)

27 »Matsi mipai nepitixekihawe xeme xemi'enana; Xekeniwanaki'erieka miki memixe'aye'unie, 'aixia xekeniwayurieka miki memixe'uxiwe'erie,

28 miki 'axamemutiyuane xehepaitsita wahepaitsita 'aixia xekeneutiyuaneni xeme, xekeneyunenewieka miki memixetsewixima wahetsiemieme.

29 Kemi'ane 'a'aurita mimatsiheutiwani, ta'aurie kenawetsi tapata mimatsiheutiwaniki. Kemi'ane mimatsinawairieni 'a'ikari, pepika'ikweririeka 'akamixata mimatsinawairieniki.

30 Kemi'ane tixaïti mimatiutawawiri, ketineupitia, kemi'ane 'apini mimatinawairieni, pepika'iwiyani.

31 Kemitixenake, teiteri yamemixeyurieniki xeme, kemitixenake xeme, miki kanixe'iniairitikamiki, yaxemiwayurieniki hipame meri.

32 »Xikate xewanaki'erieka miki memixenaki'erie, titaki 'aixia xetekuxaxatsi-wani? 'Axateyuruwamete mekaniwanaki'erieka miki memiwanaki'erie.

33 Xikata 'aixia xewayurieka miki 'aixia memixeyurie, ¿titaki 'aixia xetekuxaxatsiwani? 'Axateyuruwametetiti mipai mepiteyurie.

34 Xikata xetewaniitiaka miki kemi'ane memite'ayukatuawawe xeikia, ¿titaki 'aixia xetekuxaxatsiwani? 'Axateyuruwameteta mepiteyuniitia tawari memite'apiniyariekaki.

35 Matsitsi xekeniwanaki'erieka miki memixe'aye'unie, 'aixia xeketeneeyurieka, xeketeneeyuniitiaka 'atsixekateyu'iyaritiati. Mipai xeteyurieti kwini mieme xekatena'iwakuni, kemi'ane taheima makawe niwemama xekanihikitikakuni, miki 'aixia pitiuka'iyari miki pamipariyutsi memikateyupitiwa wahetsiemieme, miki 'axamemiteyurie wahetsiemieme meta.

36 Xeketeneyukanenimayaka, xe'ukiyari kemitiyukanenimaya.

Hipame wahetsie xepikate'ahipani

(Ruk 6:37-42 - Mat 7:1-5)

37 »Hipame wahetsie xika xekate'ahipani, xehetsieta pikarahiiwani. Xika xekateyuxanetani, xemeta xepikaxanetsieka. Xika xekawaranu-taxiriwani, xemeta xepika'anutaxiriyani. Xika xetewareuyehiwirieka, xemeta xepiteheuyehiwayarieni.

38 Xika xetewarini, xemeta xepitemikieni: 'Aixia ti'iniatsiekame 'anukapinariiekame, 'anutakatsiekame, 'anakaxiriweme xepimikieni. Karikitsi hipame kexemitewaru'iniatsiri mipaita xeme xepite'iniatsiyarieni».

39 Merikitsi 'iki 'ixatsi hepaita sita tikuxatati katiwaruta'ikitiani mipai 'utaiti: «¿Makipe ketiyiwe

menuhana xeime makipe? ¿Yuhutati mewatix-awatsie mekateheukaxirieni?

⁴⁰ Tiyi'ikitawame pikawe'eme keyuri ti'ikitame, peru 'aye'atarieme kemi'ane miti'ikitia hepai timaiweti kanayeimiki.

⁴¹ »¿Titayari petixeiya xatsi 'a'iwa hixita meutawiwi, pekahe'eriwati keuruwi 'ahixita meutawe?

⁴² ¿Kepaititi petiyiwe mipai pemititahiaweki 'a'iwa: “Neuxei ne'iwa, nepiwaye'itieni xatsi 'ahixita meutawiwi”, peka'ixeyati keuruwi 'ahixita meutawe? Yakitsi peputaine xeikia. Keniwaye'iti meri miki keuruwi 'ahixita meutawe, 'ana 'aixia 'anemeki peheuniereti pekanayeimiki pemiwaye'itirieniki xatsi 'a'iwa hixita meutawiwi.

Kiye kemitimatsiki yu'ikwaxiki

(Ruk 6:43-44 - Mat 7:16, 18, 20)

⁴³ »Nixewiti kiyexi 'aixia mi'anene 'ikwaxi 'axa'ananeme pikakaxuawitiwa, miki meta kiye 'axami'ane 'ikwaxi 'aixia 'ananeme pikakaxuawitiwa.

⁴⁴ Xexuiti kiye yu'ikwaxiki kanimatsiikini. Xuyatsie pikaka'iniwa piní takari, witsaxatsie pikaka'iniwa kaxie.

⁴⁵ Tewi 'iti'utame tita 'aixia miti'ane yu'iyaritsie, niwayehanimiki tita 'aixia miti'ane, tewi 'axamitiyuriene pita 'iti'utame tita 'axamiti'ane, niwayehanimiki tita 'axamiti'ane. Kariki tita yu'iyaritsie mitihiniyani, mipai katinikuxatamiki.

Tsimiyenitu 'aixia mi'ane 'axami'ane

(Ruk 6:47-49 - Mat 7:24-27)

⁴⁶ »¿Titayarikuta xeme: “Ti'aitame, Ti'aitame 'aku”, xenetekihawe, 'atsixekateyurieti kenemitixekihawe?

⁴⁷ Yunaiti nehetsia memi'axe, neniuki memi'enie yametakahuti, kememi'anene nepitixetaxatiani:

⁴⁸ Tewi kii mutawewi hepai kani'aneni, heukatewame wati'ineka, tetetsiepai netiwewieni tsimiyenituyari. 'Ana haa kaniwayeneni, kitsie kaniukexiani, peru kaniuyutatexieni 'iwatayuitianike, 'aixia 'anemeki miwewiyakaiki pikawatayua.

⁴⁹ Perutsi kemi'ane minetsi'enie yakatikamiet, miki xewiti tewi kii mutawewi hepai kani'aneni, kwiepa 'akaime kaniutawewieni xeikia, tenariyari pika'utawewi. 'Ana hetsiena kaniukexiani haa, xeimieme nekaina, karima kaniukaweni kii».

7

Xeitsienituyari kuyaxi miwani'a
keyurimiti'eriekai

(Ruk 7:1-10 - Mat 8:5-13)

¹ Hiki 'inika 'iki niuki naime teiteri me'i'enieku, Kaperunaume kaneyani.

² Merikitsi kuya mana kaniuyeikakaitini xeitsienituyari kuyaxi miwani'a, ti'uximayatame kanexeiyakaitini minaki'eriekai, miki katinekekuyekaitini kanemiximekaitini.

³ Hiki kuya, 'u'enaka Ketsutsi hepaitsita, kaniwareni'ani huriyutsixi teiteriyari wa'ukiyarima memeita'inieniki mamieki 'aixia reu'eriekame ti'uximayatame mayeitianiki.

⁴ Miki Ketsutsi hetsia me'u'axiaka kwini mieme mekateni'iniekaitini mipai me'utiyuati:

—'Aixia kaniyimiki pemeiparewieniki, hetsiena katininakeni:

⁵ Kataninaki'erieka tanaime tame, tuki katani-utawewirieni yikimana.

⁶ Hiki Ketsutsi wa'utima kaneyani. Yatewa 'umiekaku, kuya yuhamikuma kaniwarutani'ani mipai memite'itahiaweki:

—Ti'aitame pepikati'a'uxitiaka, ne 'aixia nepika'ane 'eki pematahaniki nekita.

⁷ Meta 'ayumieme matsi 'ahetsia nepikahetia nekimana, 'aixia neka'aneme nene'erieti 'ahetsia nemimieki. Peru 'eki xeiniukiyari xika yapehetayini, 'aixia pitika'erien ti'uximayatame.

⁸ Netsi nekatini'aitarieka nekuyatiti meta kuyaxi nepitiwa'aitiwame. Xika mipai netitahiawe xeime: “Kenemie”, miki piyemie, xeimeta xika mipai netitahiawe: “Kenaye'a”, miki 'akanayeimiki. Xika mipai netitahiawe nehetsia mieme ti'uximayatame: “Ipai ketineyurieneni”, mipai pitiyurieneni.

⁹ Hiki Ketsutsi 'i'enieka niukieya, kaniuhixiyani, ta'aurie 'aweka mipai katiniwarutahiawe teiteri memeweiyakai:

—Mipai nepitixekihawe, 'ixaheritsixi watsata 'iki hepai 'aneme nepikahetaxeyawe yuri ti'eriekame.

¹⁰ Hiki miki memeni'arie kepauka makunuaxia kitana me'u'axiaka, mekaneitaxeiya ti'uximayatame 'aixia reu'eriekame.

Ketsutsi wiura nu'aya kemiranukuketia

11 Merikitsi 'arike kaneyani kiekari Nahini mirakutewatsie paiti, hetsiana miemete teyi'ikitiwamete mekaniteitakaitini, hipatita teiteri yumireti.

12 Kiekari kitenie heutahaximekaku, miki kani-wayekweiyani, temaiki mumikai puyuxewikai xeikia maamaya piwiuratikai, kinaya meripaiti pukumawerekai. Kiekatari yumireti mekaniteitakaitini.

13 Hiki Ti'aitame 'ixeyati kanitinenimayata, mipai katinitahiawe:

—Pepika'utatsuakani.

14 Hiki mana 'uyaka miki kakunieya kaniu-mayiani. Miki kwekwewemete mekaniti'uni. Ketsutsi mipai kaniutayini:

—Temaiki 'aku, kenanukukexi nepaine.

15 Tewi mimikikai kananukuyerini kaniutiniutiyani, hiki Ketsutsi kaniyetuani maamaya hetsia.

16 Hiki yunaiti mekanitumamani, 'aixia mekanituyuanekaitini Kakaiyari hepaitsita mipai me'utiyuati:

—Kakaiyari niukameya mitirikaiye tatsata kan-inuani, Kakaiyari kaninuani kanitsutiani tatsi-parewieti yuteiterima.

17 Hiki kemitiuyuri kanikuxaxatsiwakaitini naitsarie Kureya kwieyaritsie meta 'auriena mamametikatsie.

*Ketsutsi meta Wani Ti'iyame hetsia miemete
(Ruk 7:18-35 - Mat 11:2-19)*

18 Merikitsi Wani hetsia miemete
teyi'ikitiwamete Wani mekateniutaxatiani

naime kemitiuyi hepaitsita. Hiki 'ana Wani waruta'inieka yuhutame yuhetsia miemete,

¹⁹ Ti'aitame hetsia kaniwareni'ani mipai memite'ita'iwawiyaki:

—ǂ'Eki petihiki kemi'ane 'umamieniekai, nutsu xeime 'akuxi tepitakwewieka?

²⁰ Hiki hetsiana me'u'axiaka miki, mipai mekatenitahiawe:

—Wani Ti'iyame 'ahetsia katanetani'ani mipai temimateta'iwawiyaki: “ǂ'Eki petihiki kemi'ane 'umamiekai, nutsu xeime 'akuxi tepitakwewieka?”

²¹ 'Ana mana kwitiwa Ketsutsi yuwaikawame 'aixia katiniwaruka'eritiani, miki kakaiyarixi 'axamemi'anene memiwarexeiyakai, hipame meta waikawa kwiniyaki memi'uximatiariekai, meta yuwaikawame memikaheunenieriekai kaniwaranutanieritiaxiani.

²² Hiki memeyeni'arie mipai katiniwarutahiawe:

—Xekenehu, xeketenetaxatia Wani tita xemite'uxei tita xemite'u'eni hepaitsita: Memikaheuneniere meheuneniereti kememite'akika, huriekate kememite'anuku'uwe, miki nawi kwiniyayari memexeiya me'itiyati kememite'akika, memikaheu'enana meheu'enanati kememite'akika, mikite kememite'anuku'uitiariwa, tixaiti memikatehexeiya niuki 'aixia manuyine kememitekuxaxatiariwa.

²³ Miki meta, 'aixia kani'itiarieka kemi'ane mikakunuani nekimana.

²⁴ Hiki Wani hetsia miemete mehekineku, Ketsutsi kanitsutiani tiwakuxaxatiwati teiteri Wani hepaitsita mipai 'utaiti: «ǂTita xetehekuxei

makumawetsie? ¿Haka 'ekaki 'uyuaneme xeteheku'ixiari? Tixai xiari.

²⁵ ¿Kamitsi tita xeteheku'ixiari? ¿Xiku 'ixuriki miyumeni manakatiki xetehekuxei? Nekatixaitsieti. Matsi miki witsimi'anene memanakatitika xikutsixi wahepai memiyia, miki te'aitamete wakiita mepayetei.

²⁶ Kamitsi, ¿tita yemeki xeteheku'ixiari? ¿Kakaiyari niukameya xeteheku'ixiari? Huu, mipai nepitixekihawe, Kakaiyari niukameya xepekuxei, yemeki Kakaiyari niukameya keyuri hipati.

²⁷ 'Iki kanihikitini 'utiarika mexaxata mipai 'utaiti:

»«Kam, ne neniuki tuayame nekananuni'amiki
'ahixie paiti,
mikuha'aritianiki 'ahuye pekanuawekaku
'akuxi”.

²⁸ Mipai nepixerahawe, 'akuxi pikatinuiwawe nixewiti Wani hepai timariweti, peru matsi tewi tixaiti mikatihiki Kakaiyari mira'aitatsie, Wani reuyeta katinimariweni».

²⁹ Mipai mete'u'enanaka, yunaiti teiteri, meta kuwiyexinu hetsiemieme tewawamete yunaiti Wani me'u'enieka mekatenihekiatakaitini Kakaiyari hepaitsita heitserie kemirexeiya, kepauka memuka'iyarie Wani hetsia.

³⁰ Peru paritseutsixi meta hipati 'iniari niukiyari memimate, miki mekanitixani'erieni Kakaiyari kemitiyurienikekai wahetsiemieme, Wani hetsia mepika'uka'iyarie.

³¹ «'Ayumieme nepaine, ¿Tita 'iniari netitaxata hiki miemete teiteri wahetsiemieme?

³² Tiiri wahepai mekani'aneneni kiekari hixiapa memititei mipai memite'uyuhiwiwa:

»“Tepixekirautawiyakai,
xemeta xepikate'ukanei.

Hiwerika kwikariyari teputakwikaxi,
xemeta xepika'utitsua”.

³³ Wani Ti'iyame kaninuani, paa kakwa'ati kaxie winuyari kaye'eti, xemeta mipai xeputiyuanekai: “Kakaiyari 'axami'ane kaninika”.

³⁴ Neta Yuri Tewi nehikititi nemunua netikwa'ati meta netiye'eti, mipaita xeputiyuane: “Iki tewi 'ikwaiki xeikia piyiane, winuki xeikia piyiane, piwahamiku miki kuwiyexinu hetsiemieme tewawamete meta 'axateyuruwamete”.

³⁵ Peru yunaiti yuriki memitemaiwawe kememiteyurie kanimatsiikini heitserie kemirexeiya Kakaiyari timaiweti».

'Ukaratsi 'axatiyuruwame Ketsutsi witsimu'ia kemitiukawiri

³⁶ Merikitsi xewiti paritseu kanita'inieni hetsiana mitikwaniki, paritseu kiita heutahaka mana kanayerini.

³⁷ Hiki 'uka mana mikiiekametikai mimariwakai 'axamitiyuruwametikai, tiutamarieka paritseu kiita kename Ketsutsi hayekatei, kaninuani tete puteyuyari 'ahanati witsimu'ia hineme.

³⁸ Ketateya 'aurie kaniutakeni 'utatsuati, 'ukaiya kanikaxiriwekaitini ketateyatsie kanitihawiyakaitini, meta yikipaki kanitiwatsixa, metatsiere kaniku'itsewekaitini ketateyatsie meta witsimu'ia kanitiwiriwakaitini.

³⁹ Hiki 'iya paritseu mita'ini mipai katiniiyikihawekaitini yu'iyaritsie: «Kari 'iki xika

yuriki Kakaiyari niukameyatini, pimaikakeyu 'iki
'uka mikumaiwa, kemitiyuriene pitimaikakeyu,
'axatiyuruwame kemitihiki».

⁴⁰ Hiki Ketsutsi mipai katinitahiawe:

—Tsimuni 'aku, 'etsiwa nepimatitaxatiani.

Miki mipai tita'ei:

—Tita 'aku, Ti'ikitame.

⁴¹ Ketsutsi mipai kaniutayini:

—Merikitsi heiwa kaneuyewekaitini
yuhutati memite'ipitianiki xeime, meripai
kemitiwaruniitia. Xewiti 'auxiwime tsienituyari
'iniariyari kani'itianihekaitini, xewitita huta
teuiyari heimana tamamata 'iniariyari
kani'itianihekaitini.

⁴² Tixaiti memikatehexeyakaiki
memite'ipitianiki, miki katiniwareuyehiwirieni
yuhutame. Merikite, keme'ane miki matsi
waikawa pinaki'erie tewi mitiwareuyehiwiri?

⁴³ Tsimuni mipai katinita'eiya:

—Xiari keme'ane matsi waikawameki
mireuyehiwiyarie, miki matsi waikawa
kaninaki'eriekamiki.

Ketsutsi mipai katinitahiawe:

—Heitseriemeki pepiti'akuhiawe.

⁴⁴ Hiki ta'aurie 'aweka, 'ukaratsi 'uxeiyaka,
mipai Tsimuni katiniutahiawe:

—kKeneuxeya 'iki 'ukaratsi? Ne 'ahetsia nen-
uaku 'akiita, 'eki haa pepikanetsi'uhanitia neke-
tate nemitihauxiniki, miki pita yu'ukaiki kani-
tihawiyatiani neketate, meta yikipateki kaniti-
watsiixa.

45 'Eki penetsitapati pepikanetsi'utawaritia, miki pita ne'atahaku hiki 'akuxi pikatihayewa netsiku'itseweti neketatetsie.

46 'Eki pepikanetsi'ukawiri nemu'utsie, miki pita witsimu'ia pinetsi'utiwiri neketatetsie.

47 'Ayumieme nepimatikihiawe, kemitiyukanaki'erie kanimatsiikini waikawa kemireuyehiwiyarie 'axatiuyurieka. Kemi'ane 'etsiwa xeikia mireuyehiwiyarie, miki 'etsiwa xeikia katiniyukanaki'erieka.

48 Hiki 'ukaratsi mipai katiniutahiawe:

—'Axakepemituyuri pepireuyehiwyarieri.

49 Hiki hipati 'auriena mematekai mipai yu'iyaritsie mekateniyikihiawekaitini: «¿Kemi'ane pihiki 'iki mitiwareuyehiwirrie 'axakememite'uyuri?»

50 Peru Ketsutsi 'ukaratsi mipai katiniutahiawe:

—Yuri pemituata'eriki peputawikweitsitiarie, 'a'iyaritsie peka'uximatarieti kenemie.

8

Ti'iwame niukiyari

(Ruk 8:4-15 - Mat 13:2-23, Mar 4:1-20)

¹ Merikitsi 'ariketa, Ketsutsi kanikuyeikakaitini kiekari 'emiyeuetsie meta 'etsimiyeuetsie, kanikuxatanekaitini niuki 'aixia manuyine, tiwakuxaxatiwati kemiti'ane Kakaiyari mira'aitatsie. Tamamata heimana yuhutati hamatiana mekanu'uwakaitini,

² hipatita 'ukari 'aixia metehue'erieti memayeitiarie kakaiyarixi 'axamemiteyurie mewaruniku, meta metekukuyekaku: xewiti miki Mariya Mararatanaka katinitewakaitini,

meripai muxinarie kakaiyarixi 'axamemi'anene
me'inikaku 'atahutati,

³ xewitita Wana katinitewakaitini Tsutsa
mi'iyayatikai, miki Tsutsa mihiritiariakai
Herurexi mitimikwaniki, xewitita Tsutsana,
hipatita yumireti, miki mekaniwaparewiekaitini
tita memiteheuxeiyakaiki.

⁴ Merikitsi yumireti teiteri hetsiana
mekaniyuxeiriekaitini, mireme kiekaritetsie
meheyekineka, hiki 'ixatsi hepaitsita tikuxatati
katiniwaruti'ikitiatiyani mipai 'utaiti:

⁵ «Ti'iwiwame kanayeyani 'imiari ka'iwienike.
Merikitsi 'imiari 'iwienekaku, hipati huye tet-
sita kaniukaxirieni, hiki kaniutiketsinarieni, meta
wikixi mekanikuxini.

⁶ Hipatita mutetexiyatsie kaniukaxirieni,
'utineka kaniutiwani mika'akuhawirekaiki.

⁷ Hipatita xuyatsata kaniukaxirieni, hamatiana
'utinexiaka xuya kanenukanani.

⁸ Hipatita kaniukaxirieni 'aixia miraku'anetsie,
'utineka kaniutixuawere xeitsienituyari
payeixia».

Mipai 'utayika karima mipai kaniutayini: «Xe-
witi neti mu'enaxi, ke'u'ena».

⁹ Hiki hetsiana miemete teyi'ikitiwamete
mekaniku'iwawiyakaitini keru haine miki 'ixatsi.

¹⁰ Mipai kaniutayini: «Xeme xekanipitariaka
xemimaikaki tita mitiuti'awietsiekai,
xemitemaikaki Kakaiyari mira'aitatsie timieme,
hipati pita 'ixatsiki xeikia mekanipitariaka,
»“para meheuneniereti memika'ixeyaki,
meheu'enanati, memika'i'enieniki”.

¹¹ »'Ixatsiki 'ipai katinimatsikini: 'Imiari,
Kakaiyari niukieya kanihikiti.

12 Huye tetsita miemete, miki mekanihikitini memi'enana, peru kwitiwa kani'axeni Kauyumarie, wa'iyaritsie kaninawani niuki kapa me'utawikweitsitarieniki yuri mete'uta'eriekaxiame.

13 Makutetexiyatsie miemete, miki mekanihikitini memitanaki'eri niuki meyutemamawieti me'u'enanaka, peru miki mepikahananatika. Yatewimeki yuri mekateni'erieka, peru kepauka memita'iniatsienitsie mekatenikuhayeikawani.

14 Xuyatsata mukaxiri, miki mekanihikitini memi'enana, peru 'iyaritariika, tuminiki, hiki mieme tukari naki'eriyayaki meyiati mekananukanaka, meta mepika'aye'axiani.

15 'Aixia miraku'anetsie miemete, miki mekanihikitini niukitsie memitewiya 'aixia 'iyariki meyuwairiyati me'u'enanaka. Miki mekaniutixuxuawereni mete'uka'eniwati.

Kixeme

16 »Kixeme 'utaiyame pika'iti'awieta, xarita pikaheikayeni, 'utatia pikaheitayeni, matsi wapaiti kaneitiyemiki, miki memiwatahaxiaxime hekariyaya memixeyaki.

17 Kariki naiti tita miti'awietsie katina-hekirimiki, meta naiti tita miti'awietsiekai katinitamariwamiki.

18 'Ayumieme, yemeki xekeneu'enana. Kemi'ane tixaiti mirexeiya, tawari matsi pitimikieni, kemi'ane mikarexeiya, tsepa 'etsiwa rexeiyame muyu'erie miki katininawai-yariemiki».

Ketsutsi 'iwamama meta warutsieya
(Ruk 8:19-21 - Mat 12:46-50, Mar 3:31-35)

¹⁹ Merikitsi maamaya meta 'iwamama mekaniu'axiani hetsiana, mekaniyutatex-ieni me'itahiaweke, teiteri yuwaikawati memayetekaiki.

²⁰ Hiki mipai katiniutahiawarieni:

—'Amaama meta 'a'iwama takwa mekaneti'uka mematsixeyakuti.

²¹ Peru miki mipai katiniwaruta'eiya:

—'Iki Kakaiyari niukieya memi'enie yamemitekahu, miki mekanihikitini nemaama meta ne'iwama.

Ketsutsi 'eka kemireunuitia
(Ruk 8:22-25 - Mat 8:23-27, Mar 4:36-41)

²² Merikitsi heiwa kanuwatsie kanikayerini, hetsiana miemete teyi'ikitiwamete wahamatia. Mipai katiniwarutahiawe:

—Harakuna 'anutaie tepanukine.

Hiki mekanayekine,

²³ hapa me'uhukaku Ketsutsi kaneukuni. Hiki 'eka kaniuyutawewieni tirikaiyeti wiyerimati harakuna hetsie, hiki kanuwatsie haa kani-tahinirimekaitini meta mekanikayunirimekaitini.

²⁴ Hiki mekanenutahitiani mipai me'utiyuati:

—Ti'ikitame, Ti'ikitame, tepikayunirime.

Ketsutsi 'anukukeka kanitatieni 'eka hamewari meta, hiki kaneunuani, kayuwati kaniutamare.

²⁵ Hiki mipai katiniwarutahiawe teyu'ikitiwamete:

—¿Keri yuri xete'erie?

Meheumamati mekanihixiyakaitini mipai meteyikihaweti: «¿Ketsi pipaiki 'iki, pitiwa'aitia

'eka meta hamewari haa, yamepitekahu kemaine?»

Kakaiyarixi kememite'iwiyakai katarenatanaka

(Ruk 8:26-39 - Mat 8:28-34, Mar 5:1-20)

²⁶ Hiki Katarenatsixi wakwieyaritsie mekaneta'axiani kanuwatsie meyeteti, Karereya 'anutaiyetsie.

²⁷ Heukakeximekaku kwiepa, tewi nenukunake mana mikiekametikai, kakaiyarixi 'axamemi'anene meminikai miixa. 'Ayumieme miki 'ixurikite pika'anakatikikai, kiita pika'ayekatei, matsi teukiyatsata kaniuyeikakaitini.

²⁸ Ketsutsi 'uxeiyaka, 'utahiwaka kanatiweni hetiana mipai tiuhiwati:

—¿Kepeneti'uximatia Ketsutsi, Kakaiyari taheima makawe peminu'aya? Nepimatsiwawirie kw-erieti, penikahirixia netsi'uximatiaka.

²⁹ Mipai kaniutayini miki, Ketsutsi mitita'aitiaki kakaiyari mika'itiya, mixinaki tewi. Miixa wiyari kaniwiyakaitini kakaiyari 'axami'ane, tewi nanutahiwakaitini tepiaki 'akuwieti yumamatsie yi'ikatsie, kanititekekaitini tepia karenayari meta kakaiyari 'axami'ane kaneiwitikikaitini makumawetsie paiti.

³⁰ Merikitsi Ketsutsi mipai katinita'iwawiya:

—¿Kepetitewa 'eki?

'Iya yumireti kakaiyarixi meminikaiki mipai kaniutayini:

—Xeiwaxayari nekatinitewaka.

³¹ Miki kwerieti waikawameki mekaniwawiriekaitini Ketsutsi mikawatani'aniki meukatewatsie memikayehuki.

³² Merikitsi mana hura yumireti tuixuri mekatenikwatiwekaitini yemuritia, mekanitawawirieni kakaiyarixi mipai mitiwapitiani memiwatiwiyaki tuixuri. Mipai yakatiniwarupitiani.

³³ Hiki kakaiyarixi 'axamemi'anene me'ixinaka tewi, mekaniwarutiwiya tuixuri, hiki tuixuri yunaiti mekaniutinautsa. 'Axa'anekia mekaneukanautsaxiani, harakunapa mekaneuxirieni.

³⁴ Hiki tuixuri wahiwemete me'uneniereka kemitiuyi mekaniyuta'unaxiani, kiekaritsie mekatenikuxatakaitini kiekari 'aurie meta,

³⁵ mana mekaneyekine me'ixeyake kemitiuyi. Ketsutsi hetsia me'u'axiaka tewi mekaniutaxeiya kakaiyarixi memixinaxi. 'Aixia reukemariti Ketsutsi hetia kaniukateitini heuyumarieti, hiki mekaniutimamani.

³⁶ Hiki memunenierixi mekateniwarutaxatiani kemitiutawikweitsitarie tewi kakaiyarixi meminikai.

³⁷ Hiki yunaiti Katarenatsixi wakwietsie memitamakai meyumireti mekanitawawirieni mana mayeyaniki, kwiniemieme memitemamakaiki. Ketsutsi kanuwatsie kayerika kaneyani yu'utima.

³⁸ Hiki 'iya tewi kakaiyarixi memixinaxi kanitawawirieni hamatiana mikuyeikaniki, matsi Ketsutsi kanitateutiani mipai katinitahiawe:

³⁹ —'Akie kenemie, mana ketiniwaretaxatia naime Kakaiyari kemimatsi'uyuri.

Kaneyani naitserie kiekaritsie tikuxatati kemitiutawikweitsitia Ketsutsi.

Kairu nu'aya meta 'uka Ketsutsi 'ikarieya mu-mayia

(Ruk 8:40-56 - Mat 9:18-26, Mar 5:22-43)

⁴⁰ Merikitsi Ketsutsi 'anutaïye heta'aku, yumïireti teiteri mekanitawairitiani me'ikwewieti.

⁴¹ Hiki tewi mana kaninuani Kairu titewati, tuki mihiritarie kanihikitikaitini. Ketsutsi hetia 'utihiximakeka wairiyarika kanitawawirieni kiena mimieki.

⁴² Xeime xeikia kanexeyakaitini yuniwe 'ukatime, tamamata heimana huta wiyari yakititi hikame, kanemiximekaitini.

Merikitsi 'ayeyaku yumïireti teiteri mekanit-saipinakaitini.

⁴³ Hiki mana kaniuyeikakaitini watsata, 'uka mitikuyekai tamamata heimana huta wiyari miyuriekai xuriyaya kaheunuawekaku, teyu'uayemawamete wahetsia yupiini katiniutixitiakaitini naime, nixewiti pikayiwekai menayehianiki.

⁴⁴ Miki 'ahurawa kaniuyani waritana 'uyemietu kanimayiani 'ikarieya putuniyaritsie, hiki ya-pauka kaneunuani xuriyaya.

⁴⁵ Hiki Ketsutsi mipai kaniutayini:

—¿Kepaiki pinetsi'umayia?

Yunaiti meyuku'imawakaku, mipai kaniutayini Pekuru:

—Ti'ikitame, yunaiti teiteri 'a'aurie mepiyukuxeiri mepimatsitsaipina, ¿kepai pinetsi'umayia peraine?

⁴⁶ Ketsutsi mipai kaniutayini:

—Xewiti pinetsi'umayia. Tirikariya nehetsie payene yanepiretima.

⁴⁷ Hiki 'uka yatimaiti 'awie mikayianekaiki, 'utayiyiakati kaninuani, hetiana 'atiweka yunaime teiteri wahiripa kanitaxatiani kemitimayia meta yapauka kemiranayehiia.

⁴⁸ Ketsutsi mipai katinitahiawe:

—Neniwe, yuri pemitierieki 'aixia pereu'eriet pepatia. 'Aiyaritsie peka'uximatiarieti kenemie.

⁴⁹ Merikitsi mipai 'utainekaku 'akuxi, xewiti tuki mihiritiariet kie meyetia mana kaninuani mipai titahiaweke tuki mihiritiariet:

—'Ari 'aniwe kanemini yemeki. Ti'ikitame pepikati'uxitiaka.

⁵⁰ Hiki Ketsutsi 'u'enaka mipai katinitahiawe:

—Pepikaheumaka, yuri ketineuta'eri xeikia, kanitawikweitsitariemiki.

⁵¹ Hiki Kepauka Ketsutsi Kairu kiita meutaha, hipame pikawarupitia hamatiana memeutahaxianiki miwayekateitsie, Pekuru, Wani meta Kakuwu xeikia, 'imari paapaya meta mamaya xeikia kaniwarupitiani.

⁵² Yunaiti mekaniutitsuanakaitini mekane'eriwakaitini meyuhiweriet. Ketsutsi mipai katiniwarutahiawe:

—Xepika'utitsuanani, pikamiki, matsi pukutsu.

⁵³ Hiki miki mekani'atsekaitini metemaiti yeme mimikikaiki.

⁵⁴ Peru miki mamayatsie kawiereka, mipai katinitahiawe:

—'Imari 'aku, kenanukukexi.

⁵⁵ Hiki 'iyarieya kaninuani, yapauka kananukukeni. Ketsutsi mipai katiniuta'aita mitimikieniki.

⁵⁶ Hiki 'ukiyarimama mekaniuhixiyani, peru Ketsutsi mipai katiniwarutahiawe, nixeime tima memikatehaxaxatiwaniki kemitiuyi hepaitsita.

9

*Tamamata heimana yuhutame
kemitiwareutani'axia teyi'ikitiwamete
(Ruk 9:3-5, 7-9 - Mat 10:9-15, 14:1-2, Mar 6:8-11, 14-16)*

¹ Merikitsi warukuxeiriekaka tamamata heimana yuhutame, tirikariya kaniwarupitiani meta heitserie memexeianiki kakaiyarixi 'axamemi'anene yunaima wahepaitsita meta kwiniyaki 'aixia meteheu'eriekame memiwarayeitiwaniki.

² Kaniwareutani'axiani memitekuxataniki kemiti'ane Kakaiyari mira'aitatsie, meta 'aixia meteheu'eriekame memiwarayeitiwaniki teiteri.

³ Mipai katiniwarutahiawe: «Tixai xepikatehetikini huyeta mieme: mumuxi, xerai, 'inia, tumini, huta kamixayari xepika'anakatikini meta.

⁴ Hakewa kiita xemeye'axiani, muwa xekeneyuhayewani 'atsita kepaukake xemiyehu.

⁵ Hakewa xemikahetanaki'eriwa, miki kiekarit-sie xe'ayekineme, tumuanari xekeneukatsixia yu'ikatetsie xemitewatahekiatiani mana kiekatari wahetsie kemirahiiwani».

⁶ Miki meheutayeixiaka kiekaritetsie mekaniku'uwakaitini metekuxatati 'aixia mete-heu'eriekame mewarayeitiwati tekwiwkikate naitсарie.

⁷ Hiki Herurexi mihiritiariakai miki kwieyaritsie miti'aitaniki, miki katiniutamarieni kemitiyurienekai Ketsutsi naime. 'Atsipikatimaikai kemitiyurienikekai hipati mipai memaitikateiki kename waniu Wani mikite watsata 'anukuketiarie,

⁸ hipatita kename 'Eriyaxi matsiikiti 'atia, hipatita kename xewiti 'anukuke meripai miemete Kakaïyari niukametemama.

⁹ Perutsi Herurexi mipai kanainekaitini: «Wani mu'uya nanutiwitekieni yanetiuta'aitaku ne. ¿Peru kepipaiki 'iki hepaitsitana miya 'anuyineme nemi'enie?» Nixeiyamikikaitini Ketsutsi.

'Auxiwime miriyari kemitiwarumi

(Ruk 9:10-17 - Mat 14:13-21, Mar 6:32-44, Wa 6:5-13)

¹⁰ Merikitsi ni'ariekate me'u'axiaka, Ketsutsi naime mekateniutaxatiani kememiteheyuri. Hiki miki warawititi kaneyani yihikiame kiekari Wetsaira mirakutewa 'aurie makumawetsie.

¹¹ Peru teiteri yamete'utamarieka mekanenukuweiya. Miki waranunakeka katiniwakuxaxatiwakaitini Kakaïyari kemiti'aita hepaitsita. Meta 'aixia metehue'eriekame kaniwarayeitiani kemi'ane memiteheuyehiakai.

¹² Hiki tau 'akayunirimekaku tamamata heimana yuhutati hetsiana meyukuxeirieka mipai mekatenitahiawe:

—Kenivarutateutiari teiteri, 'ahurawa memiyehuki kiekarite 'emiyeyeu 'etsimiyeyeutsie muwa memeyeheniki 'ikwai memekaxeiyaki, 'ena makumawetsie tekaniu'uwani.

¹³ 'Iya mipai katiniwarutahiawe:

—Xeme pita xeketeniwarumikwa.

Miki mipai mekaniutiyuani:

—Waikawa 'ikwai tepikahexeiya, paa 'auxiwime meta tsapari yuhutame xeikia, mexika hirixia 'ikwai tenanaiyuni 'iki teiteri yunaime wahet-siemieme.

¹⁴ 'Auxiwime miriyari yakititi mekaniyupaimekaitini 'ukitsi.

Peru Ketsutsi mipai katiniwarutahiawe yuhetsia miemete teyi'ikitiwamete:

—Yaxeketeniwarutahiawi memikuyaxixianiki huta tewiyari heimana tamamata meyu-papaimeti.

¹⁵ Miki mipai mekateniuyurieni, yunaime mepiwareukuyatsaxia.

¹⁶ Hiki 'enu'ika paa 'auxiwime meta tsapari yuhutame, taheima heutiniereti pamipariyutsi Kakaiyari kaniupitiani. Hiki 'ititarati kaniwata'itiwakaitini teyi'ikitiwamete memiwamikwaniki teiteri.

¹⁷ Yunaiti mekateniukwani mekaniutihuxani, tarimeyari kaniukuxeiriyani manuyuhayewaxi, tamamata heimana huta tsikiiwitiyari paimeiti kanayani.

Pekuru kemitiuyutahekiataxi Ketsutsi hetsie ti-wiyati

(Ruk 9:18-20, 22-27 - Mat 16:13-16, 21-28, Mar 8:27-29, 31-9:1)

¹⁸ Merikitsi Ketsutsi kaniyunenewiekaitini yuxaita, teyi'ikitiwamete mana me'u'uwakaku, mipai katiniwaruta'iwawiya:

—¿Teiteri kemetekuxata kemi'ane nepihiki ne?

¹⁹ Miki mipai mekatenita'eiya:

—Hipati mipai mekaniutyuaneni, kename Wani Ti'yame pehiki, hipatita kename 'Eriyaxi pehiki, hipatita kename xewiti Kakaiyari niukameya meripai miemete pehiki pamanukuke.

²⁰ Hiki mipaita katiniwaruta'iwawiya:

—¿Xemete kexe'utiyuane, kemi'ane nepiyiane ne?

Pekuru mipai katinita'eiya:

—Kirititsu Kakaiyari hetsia mieme.

²¹ Ketsutsi kwinimieme katiniwaruhiritiani, xeime memikatehaxaxatiwaniki 'iki hepaitsita.

²² Mipai kaniutayini:

—Kaneuyeweka 'akuxi ne Yuri Tewi kenemititewa waikawa nemitikwineki, ta'ukiyarima, mawari wewiwamete tewa'aitiwamete, meta 'iniariki memite'ikitamete mekanenitixani'eriekuni. Kaneuyeweka nemimierieni, meta nemanukukeni hairieka tukaritsie.

²³ Mipaita katiniwakuxaxatiwakaitini yunaime:

—Tewi xika yuwairiyani nehamatia muyeikaniki, ketihayewani kemitinake yuhetsiemieme tiyurieneti, keyuwairiyani tukariki tsepa kuruxitsie mumierie, nehetsie ketiwiyani.

²⁴ Kemi'ane yutukari miwikweitsitiamiki kanitatimaiyamiki, peru kemi'ane yutukari mitatimaiya nehetsiemieme, miki kanitawikweitsitiamiki.

²⁵ ¿Tewi naime kwiepa mitixuawe xika ra'iwake, tita ra'iwakeyu xika yutatimaiya meta xika yuka'una yuxaita?

²⁶ Kemi'ane minetsitewiya mitewiya neniuki, neta Yuri Tewi kenemititewa nepitewiyani 'iya kepauka nemunuani nemariweti, ne'ukiyari hepai witsine'aneti, niuki tuayamete memipatsie Kakaiyaritsie mieme wahamatia.

²⁷ Meta, yuriki mipai nepixerahiawe, hipati 'ena memu'uwa mepikakwini mexi mekanenieriwawe Kakaiyari kemiti'aita.

Yiki tiyuxexeiyati kemiratia

(Ruk 9:28-36 - Mat 17:1-8, Mar 9:2-8)

²⁸ Merikitsi 'inika 'iki niuki, 'atahaika tukari yakititi 'anukayaku, yemuritsie kanitiyune yutanenewienike, Pekuru, Wani, Kakuwu warawititi.

²⁹ Hiki yunenewiekaku yuhixie yiki tiyuxexeiyati kanayani, 'ixurikiteya tuxati xawawatiti kanayani.

³⁰ Hiki yuhutati 'ukitsi hamatiana mekate-niutixatatikine —Muitsexi meta 'Eriyaxi— mekanihikitikaitini.

³¹ Witsi meteyuxexeiyati Ketsutsi hepai mekatenikuxatakaitini kemitiyemieka, kemiraye'anikekai Kerutsareme hetsie.

³² Merikitsi Pekuru hipatita hamatiana memu'uwakai yunaiti mekanikutsukaitini, kwini mieme mekateneukutsikukaitini, me'anutaneniereka mekanixeiya witsi'aneme, 'ukitsi mekaniwaruxeiya yuhutame 'auriena meti'ukame.

³³ Miki Ketsutsi meku'eiriximekaku, Pekuru mipai katinitahiawe:

—Ti'ikitame 'aixia kani'aneni 'ena temu'uwaki. Hikimi haika xamaruyari tepitiwewieni, 'ahetsiemieme xeime, Muitsexi hetsiemieme xeime meta 'Eriyaxi hetsiemieme xeime.

Mipai kaniutayini 'atsikatimaiti kemainekai.

³⁴ Tikuxatakaku 'akuxi yapauka haiwitiri kani-waranukanani, mikiki mekaniutimamani.

³⁵ Hiki haiwitiritsata xewiti mipai kanetayini: «'Iki kanineniwetini, nemenayexei, xekene'enieka».

³⁶ Niuki heunuatiyaku, Ketsutsi yuxaita kani-uyuhayewa. Hiki miki 'atsimepika'utiyua, 'ana mitiyehane nixeime mepikatehaxaxatiwakai tita memite'uxei hepaitisita.

Ketsutsi kemirenayehia nunutsi kakaiyari 'axami'ane miwiyakai

(Ruk 9:37-42, 43-45 - Mat 17:14-18, 22-23, Mar 9:14-27, 30-32)

³⁷ Merikitsi 'uxa'arieka, kepauka yemuritsie memakanexia, yumireti teiteri mekaniwaranunake.

³⁸ Hiki xewiti tewi teiteri watsata 'uweti mipai katiniuhiwa:

—Ti'ikitame 'aku, kwerieti xia neniwe 'uki keneuxeiya, miki xeikia kanihikitini.

³⁹ Kakaiyari 'axami'ane pikuwiwiya, meta yapauka 'utahiwati payeika, metatsiere hau'erieti petihipa meta kwaimuxari 'uhewame payeitiwa. Kepauka mikuwiwiya haweri mieme pikuhayeikawa.

⁴⁰ Nekaniwarutawawirieni 'ahetsia miemete teyi'ikitiwamete memenuyeni'aniki peru mepuyutatexi.

⁴¹ Hiki Ketsutsi mipai kaniutayini:

—Xeme hiki xemimietete yuri xepikate'erie meta kemikatiheitserie xepiteyurie. ¿Kepaimexia peuyewetse 'akuxi xehamatia nemuyeikani meta nemixenewieka? 'Ena kenahani 'aniwe.

⁴² Kepauka temaiki hurawa mamiekai kakaiyari 'axami'ane kaniwiya, kanetihiani meta kanitayiyiakitsitiani karima. Peru Ketsutsi kakaiyari 'axami'ane kaniutatieni, temaiki 'aixia reu'erietu kanayani, meta 'ukiyarieya kaniyetuirieni.

⁴³ Yunaiti mekani'iyarixiekaitini Kakaiyari miya mititirikaiyekaiki.

Hiki yunaiti mehixiyakaku naime kemitiyurieneaiki, mipai katiniwarutahiawe yuhetsia miemete tey'ikitwamete:

⁴⁴ —Xeme 'iki niuki yemek xekeneu'eni: Yuri Tewi kenemitihiki nekaniyetuiyamiki teiteri wahetsia.

⁴⁵ Miki mepikaheitimaiwawekai 'iki niuki. Wahetsiemieme ni'awiekaitini, ya'ayumieme yamepikatehetimaiwawekai, memamati mepikayuwairiyakai memita'iwawiyakekai 'iki niuki hepaitsita.

Kemi'ane miwe'eme

(Ruk 9:46-50 - Mat 18:1-5, Mar 9:33-40)

⁴⁶ Merikitsi teyu'ikitwamete niuki mekaniutixiatatikine, kemi'ane miki matsi waikawa meuyewetse mayanikekai.

⁴⁷ Ketsutsi timaiti kememiteyikihawekai yu'iyaritsie, nunutsi 'ahanaka yu'aurie kanitakeni.

⁴⁸ Mipai katiniwarutahiawe:

—Kemi'ane mitanaki'erieni 'iki nunutsi nehetsia mimiemeke, mikita ne pinetsitanaki'erieni, meta kemi'ane minetsitanaki'erieni, kemi'ane minetsiheyeni'a kanitanaki'erimikita. Kemi'ane yunaime xetsata matsi waikawa tixai mikatihiki, miki matsi kanimariweni.

⁴⁹ Hiki Wani mipai katinitahiawe:

—Ti'ikitame, xeime tepuxei 'ahetsia waniu miemetiti mitiwa'aitiakai kakaiyarixi 'axamemi'anene memiwaxinaki teiteri, peru tekanita'imaiya 'ahetsie mikatiwiyaiki tahepai.

⁵⁰ Ketsutsi mipai katinitahiawe:

—Xepikahe'imaiyani, xika katatsi'aye'unieka kataniparewieka.

Tsamariyatari Ketsutsi kememikate'utanaki'eri

⁵¹ Merikitsi tukari 'aye'aximekaku manuti-witikieniki, 'ana Ketsutsi kaneyani Kerutsareme kayukunuitianiati.

⁵² Niuki tuayamete kaniwaranukuhaitsiya, miki mana me'uyehuti Tsamariyatari wakiekar-itsie mekanu'axiani tixaiti memitekuha'aritaniki hetsiena mieme,

⁵³ kiekatari mepikaheitanaki'eri yemeki, Kerutsareme tamietu miyianekaiki.

⁵⁴ Teyi'ikitiwamete Kakuwu, Wani matia mete'utamarioka mipai mekatentahiawe:

—Ti'aitame, kamatinake temitanianiki 'Eriyaxi kemitiuyuri, tai taheima makaneniki miki miwatitaiyaki?

⁵⁵ Peru Ketsutsi ta'aurie 'aweka kaniwarutaitieni.*

⁵⁶ Hiki xeime kiekaritsie pita mekanekine.

Kemiraye'axe Ketsutsi hetsie mitiwiyani

(Ruk 9:57-60 - Mat 8:19-22)

⁵⁷ Merikitsi huyeta me'uyehukaku, xewiti mipai katinitahiawe:

—Ti'aitame, 'ahetsie nekatiniwiyamiki, hakewa pememie, neta nekanimieni.

⁵⁸ Hiki Ketsutsi mipai katinitahiawe:

—Kauxaitsi yuteri mekanexeiya meta wikixi taheima miemete yu'itua metehexeiya, perutsi ne Yuri Tewi netitewati tixai nepikarexeiya hakewa neminetamuritaritiani.

⁵⁹ Hiki xeimeta mipai katiniutahiawe:

—Nehetsie ketinewiyani.

Mikita mipai katinitahiawe:

—Keneneupitia meri nemiyemieki, ne'ukiyari nemikateukuki hemiyuke.

⁶⁰ Ketsutsi mipai katinita'eiya:

—Mikite keniwaruhayewa miki pita memiwakateukuki yuhetsia miemete mikite, 'eki pitatsi kenemie, ketinekuxatani kemiti'ane Kaka'yari ti'aitametikaku.

⁶¹ Hiki xewitita mipai katinitahiawe:

—'Ahetsie nekatiniwiyamiki Ti'aitame, keneneupitia xeikia ne'iwama nemiwatateutianiki meri.

⁶² Ketsutsi mipai katinitahiawe:

* **9:55 9:55** RV60 meta hipati mepenaniitia —*¿Kari xeme 'at-sixepikatemate kemi'ane 'iyaritsie xemitewiya? Yuri Tewi netitewati, kenemitinua, teiteri wa'iyari neheuyexirienike nepikanua, matsi newatawikweitsitiani pita nekaninuani.*

—'Ikumayame hararu, xika yu'utima 'ukuniere, 'aixia pikayini, Kakaiyari yaki xeikia kanexeiyakamiki ti'aitiwametime.

10

Kemitiwarutani'a haika tewiyari heimana tamamata heimana huta

(Ruk 10:4-15, 21-24 - Ruk 9:3-5, Mat 11:21-23, 25-27, 13:16-17)

¹ Merikitsi 'arike Ti'aitame hipameta waruhiritiaka haika tewiyari heimana tamamata heimana huta meyupaimeme, yuhutatame kaniwareutani'axiani memanukuhaititiani naima kiekaritsie naima kiepa hakewa miki meta'anikekai.

² Mipai katiniwarutahiawe: «'Itsanari piwaikawa, peru 'itsanamete mepikayumiire. 'Ayumieme xekeneutawawiri 'itsanari kutsiyari, 'itsanamete miwatani'aniki yu'itsanarita.

³ Xekenehu xeme. Kami kenemitixetani'axiani, muxatsi tirixi wahepai xekaniyiakakuni 'irawetsixi watsata xe'u'uwati.

⁴ Tumini maname xepikahehuruwani, kitsiuri, kakai, huyeta xeime xepikawairitiaka.

⁵ »Hakewa xeme'axiani kiita, mipai meri xekeneutiyuaneni: “Uwa kiekatari 'aixia xeketexeyarieka”.

⁶ Xika mana 'ukani kemi'ane miyuwairiya 'aixia mitixeyarieniki, hetsiena tinaketi kanayeimiki xewairitsika, mexika mipai 'aneti ka'ukani, xewairitsika kaninuamiki xehetsie.

7 Mana miki kiita xekeneyuhayewani xetek-wati xete'ietitita memitexemikwani, ti'iwame het-sie katininakeni 'iwarikaya. Xepikayupatatitweni hipame wakiita.

8 »Hakewa kiekaritsie xeme'axiani, hakewa memixetanaki'erieni, xeketenekwaka tita xemitemikieka.

9 'Aixia metehue'eriekame xekeniwarayeitia tekwiwikate mana miemete, mipai xeketeni-wakuxaxatitwani: "Hikixixia kanaye'aniri, Kakaiyari kanitsutiani 'ena ti'aitati".

10 Peru, kepauka xeime kiekaritsie xeheutahaxiayu xemikahetanaki'eriwa, memayukuxexeriwatsie xe'axiame mipai xekeneutiyua:

11 "Atsita tumuanari xekiekaritsie mieme mitatsikwiema ta'ikatetsie, tepeikatsixiani texehekiatitati. Tsepaneti xemikatatsi'utanaki'eri, 'ipai xeketenemaika, tukari maye'aki Kakaiyari mitsutiaki ti'aitati".

12 'Ipai nepixerahiawe, tukari 'aye'ayu 'etsiwa xeikia mekatenikwinitiariekuni Tsuruma kiekatari, miki kiekari waikawa matsi mekatenikwinitiariekuni».

13 Mipai kaniutayini: «Xia'ui, Kuratsini kiekatari. Xia'ui Wetsaira kiekatari. Tirutsie meta Tsirunitsie xika mariwemekituyinike kemitiuyi xehetsia, mana kiekatari meripaitiri mepite'uhayewake kememiteyuriekai, waikawa yemeki mepiyuheiweriekakeyu maixa me'anakatiti heiwerika 'iniariyari, naxi meyukawiriwati.

14 Peru kepauka 'itsikame muwatahiawe Tiru meta Tsiruni kiekatari 'etsiwa xeikia

mekatenikwinitiariekuni, xeme waikawa matsi xekatenikwinitiariekuni.

¹⁵ Xemeta Kaperunaumetari, ¿muyuawitsie paiti xe'anuwitikienike xeteyu'erie? Hawaiki, mikite wahetsia xepeukaxiriyani pita.

¹⁶ »Kemi'ane mixe'enie, ne pinetsi'enie, kemi'ane mixexani'erie, ne pinetsixani'erie, kemi'ane ne minetsixani'erie, kemi'ane minetsiheyeni'a pixani'erie».

¹⁷ Merikitsi haika tewiyari heimana tamamata heimana huta kepauka memakunuaxia, mipai mekaniutiyuani meyutemamawieti:

—Ti'aitame 'aku, 'atsita kakaiyarixi 'axamemi'anene yamepitekahu ketemitewa'aitia 'ahetsia temimiemeteki.

¹⁸ Mipai katiniwarutahiawe miki:

—Netsi nekanixeiya Kauyumarie muyuawitsie 'anakahiyaku merikariya hepai.

¹⁹ Neuxei, heitserie nekanixe'upitiani kuterixi terikaxi xemiwatiketsinaniki, 'iya mitatsi'aye'unie tirikariyaya naime xema'iwaki heitserie nekanixe'upitiani, tixaiti 'atsipikatixeyurieni.

²⁰ Mikiki xepikayutemamawieka, kakaiyarixi yamemitakahuki kexemitewa'aitia xeikia, matsi xekeneyutemamawieka xemaka'utiarieki taheima kexemitetetewa.

²¹ Merikitsi 'ana Ketsutsi kaniyutemaw-iekaitini 'Iyari Mitiyupata yatipitiakaku, mipai kaniutayini: «Ne'ukiyari, taheima pemitiaita meta kwiepa, pamipariyutsi nepimatsipitia, pemituati'awietaxiki 'iki naime memikaheitimaniki miki memiteyi'ikitiawawe meta memitemaiwawe, tiri pita wahetsiemieme

matsiikime pemayeitiaki. Huu, ne'ukiyari, pepi'awairiyakai mipai pemitiyurieneni.

²² »Ne'ukiyari naime netiniyetuirieni. Xewiti 'atsipikatimate kemipaiki Nu'aya, 'ukiyarieya xeikia mipai katinimaika, xewiti 'atsipikatimate kemipaiki 'ukiyarieya, nu'aya xeikia mipai katinimaika, meta nu'aya xika yuwairiyani mixeitsitianiki xeime, mikita mipai katinimaikamiki».

²³ Hiki ta'aurie 'aweka mipai katiniwaru-tahiawe teyi'ikitiwamete yihikiate metitekaku: «Miki memunenierixi kexemite'unenierixi xeme, 'aixia mekani'itiarieka miki.

²⁴ Mipai nepitixekihawe, yumiireti Kakaiyari niukametemama meta te'aitamete, mepixeyakukai tita xemite'uxei xeme, peru mepika'ixei, mepi'eniekukai tita xemite'u'eni, peru mepika'i'eni».

Tsamariyatanaka 'aixia mitiuka'iyari

(Ruk 10:25-28 - Mat 22:34-40, Mar 12:28-31)

²⁵ Merikitsi xewiti 'iniariki miti'ikitametikai kananukukeni 'i'iniatamiti, mipai kaniutayini:

—Ti'ikitame, Ɂtita reuyewetse kenetiyurieni, nehetsie mitinakeki tukari mikaxiwe?

²⁶ Ketsutsi mipai rehiawe:

—Ɂ'Iniari niukiyaritsie kere'uxa?
ɁKepetikuteriwa?

²⁷ Miki mipai katinitahiawe:

—“Pekaninaki'eriekamiki Ti'aitame mi'akakaiyari naime 'aiyariki, naime kepemiti'amateki, naime 'atirikariyaki, meta naime 'a'eriwameki”, metatsiere: “ahepai tewi kenenaki'erieka 'eki kepemiti'anaki'erie”.

28 Ketsutsi mipai katinita'eiya:

—Heitseriemeki peputa'a. Mipai xika petiyurieneni, pekanayeyurikamiki.

29 Peru miki heitseriemeki yatikamiekame yuhekiatamiti mipai Ketsutsi katiniutahiawe:

—¿Merikite, kepi paiki nehepai tewi?

30 Hiki 'ita'eiyaka, Ketsutsi mipai kaniutayini:

—Heiwa tewi Kerutsareme heyeyaka Keriku neukamiekaitini, merikitsi tenawayamete mekannenukunake. Me'itikemaripieka me'ikuwaxiaka mekanekine miximeme me'uku'eirieka.

31 Merikite 'atsikatimaiti kemitiuyi mana neukamiekaitini mawari wewiwame miki huyeta, 'ixeyaka mana kaniuyeyani yatewa.

32 Yaxeikiata Rewi nuiwarieyatsie mieme xewiti tukita mitiparewiwametikai mana kaniuyeyani yatewa kaniuyeyani.

33 Perutsi xewiti tsamariyatanakatiti mana 'uyemieti hetsiana kaninuani, 'ixeyaka kanitinenimayata.

34 'Ahurawa 'uyaka 'ixuriki kaneiwerieni xuriya maneikakaitsie, hatseitiki winuki 'i'uayemaka, 'enuti'ikataka yupuxutsie metsuni paiti kani'atiani, mana kani'iwiyakaitini.

35 Hiki 'uxa'arieka xeitewiyari 'iniariyari wati'ika kani'itiani metsuni kutsiyari mipai tikihiaweti: “Kene'iwiyani, hetsiena mieme xika tixaiti petinanaimeki, xika 'akuxi heuyeweka, nepitinetuani kepauka nemayeneni”.

36 Hiki Ketsutsi mipai mi'iniatanekai katiniutahiawe:

—¿Merikite kepetiku'eriwa, 'iki yuhaikati kemi'ane yuhepai tewi hepai pitixei, tenawayamete memenukunakixi miki tewi?

³⁷ Miki mipai katinita'eiya:

—Kemi'ane mitinenimayataxi, miki pihikitikai.

Hiki Ketsutsi mipai katinitahiawe:

—'Ekitari kenemie, hepaia ketineyurieneni.

Ketsutsi kemireku'iwataxi Marita meta Mariya wahetsia

³⁸ Merikitsi mana mekanuu'uwakaitini, hiki Ketsutsi xeime kiekaritsie kaneutahani, mana 'uka Marita titewati kanita'inieni yukiita.

³⁹ Yu'iwa 'ukatime pexeyakai Mariya titewakame, miki Ketsutsi hetia 'ukaiti kani'eniekaitini niukieya.

⁴⁰ Merikitsi Marita piyuxamuriekai waikawa tikumaiwati mitiwaminiki. Mana 'utakeka mipai kaniutayini:

—Ti'aitame, ¿yapekara'eriwa ne'iwa nexaita minetsi'uku'eiriki nemitixeminiki? Yaketineutahiawi pinetsiparewieni.

⁴¹ Ketsutsi mipai katinitahiawe:

—Neuxei Marita, tiwaikawameki pepiti'a'iyaritia pepi'amuina,

⁴² tixewiti xeikia peuyewetse. Mariya kanenuyexeiya tita matsi 'aixia miti'ane, pikanawaiyarieni.

11

*Nenewieri hepaitsita kemiti'ikitakai Ketsutsi
(Ruk 11:2-4, 9-13 - Mat 6:9-13, 7:7-11)*

¹ Merikitsi heiwa 'aniukateitini yunenewieti. Yunenewieri 'uniku, hetsiana miemete teyi'ikitiwamete xewiti mipai katinitahiawe:

—Ti'aitame, ketatine'ikitiaka temitanenewiekaki, Wani kemitiwaru'ikitia yuhetsia miemete teyi'ikitiwamete.

² Miki mipai katiniwarutahiawe:

—Kepauka xemiynunenewie 'ipai xekeneutiyu-neni:

»“Ta'ukiyari taheima pemakawe, kepemititewa patsieti kehayeitiariwani.

'Enata keneutsutia peti'aitati.

Kwiepa yameketeyurieka kemimatinake, taheima kememiteyurie.*

³ 'Ikwai tukariki ketemiteheiyehiwa, tukariki yaketatinemikwani.

⁴ 'Axaketemite'uyuri ketatineuyehiwiriekaku tameta temitewareuyehiwiriekaku miki 'axamemitatsiyurie yunaime.

Pepikatatsipitiaka temita'iniatsieniki”.†

⁵ »Mipaita katiniwarutahiawe: Xika xewiti xeme yuhamiku hexeyani, miki xika hetsiana nuani tikari hixiapa mipai xika titahiawe: “Nehamiku 'aku, haika payari keneneuniitia,

⁶ neuxei xewiti nehamiku nehetsia kanenuani tewa hanuyaka, tixaiti nekarexeiyakaku, tita netimini”.

⁷ Kiita mayeka xika mipai tita'eiya: “Ketinehayewa. Kitenie pĩreuname, netiriyama

* **11:2 11:2** Kiriyeakutsie paine Ta'ukiyari, kepemititewa patsieti kehayeitiariwani. 'Enata keneutsutia peti'aitati. † **11:4 11:4** RV60 meta hipati mepenaniitia matsi ketaneutawikweitsitia 'ax-atemika'itiarieniki.

tanaiti tepuhe, nepikayiwe nemanukukeni nemimatiniitiani".

⁸ Mipai nepitixekihawe, kanihamikuyatini, peru miki 'ayumiemeyariki xeikia pika'anukukeni pika'iniitiani, 'iya mikatihayewaki matsi tiwawiriet i'ayumieme naime pitiniitiani tita mireuyehiwa.

⁹ »'Ayumieme nepitixekihawe ne: Xika xe'ita'iwauni xekatehayewati xekanimikiekuni, xika xe'ikuwauni xepitaxeiya, 'itupari xika xe'uyuitiani xepiteheuyepiyarieni.

¹⁰ Yunaiti memita'iwau, mepiyetuiriyariwa yu'iwaurika, yunaiti memikuwautiwe, mepitaxeiya yunaiti, 'itupari memikuyuitiwa, mepiteheuyepiyariwa.

¹¹ »¿Kemi'ane xeme yuniwe‡ tsapa ha'iwawakaku, kuu pimiwe pita?

¹² Yatini tawari ha'iwawakaku, ¿kemi'ane terika pimiwe pita?

¹³ Xika xeme 'axaxeteyuruwametetiti 'aixia ti'aneme xetewamikwani yitiriyama, matsi xe'ukiyari taheima makawe matsi yemeki 'Iyari Mitiyupata taheima mimieme kaniwamimiki miki memitawawiri».

Kememutiyanekai Ketsutsi kename kakaiyari 'axami'ane 'inikai

(Ruk 11:14-15, 17-22, 24-26 - Mat 12:22, 24-29, 43-45, Mar 3:23-27)

¹⁴ Merikitsi Ketsutsi kaneyeni'ani kakaiyari 'axami'ane tewi mixinaki kaniuweme kanayetiakaitini. Hiki kakaiyari 'axami'ane

‡ **11:11 11:11** RV60 meta hipati mepenaniitia paa ha'iwawakaku tete pituitiawe pita? Yatini.

'ayeyaku, tewi niuweti kanayani, hiki teiteri mekanihixiyakaitini.

15 Peru hipati miki mipai mekanutiuyani: «Miki kakaiyarixi 'axamemi'anene tiwa'aitiwame 'iparewiekaku kaniwarayeni'awani kakaiyarixi 'axamemi'anene».

16 Hipatita, me'i'iniatakuti 'iniari mekan-itawawirieni muyuawitsie mieme.

17 Miki wa'iyaritarika maiti mipai katiniwarutahiawe: «Xika kiekatari hixiata meyutsana, mana pakumawere, xeime kie kiekatari xika hixiata meyutsana mekanita'unikuni.

18 Kauyumarie xika hixiata yutsana, ¿kereuteriwe ti'aitametiti? Xemetsi xeputiuyane kename Weheritsewutsie netiwiyaṭi newaranuyeni'awa kakaiyarixi 'axamemi'anene.

19 Merikite, xika ne Weheritsewu hetsie xeniu netiwiyaṭi newarayeni'awani kakaiyarixi 'axamemi'anene, ¿xemeta xemitewa'ikitia kemi'anetsie metewiyaṭi mepiwaranuyeni'awa? 'Ayumieme miki xehetsie mepite'ahipani.

20 Mexika Kakaiyari tirikariyayaki pita newaranuyeni'awani kakaiyarixi 'axamemi'anene, Kakaiyari 'ari kanitsutiani ti'aitati xehetsia.

21 »Tewi mitirikaiye kuya tepiaya ma'i mexi 'i'wiya yukii, kayuwati puma piiniteya.

22 Kemi'ane matsi yemeki mitirikaiye nuame 'e'iwame, pinawairieni kuya tepiaya hetsiena yuri miti'eriekai, meta yu'iwama piwamini tepiateya.

23 »Kemi'ane nehetsie mikatiwiya, miki pinetsi'aye'unie, kemi'ane nehamatia mikatiukuxexeiriwa, miki pitaxiriwa.

24 »Kakaiyari 'axami'ane tewi hetsie 'ayeyame, makumawetsie pikuyeikani 'uxipiya kuwauneti. Yutexieneti mipai paineni: “Nepiyemie nekita nemiwayetiatsie”.

25 Nuame pitaxeiya waye'itiyakame 'aixia tiuye'aneme.

26 'Ana piyemie hipame piwata'inieni kakaiyarixi matsi kwini mieme 'axamemi'anene 'atahutame, meheutahaxiame, muwa me'ayeteti mepakine. 'Imatiriekaka miki tewi matsi yemeki 'axa'itiarieti payani, kemika'itiariekai matitari paiti».

27 Merikitsi mipai tikuxatakaku, 'uka teiteri wat-sata muyeikakai kaniutahiwa mipai 'utaiti:

—'Aixia ke'itiariekaka kemi'anetsie pemiyekatei, kemi'ane mimatsi'utsitsitia.

28 Ketsutsi mipai kaniutayini:

—Matsitsi pita, 'aixia meke'itiariekaka miki Kakaiyari niukieya memi'enie meta yamemitekahu.

Kemiti'inari Kunatsi

(Ruk 11:29-32 - Mat 12:39-42)

29 Hiki teiteri meyukuxerieximekaku mipai katiniutixatatiyani: «Hiki miemete teiteri 'axateyuruwamete mekanihikitini. Mekanikuwautiweni 'inari, peru 'inari mepikapitarieni, Kunatsi 'inariyea xeikia mekanipitariiekuni.

30 Kunatsi 'inari kemiratia Niniwetari wahetsiemieme, neta Yuri Tewi kenemititewa 'inari nekanayeimiki hiki miemete teiteri wahetsiemieme.

³¹ Metatsiere 'uka ti'aitame Tsawa mekatei, miki panukukeni titahekiatake hiki miemete teiteri wahepaitsita, wahetsie pirahiani 'ana, miki meyetiaki kwie manuniere paiti, mi'enieniki Tsarumuni kemitimaiwekai, matsi 'ena kaniuyeikani xewiti waikawa mariweti keyuri Tsarumuni.

³² Niniwe kiekatari mepanuku'uni metetahekiatake hiki miemete wahepaitsita, wahetsie pirahiiani, Niniwetari memite'uhayewaxiki kememiteyuriekai Kunatsi tiwarutaxatiaku, matsi 'ena kaniuyeikani xewiti waikawa mariweti keyuri Kunatsi.

Tawaiyari kixemeya

(Ruk 11:34-35 - Mat 6:22-23)

³³ »Kixeme 'utaiyame pika'iti'awieta, kakuniki pika'enukanani, matsi wapai pita pekayeni, teiteri me'atahaxiaximeti memixeyiaki hekiariyaya.

³⁴ Merikite, hixite tawaiyari kixemeya kanihikitini. Xika 'ahixi 'aixia reu'erieka, 'awaiyaritsie naiti pekanihekiariwiariyieka. Mexika 'axa'aneneni 'ahixite, 'awaiyaritsie naiti pekaniyiriyarieka.

³⁵ 'Ayumieme kene'akweriwayurieka, 'ahetsia mieme kixeme kapa 'uyireki.

³⁶ Xika 'awaiyaritsie pehekiariwiariyieka naimetsie, mitiyiwi xika tumaweni, naiti kanihekiakamiki, kixeme kemimatihekiariwiya xawatiti».

Ketsutsi kemitiwarutahiawixi paritseutsixi meta'iniriki te'ikitamete

³⁷ Merikitsi tikuxatati tiutahayewaku, paritseutiti kanita'inieni hetsiana mitikwaniki, muwa heutahaka mana kanayerini.

38 Peru paritseu 'ixeiya kaniuhixiyani mika'ukamaimaki meri katikwaiweti.

39 Hik Ti'aitame mipai katinitahiawe:

—Kari xeme paritseutsixi tekixi xaki herie xepika'itiwa, peru yutaita xepihipine xetenawakuti 'axaxeteyurieti.

40 'Atsixepikatemate. ¿Kemi'ane mitawewi herie taitanata katitawewi?

41 Matsi taitana miemek xeketenyumikwani xeteyukanenimayati, mikiki naiti 'itiyati kanayeimiki xehetsiemieme.

42 »Xia'ui xeme, paritseutsixi, tamamatatsie mieme xeime xepiyuwairiya xemixatianiki Kakaiyari yeruwawena, xura meta naime tupiriyate mukwaiwa, peru xepikayuwairiya heitseriemeki yaxemitekahuniki, xepikayuwairiya xeminaki'eriekaki Kakaiyari. Mipai xemitekahunikekai peuyewekai xekatehayewati 'iya kexemiteyurie.

43 »Xia'ui xeme paritseutsixi. Pixenake yunaime wahixie xemayaxeki tuki 'etsimipepeta meta xemiwairitariieka kiekari hixiapa.

44 »Xia'ui xeme, miki teukiyaya mikayuhekia herie xepihiki, hetsiena teiteri memu'uwa 'at-simekatemaiti».

45 Merikite xewiti 'iniariki miti'ikitametikai mipai katinitahiawe:

—Ti'ikitame, miya pe'utaiti pepitatsiniukima tameta.

46 Ketsutsi mipai katinita'eiya:

—Xia'ui xemeta 'iniariki xemite'ikita, 'ika mukwaniwe teiteri xepiwaruti'ikatiwa, peru wa'ika xemikumaiwani niyu'itiwameki xepikayuwairiya xemiwaparewieniki.

⁴⁷ »Xia'ui xeme, Kakaiyari niukametemama wa-teukiya 'iniariyari xemitiwewiwa, xe'ukiyarima memiwarukwi.

⁴⁸ 'Ayumieme xepiyuhekiata, xe'iyari yakani'eneneni xe'ukiyarima kememite'uyuri, miki mepiwarukwi Kakaiyari niukametemama, xemeta wa'iniari xete'utiwewi.

⁴⁹ Kakaiyari timaiweti 'ayumieme mipai kaniutayini: “Kakaiyari niukametemama meta ni'ariecate ne nepiwaranuni'airieni, hipame miki mepiwakwini meta hipame mepiwataweiya”.

⁵⁰ 'Ayumieme hiki miemete teiteri wahetsie katinahiyamiki yunaime Kakaiyari niukametemama waxuriyaki kwie munetiarietsie paititi mieme,

⁵¹ 'Aweri xuriyayaki meri 'atsita Tsakariyaxi xuriyayaki mikareutewike, mumierie mirayutimawatire yeyaka tukita kaheta'aweti. Huu, yuriki mipai nepaine hiki miemete teiteri wahetsie katinahiyamiki.

⁵² »Xia'ui xeme 'iniariki xemite'ikitamete, xepinawa kitenie yawiyari kimana teiteri metemaiwaweti memakinekekai. Xemetiti xepikaheutahaxiawawe, meta hipame xepikawapitia memeutahaxiani».

⁵³ Merikitsi wayeyaku, miki 'iniariki memite'ikitametetikai meta paritseutsixi yunaiti mekanitixematikine kwini mieme, mekaniti'iwawiyatikine mitikuxataniki waikawa hepaitsita.

⁵⁴ Me'ihupieti memiwiniyaki niukieyaki.

12

Tiyukuxanariyame paritseutsixi wahetsia

mieme

¹ Merikitsi 'ana teiteri waikawa miriyari meyupaimeti meyukuxeiriekü yuketatsie me'a'uwekaku. Kanitsutiani mipai tiwakux-axatiwati yuhetsia miemete teyi'ikitiwamete: «Xekeneyukweriwayurieka matsi paritseutsixi wahetsia mieme tiyukuxanariyame hepaitsita, wa'itarika yuri hepai memite'ikuxata hepaitsita.

² Kariki naiti tita miti'awietsie katina-hekiarimiki, meta naiti tita 'awie mitimieme katinitamariwamiki.

³ 'Ayumieme mipai nepaine, naime tita xemitekuxata yiwikita, hekiaripa kani'enieriemiki, meta tita kiita yu'inikai xemitekuxata, kii heima paiti kanitahekiatsiemiki hiwariki.

⁴ »Mipai nepitixekihawe xeme, nehamikuma, xepikawamakarika miki memiyawawe tawaiyari memimieni xeikia, peru 'arike tawarita mepikayawawe yiki memite'uyurieni.

⁵ Nepitixetaxatiani kemi'ane matsi xemimakarika: xekenemakarika kemi'ane, ramieme, heitserie mexeiya tai yamitita'atsie mireukahiani. Huu, mipai nepitixekihawe, miki xekenemakarika.

⁶ Wikixi yu'auxiwiti huta tsenitawuyari mepite'aye'axe, peru nixewiti miki pikatimaiyarie Kakaiyari hixie.

⁷ Mipaia yaxekia xeme: xekipate xemu'utsie mieme naiti piti'iniatsie. Xepikaheumamaka, yumireti wikixi kememite'aye'atika, xeme matsi waikawa xepite'aye'atika.

⁸ »Mipai nepitixekihawe, kemi'ane miyuhekiata teiteri wahixie kename nehetsia mieme, neta Yuri

Tewi kenemⁱtite^wa nekaninehekiatamiki kename hetsiena netiwiya Kakaiyari hetsia miemete niuki tuayamete wahixie.

⁹ Peru kemi'ane muyuku'imawa teiteri wahixie kename nehetsia kamieme 'utaiti, mikita pikamatiwani Kakaiyari niuki tuayametemama wahixie.

¹⁰ Yunaiti meminiukixie Yuri Tewi hepaitsita, mekaniyiwaweni memiteheuyehiwiyarieniki, perutsi kemi'ane 'axamitayini 'Iyari Mitiyupata hepaitsita, miki pikayiwani mireuyehiwiyarieniki.

¹¹ »Kepauka xemanuhapanieni tukiteta, kuwexinaruritsixi meta 'itsikate wahixie, xepikayu'iyaritiaka kexemutiyuaneni yuhetsiemieme meta kehapai xemutiyuaneni,

¹² kariki 'ana 'Iyari Mitiyupata pitixeta'ikitiani kexemutiyuaneni».

Tewi mixikutikai 'atsimikati^maikai

¹³ Hiki teiteri watsata 'uweti xewiti mipai katinitahiawe:

—Ti'ikitame, yaketineutahiawi ne'iwa minetsi'itianiki tita nehetsie mitinake tapaapa tita mitatiuku'eiriri.

¹⁴ Ketsutsi mipai katinitahiawe:

—Neuxei, ¿kemi'ane xe'itsikame pinetsi'ayeitia xepiini hixiata nemititsananiki?

¹⁵ Hiki mipai katiniwarutahiawe:

—Xekeneyukweriwayurieka naimeki, xekeneyi'iwiyani kapa xete'ukahiwe'erieka, rapiinite ranayuhayewakaku pikatukari.

¹⁶ Hiki 'ixatsi hepaitsita tikuxatati katiniwaruti'ikitiatiyani mipai 'utaiti:

—Tewi m̄xikutik̄ai kwie kanexeyakait̄ini kwini mieme katiniutixuaweriyakait̄ini.

¹⁷ Hiki m̄pai katiniyik̄ih̄iawekait̄ini yu'iyaritsie: “¿Ketsi netiyurieni? Nep̄ikaheixeiya hakewa ne-meiti'uta netiriku”.

¹⁸ Hiki m̄pai kaniutaȳini: “Tsipara 'ipai nep̄itiyurieni: Nep̄ika'una nekaxetunite, 'epapame matsi nep̄itiwewieni, mana nep̄iti'uta netiriku meta hipame nep̄iinitiarika.

¹⁹ 'Anari ne'iyaritsie m̄pai nep̄itinek̄ih̄iaweni: Ne'iyari 'aku, waikawa piinite pekatiniuti'uta miixa wiyaritsie mieme. Kene'uxipieka ketinek-waka ketine'ieka pe'atemawiet̄i”.

²⁰ Perutsi Kakaiyari m̄pai katinitah̄iawe: “Kari 'atsipep̄ikatimate. Hiki tikariki 'a'iyari pep̄itawawiyarieni. ¿Tita pem̄itiuti'utaxi, kem̄'ane piiniteya pirayani 'ana?”

²¹ »M̄pai katinik̄iȳineni kem̄'ane yuhet-siemieme waikawa mitiyuti'utsiri hetsie, peru pikaxiku Kakaiyari hetsiemieme».

Kem̄ikareuyewetse m̄yu'iyaritiakaki

(Ruk 12:22-31 - Mat 6:25-33)

²² Hiki m̄pai katiniwarutah̄iawe yuhetsia miemete teȳi'ik̄itiwamete:

—'Ayumieme m̄pai nep̄itixek̄ih̄iawe: Xep̄ikayu'iyaritiaka yutukari hepaitsita, kexem̄tekwani, yuwaiyari hepaitsita, kexem̄teyutikemaritiani.

²³ Tukari matsi waikawa piraye'axe keyuri 'ik-wai, meta xewaiyari keyuri 'ixuriki.

²⁴ Xekeneȳi'wiya kwatsari wahetsie: mep̄ika'uka'etsa mep̄ika'uka'itsana, kaxetuni

'iki mepikahexeiya, miyatiti Kakaiyari katiniwamikwani. Wikixi kememite'aye'axe, xeme kwini mieme matsi xekate'aye'axe.

²⁵ ¿Kemi'ane xeme waikawa yu'iyaritia piyiwe 'e'utewiti mayuyeitiani xika 'etsi'utewini?

²⁶ Meriki 'etsiwa xeikia xika xekayiwaweni, ¿tityari xeteyu'iyaritia naimeki?

²⁷ »Tuturi xekena'eriwani, kemikatiwita kemikatitsa'a, peru 'ipai nepitixekihawe, Tsarumuni kwini mieme witsikemi'ane kai, witsipikaranakatikikai wahapai nixeime hepai 'iki tuturi.

²⁸ Meriki xika Kakaiyari mipai tikemaritiaka 'ixa 'itsita mieme hiki muxuawe 'uxa'a huxunuta meukaxiriyani, matsi yemeki katixekemaritiaka xeme. Kari 'etsiwa xeikia yuri xepite'erie.

²⁹ 'Ayumieme xeme xepikayu'iyaritiaka yu'ikwaiki meta tita xemite'ieniki, xeketeneuhayewa xe'iyarixieti.

³⁰ Teiteri naitserie kwiepa miemete mipai ti'ananeme naime mepitekuwautiwe, xeme xe'ukiyari matsi mipai pitimate xemeiyehiwaki 'iki.

³¹ Xemetsi xekeneyuwairiyani Kakaiyari tixe'aitiwame mihikitiniki, mipai xeteyurieti, miki naime xepitemikienita.

³² »Nemuxatsima, tsepa xemikayumiire, xepikaheumamaka, xe'ukiyari kaniyuwairiyani mitixepitianiki tita mirexeiya ti'aitametiti.

³³ Xeketenetuaka yupiinite, xeteyuparewieti xeketeneyumikwani. Xekenanuhuri tumini maname mikaye'iriwe, taheima xekeneuti'uta

tita mikatixiwe, hakewa tinawayame 'ahurawa
mikaheyeika hakewa kwitsi mikaretikwitamawa.

³⁴ Hakewa xemiteheti'uta yupiinite
miraye'atika, manata miemeki xe'iyari
yakani'anemiki.

Kemitita'ikwewani

(Ruk 12:35-36, 39-40, 42-46 - Mat 24:43-51, 25:1-13, Mar 13:33-37)

³⁵ »Xekeneyuha'aritiaka xe'ayihiatikaiti xekixeme
takaku.

³⁶ Xemeta teiteri wahepai xekeneyiaka
yukutsiyari memikwewie, 'atsimekatemaiti
kepauka neikiya 'ixiararipa mayeyani,
mekanikwewieka kwitiwa memiteheuyepieniki
nuayu 'itupari heyuitiayu.

³⁷ 'Aixia mekani'itiariekakuni miki
te'uximayatamete xika wakutsiyari nuame
waretaxeiya me'ayeneniereme. Yuriki
nepitixekihawe, panayihiani, mexatsie
piwarutiyatsa, mana 'uyeikati pitiwamini.

³⁸ Tsepa tikari hixiapa tsepa yuimuana munua,
miya meteyuriekaku xika waretaxeiya, 'aixia
mekani'itiariekakuni miki.

³⁹ Peru 'ipai xeketenemaika, xika kiekame ya-
timaikake kemi'ane hurayaritsie munuani tin-
awayame, pita'ikwewanikeyu mika'ipitianiki kiita
meutahani.

⁴⁰ Mipaita xeme kaneuyeweka
xemi'yuha'aritiaka, kariki kepauka Yuri Tewi
kanuaximeme xemi'erieka 'ana kaninuamiki».

⁴¹ Hiki Pekuru mipai kaniutayini:

—Ti'aitame, ¿'iki 'ixatsi hepaitsita peti'ikitati
tame petatixata, nutsu pepiwaxata yunaime?

⁴² Ti'aitame mipai katinita'eiya:

—Ti'uximayatame yamitikamie meta mitimaiwe kanihikitini miyiwe kutsiyarieya mitihiritiani mitiwa'aitiakaki hipameta te'i'uximayatsiriwamete meta mitiwamikwaniki kepauka memeiyehiwa.

⁴³ 'Aixia ke'itiarieka miki ti'uximayatame xika kutsiyarieya nuame 'itaxeiya yatiyurieneme kemitiuta'aitiarie.

⁴⁴ Yuriki mipai nepixerahiawe, pitihiritiani yupiinite tinaime.

⁴⁵ Peru mexika miki ti'uximayatame mipai tiuyihiawe: “Nekutsiyari 'epireutere kwitiwa pikanuani”, hiki xika warutiwatiyani te'uximayatamete 'ukitsi meta 'ukari, meta xika tikwaneni meta 'ieneni meta taweneni.

⁴⁶ Miki ti'uximayatame kutsiyarieya kaninuamiki kepauka mika'ikwewietsie, meta kemi'ane hurayaritsie yemeki mika'ikwewietsie. Hiki waikawa pi'uximatiani meta yuri memikate'erie wahepai katinipitiamiki.

⁴⁷ »Miki ti'uximayatame yamitimaikai kemitinakekai kutsiyarieya, peru mikayukuha'aritia 'atsimikatiuyuri kemitinakekai, miki kwini mieme kanikuweiyaxiamiki.

⁴⁸ Kemi'ane pita 'atsikatimaiti yamitiuyuri para mikuweiyaxianiki, 'etsiwa xeikia pikuweiyaxiani. Kemi'ane waikawa mitiumikie, miki waika pititawawiyarieni, kemi'ane waikawa mihiritiarie, waikawa matsi pititawawiyarieni.

*Ketsutsi hixiata kemitiwatsana
(Ruk 12:51-52 - Mat 10:34-36)*

49 »Ne nekaninuani tai nemeukahianiki kwiepa, yanepira'eriwakaku 'ari xika takake.

50 Peuyewetse nema'iwarieniki nemimierieniki, tewi kemiranukanamiepai haki kepauka muka'iyarie, haweri mieme nepitiuka'eniwa mexi ka'aye'awe.

51 ¿Xeme mipai xeteku'eriwa kename nenua newapitianike kwiepa memitama 'aixia memiteyuxeianiki? Hawaiki, hixiata nemiwatsanaki pita nepunua.

52 Hiki 'uxa'atini yu'auxiwiti xeikiyarita miemete hixiata mepiyutsanani yuhaikati yuhutame mewaraye'unieti, yuhutati yuhaikame mewaraye'unieti.

53 Mepikayuxewini nuariekame yuniwe paye'unieka meta nu'aya yupaapa paye'unieka, niwekame yuniwe 'uka paye'unieka meta 'uka yumaama paye'unieka, niwekame yumu'e paye'unieka meta wikiekame yumu'e paye'unieka».

'Iniari 'iki tukaritsie mieme

54 Hiki mipai katiniwarutahiawe teiteri:

—Kepauka hai xemixeiya tau makayuyuipeke hepatsie hatineikame, kwiti 'ana mipai xeputiyuane: pikawiye, mipaita pitikiyine.

55 Meta kepauka 'eka tatsutia hepatsie mieme mu'eka, mipai xeputiyuane: pukixire, mipaita pitikiyine.

56 Xemite'itawamete. Xepi'iniatawawe kwie kemitiyuxexeiya muyuawi meta. ¿Titayari xekate'i'iniatawawe 'iki tukaritsie mieme?

57 »¿Titayarita yikimana xekateheitimaiwawe tita mitiheitserie?

58 Kepauka 'itsikame hetsia pemanuhanieni, huyeta xe'uhati keneunitia 'axanetame matsixinaki, kapa 'itsikame hixie matsihe'atianiki, 'itsikame kapa matsiyetuaniki tupiri hetsia, tupiri kapa matsi'anutahiani katsariyanata.

59 Mipai nepimatikihawe, muwa pepikawayeyani kepaukake naimeki pemititu'atuani».

13

Xika xekate'uhayewa kexemiteyurie xekanikwikuni

1 Merikitsi hipati 'ana me'u'axiaka mekatenitaxatiani karereyatari wahapaitsita, Piratu mitiuta'aitaxi memikwi'iwaki mexi metemawatiwekai.

2 Ketsutsi mipai katiniwarutahawe: «¿Kexeteku'eriwa, miya memite'ukwinixiki kemetematsiiki, kename miki matsi yemeki 'axameteyuriekai, hipati karereyatari yunaiti 'axakememikate'uyuri?

3 Pikatixai. Matsi mipai nepitixekihawe, xika xekate'uhayewa kexemiteyurie xeme, wahapai xekanikwi'iwakuni yunaiti.

4 ¿Miki meta tamamata heimana 'atahaika memiyupaimikai wahetsie mukawe Tsiruhe tuxiyuyari miwarukwi, kexeteku'eriwa miki wahapaitsita, kemetematsiiki kename matsi kwinimieme wahetsie rahiiwakai, hipati teiteri Kerutsareme memitama yunaime wahetsie kemikarahiiwakai?

5 Píkati^xai. Matsi mîpai nepî^tixekîhiawe, xîka xekate'uhayewa kexemîteyurie, yaxeikîa xekanikwi'iwakuni yunaiti».

6 Hiki 'iki 'ixatsi hepaitsita tikuxatati katini'ikitakaitini: «Tewi 'aniukateitini kîye muka'iteiritaxi yuharawerita, mana kani'axekaitini 'ikwaxi kuwauneti kîyetsie mieme, kakanitaxexeyakaitini.

7 Hiki harawerita mîhiritiari^ekai mîpai katiniutahiawe: “Neuxei haika wiyari nepeukuyeixîa 'ikwaxi nekuwauneti 'iki kîyetsie mieme, nepîka'itaxeyawe. Kenahiwa, ¿titayari kwie titsewixima xeikîa?”

8 Peru tihîweme mîpai katinitahiawe: “Nekut-siyari, 'iki witsie keneuhayewa xeikîa, ne hetiana nepa'inetiyani, meta kwie 'aixîa mî'ane nepawi-wietiyani.

9 Heiwati mîpai 'utixuawere, mexîka katixaitini, tepewiteni kepemaine”».

Ketsutsi 'uka kemîranayehîa 'uxîpiya tukari-yaritsie

10 Merikîtsi 'uxîpiya tukaritsie katini'ikitakaitini heiwa xeime tukita,

11 'uka muwa kanayekateitini kakaiyari 'axamî'ane miwiyakai tamamata heimana 'ata-haika wiyari 'iweranariyati. Nanakatutsikaitini, pikayîwekai mîyutatseiriyaki naime.

12 Hiki Ketsutsi 'ixeyaka yu'aurie 'itahiaweka mîpai katinitahiawe:

—'Uka pepuxînarie kepemîtiweranikai.

13 Hetsiena 'utimeku yapauka kaniutatseire, 'aixîa nainekaitini Kakaiyari hepaitsita.

14 Hiki tuki mihiritiari ha'ati Ketsutsi
menayehiaki 'uxipiya tukaritsie, mipai
katiniwarutahiawe teiteri:

—'Ataxewi tukari puxuawe kepauka
meuyewetse yamiti'uximayakaki, miki
tukaritsie 'ayumieme xekene'axeni 'aixia
xemite'uka'eritiriwaniki, peru 'uxipiya
tukaritsie pikatixai.

15 Hiki Ti'aitame mipai katinita'eiya:

—Xemite'itawamete. ¿Yuxexuti xeme 'uxipiya
tukariyaritsie xekatewaxina yutuursixi
kwietsanamete yupuxurima hakewa memakuwi,
xekatewarehapana xekatewaharitiwa?

16 'Iki 'uka 'Apirahami kaninu'ayati, peru
Kauyumarie kanekuwiekaitini tamamata
heimana 'atahaika wiyari, ¿kareuyewetse 'uxipiya
tukaritsie mixinarieniki 'akuwieti?

17 Mipai 'utayiku mekanuyutitetewiya yunaiti
memeye'uniekai, peru hipati teiteri yunaiti
mekaniyutemamawiekaitini waikawa mariweme
mitiyurieneaiki.

Mutsitatsa 'imiariyari hepaitisa

(Ruk 13:18-21 - Mat 13:31-33, Mar 4:30-32)

18 Hiki mipai kaniutayini:

—¿Tita hepai ti'ane Kakaiyari kemiti'aita?
¿Ke'aneme 'ikitsikayari nexatati nepihekياتani?

19 Mutsitatsa 'imiariyari hepai kani'aneni tewi
xei 'imiariyari 'anutika yuharawerita meika'e.
'Utawereka kiye kanayani, wikixi taheima
miemete mekaniyuti'ituatiatikine mamateyatsie.

20 Hiki tawari mipai kaniutayini:

—¿Ke'aneme 'ikitsikayariki nepihekياتani
Kakaiyari kemiti'aita?

21 Paa kuxanariyame hepai kani'aneni, 'uka 'iwatituka kanitimuina paa mitixiyaritsie waikawametsie, 'arikeke naiti kaniutikuxanare.

Kitenie 'etsimayewa

22 Hiki kiekarite 'emiyeyeutsie 'etsimiyeyeutsie kaniye'axekaitini ti'ikitati, Kerutsareme tamieti.

23 Merikitsi xewiti mipai katinita'iwawiya:

—Ti'aitame, ¿yaki yupaimeti xeikia metetawik-weitsitarieni?

Ketsutsi mipai katinita'eiya:

24 —Wairiyarika xekeneyupitiaka xemeu-tahaxianiki kitenie 'etsimayewatsie, mipai nepixerahiawe, kariki yumireti mepihakuni peru mepiyutatexieni.

25 Kepauka kiekame 'anukukeme mireunani kitenie, xeme takwa xemu'uwa, 'itupari xekaniyuitiakuni, mipai xe'utiyuati: “Ti'aitame 'aku, ketatineuyepiri”. Peru miki mipai katinixeta'eiyamiki: “Ne nepikaxemate meta nepikatimate hakewa xemeyeki”.

26 Hiki 'ana xekanitsutiakuni mipai xe'utiyuati: “Tame tepite'ukwai meta tepite'u'i 'ahamatia, meta 'eki takaye 'utia pepiti'ikitakai”.

27 Peru miki mipai katinixeta'eiyamiki: “Nepikaxemateriki meta nepikatimate hakewa xemeyeki. Xekeneuyupata nehetsia xepika'u'uwani, xeme xeyunaiti kemikatiheitserie xemiteyurie”.

28 »Mana xekaniutitsuanakuni xekaniyutakewekuni, kepauka xemiwaxeiya 'Apirahami, 'Itsahaki, Kakuwu meta texaxatamete yunaime

mana me'u'uwame hakewa Kakaiyari mire'aita, xeme pita xe'anuyexiriyayu.

²⁹ Tau matineikatsie miemete makayuyupiket-sie miemete mekani'axiakuni, tatserieta miemete meta ta'utata miemete, mexa 'aurie mekanayaxikuni hakewa Kakaiyari mire'aita.

³⁰ Mana, hiki miemete 'imatiremete 'ana hipati mexiakate mekanakinikuni, hiki miemete mexiakate meta hipati miki 'imatiremete mekanakinikuni».

Ketsutsi yuhiwerieti kemutayi Kerutsareme kiekatari wahepaitsita

(Ruk 13:34-35 - Mat 23:37-39)

³¹ Merikitsi 'ana paritseutsixi hipati hetsiana mekaniu'axiani mipai mete'ikihaweti:

—Xaitsie pita kenemie, Herurexi pimatsimiemiki.

³² Iya mipai katiniwarutahiawe:

—Mipai xeketenetahiawi netsimariutame: “Neuxei, ne hiki 'uxa'a nepiwaranuyeni'awani kakaiyarixi 'axamemi'anene memiwatixinaki teiteri, nepiwaranayexirieni tekwiwikate, 'ayeimana nepaye'atarienititi”.

³³ Miki xeikia neuyeweka hiki, 'uxa'a meta warie nemikuyeikaniki, peuyewetse yemeki yunaiti texaxatamete memikwi'iwaki Kerutsaremet-sie, xaitsie pikatixai.

³⁴ »Kerutsareme, Kerutsareme 'aku, 'ahetsia kiekatari mekaniwatakukuyani Kakaiyari niukametemama meta mekani-watituaxani Kakaiyari ni'arimama 'ahetsia memi'axe. Miixa nepinewairiyakai nemiwakuxeirieniki 'atiriyama, wakana

yuniwema kemitiwakuxexeiriwa yu'anatia hepai, peru mepikayuwai.

³⁵ Neuxei, xekii 'uyemaweti piyuhayewa. Mipai nepitixetahiawe, tawari xepikanetsixeiya mexi tukari ka'aye'awe kepauka mipai xemutiyuaneni: “Aixia ke'itiarieka kemi'ane 'umamie Ti'aitame hetsia miemetiti”».

14

Ketsutsi kemirenayehia tewi meuhatikatei

¹ Merikitsi Ketsutsi xeime hetsia kaninuani 'ux-
ipiya tukaritsie tikwanike. Mita'ini xewiti teiteri
wa'ukiyarima kanihikitikaitini meta paritseutiti,
miki mekanihupiekaitini.

² Hiki tewi meuhatikatei hixiena kanakateitini.

³ Ketsutsi mipai katiniwaruta'iwawiya 'iniariki
memite'ikitametetikai meta paritseutsixi:

—ǂTiyiwe nutsu pikayiwe 'uxipiya tukaritsie
tewi 'aixia muyurieniki?

⁴ Peru miki kayuwati mekaniumakaitini.
Hiki tikwikame 'umayiaka 'aixia reu'eriekame
hayeitiaka kaneini'ani.

⁵ Meta mipai katiniwarutahiawe:

—Xewiti xeme xika niweya heukaweni
muwatixawatsie yatini tuuruya, ǂkwitiwa
katiwatihana tsepa 'uxipiya tukaritsie?

⁶ Mepikayiwawekai tixai memutiyuaneniki 'iki
hepaitsita.

⁷ Hiki waruxeyaka kememitehenuyexeyakai
hakewa matsi 'aixia mi'anenekai memayaxeki,
'ixatsi hepaitsita tikuxatati katini-
waruti'ikitiatiyani miki memuta'inierie, mipai
katiniwarutahiawe:

8 —Kepauka tewi mixeta'inieni neikiya 'ixiararipa, hakewa matsi 'aixia mi'ane mana xepika'ayahikeni, kapa xeime matsi we'eme 'uta'inieni, 'eki 'etsiwa pewe'emetikaku xeikia.

9 'Ahetsia nuame kemi'ane mixe'uta'ini mipai pimatikihaweni: “Keneupitia 'iki pita 'ena mayeriniki”. 'Ana 'eki pe'atewiyati 'imatireme 'iparieyatsie pe'akaiti pepayani.

10 Matsi kepauka pemita'inierieni, mana kenayexi 'imatireme 'iparitsie, kepauka munuani kemi'ane mimatsi'uta'ini, mipai pimatitahawe: “Nehamiku, huma pita kenayexi 'ahurawa”. 'Ana witsipiraniuwani 'ahepaitsita yunaime 'ahamatia memuta'inierie wahixie.

11 Yunaiti yuxaita mariweme memayuyeitiwa tixaiti mekatehikititi mekanayeitiariekuni, peru kemi'ane tixaiti katihikitime mayuyeitiwa miki mariweme kanayeitiariemiki.

12 Meta kemi'ane mita'ini mipai katiniutahawe:

—Kepauka 'ikwai pemiwewieka tuka ya taikai, pepikawa'inieka 'ahamikuma, 'aiwama, 'amarema, 'aurawatari memeuka'u xeikia, mikita kapa mematsi'uta'inieniki, kapa mipai perakapitiarieniki.

13 Matsi kepauka 'ikwai pemiwewieka, keniwa'inieka miki tixaiti memikatehexeiya, memimamawawaki, memihurietika meta memakikipe.

14 Miki tixaiti mepikatehexeiya kimana tawarita memimate'apiniriekaki, mipai petiyurieneti 'aixia pekani'itiariekamiki, tawari pepirapiniyarieka kepauka memanuku'uni miki heitseriemeki yamemitekahu.

'Ikwai 'ixiarariyari m̄mariwe niukiyari

15 Hiki memuta'inierie xewiti, 'iki 'u'enieka, mipai katinitahiawe:

—'Aixia kani'it̄arieka kemi'ane mirekwani hakewa Kakaiyari mire'aita.

16 Ketsutsi mipai katinitahiawe:

—Xewiti tewi 'ikwai 'ixiarariyari kaniuwewieni mariweme, yum̄ireme kaniwaruta'inieni.

17 Hiki tukari 'aye'aku mem̄itekwaniki, yuhetsia mieme ti'uximayatame kaniutani'ani mipai mitiwatahiaweki memuta'inierie: “Xekenakiniri, 'ari naiti p̄irekuha'aritsie”.

18 Hiki yuxexuti yunaiti mekaniuyuti'imatikine. Xewiti meri mipai katinitahiawe: “Kwie nepenanai, peuyewetse nemixeyiamieki, nepikayiwe nemimieki, kenetineuyehiwiri”.

19 Xewitita mipai titahiawixi: “Tuurutsixi kwiet-sanamete nepiwaretinanai 'auxiwime paritsiyari, newareta'iniatake nepimie, kenetineuyehiwiri”.

20 Xewitita mipai titahiawixi: “'Uka nepuwitit̄arie, 'ayumieme nepikayiwe nemimieki”.

21 Hiki ti'uximayatame nuaka mipai katinitahiawe yukutsiyari. Hiki kiekame 'uyeha'aka mipai katinitahiawe yuhetsia mieme ti'uximayatame: “Kwiti kiekaritsie kenemie kaye'utia huyeta, tixaiti mem̄ikateheuxeiya, mem̄imamawawaki, mem̄akikipe meta mem̄ihurietika keniwarawitiki 'uwa”.

22 'Ariketa mipai kaniutayini ti'uximayatame: “Nekutsiyari, kepem̄itiuta'aitaxi yanep̄itiuyuri, peru mep̄ikahine 'akuxi”.

23 Hiki kutsiyarieya mipai katinitahiawe yuhetsia mieme ti'uximayatame: "Huyeta kenemie tetsariya kemitiukumane, wairiyarika keniwarepitia memahuki nekita memitahineki.

24 'Ipai nepitixekihawe, miki memuta'inierie, nixewiti miki pikahe'iniata ne'ikwai".

Kemiraye'axe xika Kiritsitutsie tiwiyani

25 Merikitsi yumireti teiteri 'utimana meka-niuhukaitini, ta'aurie 'aweka mipai katiniwarutahiawe:

26 «Xika xewiti nehetsia nuani, xika kawa'uxiwe'erieka yupaapa meta yumaama, yi'ia, yitiriyama, yu'iwama, meta xika ka'i'uxiwe'erieka yutukari, pikayiwe nehetsia mieme tiy'ikitwame mayuyeitiwaniki.

27 Kemi'ane mikayuwairiya kuruxitsie mimierieni, tsepa nehamatia muyeika nehetsie tiwiyati, miki pikayiwe nehetsia mieme tiy'ikitwame muhikitiniki.

28 »Xewiti xeme xika tuxiyu tawewimikini, ¿mana karayerini meri titi'iniatake kemiraye'aka, xika heixeiyani kimana minini, mexika katixaitini?

29 Tenariyari xika 'utawewieni, xika yutatexieni mininiki, 'aixia pikayini, yunaiti mekanitinanaimatikinikuni memineniere

30 mipai me'utiyuati: "Iki tewi kii kaniutsutiani, piyutatexi pika'ini".

31 »Yatini xewiti kwiepa ti'aitame xika yemieximeni xeime ti'aitame matia memiyutakwiniki. ¿Mana meri karayerini, mipai tiyikihaweti tamamata miriyari warawititi xika 'aku yiweni menukunakeki 'iya xeitewiyari miriyari warawititi hepana mamie?

³² Mexika katixaitini, 'ateewa heyeikakaku 'akuxi meye'unie, ni'ariekate penuni'airieni, pitawawirieni 'aixia memiteyuxeiyani.

³³ Yaxeikiatari yunaiti xeme xika yupiinite nai xekate'uku'eirieni, xepikayiwawe nehetsia miemete teyi'ikitiwamete xemayuyeitiwaniki.

³⁴ »'Una 'aixia kani'aneni, xikate 'una hamuriti 'ayanike, titaki ra'utsirekeyu 'unaiti?

³⁵ 'Aixia pika'ane kwie hetsiemieme meta 'iteirite wahetsiemieme, tewa paiti xeikia kanewiwiyamiki.

»Xewiti neti mu'enaxi, ke'u'ena».

15

Muxa meuyewe niukiyari (Ruk 15:4-7 - Mat 18:12-14)

¹ Merikitsi yuwaikawati kuwiyexinu hetsiemieme tewawamete meta 'axateyuruwamete hetsiana mekani'axekaitini yunaiti me'i'enienike kemitikuxatakaiki.

² Hiki paritseutsixi meta miki 'iniariki memite'ikitametetikai, mekaniniukixiekaitini mipai me'utiyuati: «'Iki 'axateyuruwamete kaniwanaki'erieka, wahamatia katinikwaka».

³ Hiki miki 'ixatsi hepaitisita tikuxatati katini-waruta'ikitiani mipai 'utaiti:

⁴ »Xewiti xeme xika xeitsienituyari warexeiyani yumuxatsi, xewiti miki xika heuyeweni, mana 'ixapa katiwaku'eirieni nauka tewiyari heimana tamamata heimana 'atanauka memiyupaime, katiwaumie meuyewe, 'itaxeiyameke xeikia katihayewa?

⁵ Hiki, kepauka meitaxeiya, waikawa yutemaw-ietiyunaiparitetsie neikutemiki.

⁶ Yukie nuame kaniwakuxeirimiki yumarema 'ahurawatari yunaimemipai tiwakihaweti: "Xemeta xekeneyutemamawieka nehepai, nemeitaxeiki nemuxa meuyewekai".

⁷ Mipai nepixerahiawe, mipaita kantine'aneni muyuawisie: kwini mieme mekateniyutemamawieka taheima kepauka xewiti mitihayewa 'axatiyurieneti, keyuri nauka tewiyari heimana tamamata heimana 'atanauka memiyupaime heitseriemeki yamemitekahu memikaheiyehiwa memitehayewaki 'axam-etryurieti.

Tumini meuyewe niukiyari

⁸ »'Uka xika tamamata tuminiyari hexeiyani pirata tuminiyari, xituminiyari xika heuyehiani. Katitaiya kixeme, katiuye'itieni yukiita, 'aixia 'anemekiki katikuwauni 'itaxeiyameke katihayewa?

⁹ 'Itaxeiyame kaniwakuxeirimiki yumarema 'ahurawatari yunaimemipai 'utaiti: "Xemeta xekeneyutemamawieka nehepai, netumini nemutaxeiki nemeiyehiakai".

¹⁰ Mipai nepitixekihawe, yaxeikia Kakaiyari hetsia miemete niuki tuayamete temawierika mekanexeiyani, kepauka xewiti mitihayewa 'axatiyurieneti».

Xewiti nu'aya meuyewe niukiyari

¹¹ Mipai kaniutayinita: »Tewi yuhutame kaniwarexeiyakaitini yuniwema.

¹² Hiki mutaya mipai katinitahiawe yu'ukiyari: “Ne'ukiyari, 'apiinitiarikatsie timieme miki kenetineyeturi nehetsiemieme mayaniki kepaiyeti nehetsie mitinake miti'apinitikai”. 'Ana yupiinitiarika katiniwayetuirieni yuhutame yuniwema.

¹³ Hiki yapaimexia 'anukayaku mutaya naime tiukuxerieka tewa kaneyani xeime kwieyaritsie, yupiini katineuyehiani mana yaki xeikia.

¹⁴ »Merikitsi naime tiutixitaku, haka kaniutaweni kwini mieme miki kwieyaritsie, hiki 'ana reuyehiati kanayani.

¹⁵ Hiki mana kiekame hetsia nuaka hetsiena katiniuwiya, miki kaneini'ani tuixuri mitiwaremikwaniki kwiepana.

¹⁶ Huxaimiti kanihiwe'eriekaitini ketita memitekwakai tuixuri, peru nixewiti pikatimi.

¹⁷ Merikitsi 'uka'iyariti kanayani, mipai kaniutayini: “Ne'ukiyari hetsia miemete te'iwamete paa mepexeiya 'anayuhayewakame, ne matsi 'uwa nepimixime hakaki.

¹⁸ Nepiyemie mekuxi ne'ukiyari hetsia, mipai nepireitahiawe: Ne'ukiyari, 'axanepitiuyuri, taheima makawe yamakahainetsie, 'ekita yapemakahainetsie nepitiuyuri.

¹⁹ 'Aixia nepikatiuka'iyari, heitserie nepikahexeiya para hutarieka 'aniwe ne-mayaniki, 'ahetsia miemete te'iwamete wahapai xeikia kenetnepitiaka neminehayewaki”.

²⁰ Hiki yukuha'aritiaka yupaapa hetsia kaneyani.

»'Ateewa 'akuxi 'amiekaku paapaya kanixeiya, kanitinenimayata, 'utanautsaka 'enukunakeka

'enakawiyatikaiti kani'itseni.

21 Hiki nu'aya mipai katinitahiawe: “Nepaapa, 'axanepitiuyuri, taheima makawe kemikatinaketsie, 'ekita kepemikahainetsie nepitiuyuri. 'Aixia nepikatiuka'iyari, heitserie nepikahexeiya para hutarieka 'aniwe nemayaniki”.

22 Paapaya matsi mipai katiniwarutahiawe te'uximayatamete: “Xeiya 'aixia, 'ixuriki matsi 'aixia mi'ane xekenanakatitia, hanira xekenakamaniri mamayatsie, meta xekeneukakaitiaxia.

23 Xekenehaniyu tsikeru miwaiya 'aixia mi'ane, xekeneumi'a, tetekwati tepitatemamawieka.

24 'Iki neniwe 'umime nekani'eriekaitini peru kananutaniere, kaneuyewekaitini peru kaniutaxeyarieni”. Hiki 'ana meyutemamawieti mekanakine yunaiti.

25 »Merikitsi matsikaya xaitsie kaneyeikakaitini. 'Akunuaka, kii 'aurie 'ayemieti, yuitiarika kaniu'enieni meta neiya.

26 Yu'aurie 'itahiaweka ti'uximayatame xeime, kanita'iwawiya kemireyianekai.

27 Miki mipai katinitahiawe: “'A'iwa kaninuani, 'apaapa kanimieni tsikeru miwaiya 'aixia mi'ane mitanaki'eriki 'aixia reu'eriekame”.

28 Hiki matsikaya kaniuyeha'ani, pikayuwa'iriyakai meutahaniki. Paapaya wayeyaka kanikunitiwakaitini.

29 Mipai yupaapa katiniutahiawe: “Neuxei, miixa wiyari nekatini'uximayaka 'ahetsia, ne hatsuaku nepikamatsiku'imaiyakai, yanepitikamiekai, peru ne hatsuaku kapira nunutsi pepikanetsimiwe, nemarema wahamatia

neminetemawiekaki.

³⁰ Hikiri 'iki 'aniwe kaninuani 'atumini naime hetixitiaka 'ukarawetsixi wahetsie, ¿kari tsikeru miwaiya pepumi hetsiena mieme?”

³¹ »Hiki paapaya mipai katinitahiawe: “Neniwe, 'aheyemeki nehetsia pekaniukani, nepiini naiti katini'apinitini.

³² Kaneuyewekaitini temitatemamawiekaki, kariki 'iki 'aiwa 'umime nekani'eriekaitini, peru 'ari panutanierixi punua, meuyewekai kaniutaxeiyarieni”».

16

Ti'uximayatame yamikatikamiekai niukiyari

¹ Mipaia katiniwarutahiawe teyi'ikitiwamete: «Tewi mixikutikai kaneixeyakaitini ti'uximayatame naime mitihiritiakai yupi-initiarika, mipai katiniutahawarieni kename ti'uximayatame piinite reuyehi aximekai.

² Hiki yu'aurie 'itahiaweka mipai katinitahiawe: “¿Titayari niuki neti'enie 'ahepaitsita? 'Iniari keneneutawewiri 'ahiritiarika hepaitsita mieme, nepikamatsipitiani tawari pemihiritiariiekaki”.

³ Hiki yu'iyaritsie mipai katiniyikihawekaitini ti'uximayatame: “¿Kenetiyurieneni, nekutsiyari nehiritiarika 'ari minetsinawairieni? Nepikarikaiye nemiti'iwaneniki ne'ineneti, meta nepinetewiya 'ikwewariki.

⁴ Hikixia nepiretima kenemitiyurieneni kepauka nemipatsieni kepauka nemikatihiritiariieka para hipame wakiita neminaki'eriwaniki”.

5 »Hiki yuxexuime kaniwarutakwewieni miki memite'apitikatei kutsiyarieya hetsia. Mexiakame mipai katiniutahiawe: “¿Kepaimeme pepirapine nekutsiyari hetsia?”

6 Miki mipai katinitahiawe: “Xeitsienituyari kixauriyari hatseiti”. Hiki mipai katinitahiawe: “Ka'i 'axapa kenanuhuri kepaïmemeki pemaye'uxa, kwiti mana kenayexi, xeime pita kenaka'utia huta tewiyari heimana tamamata maine”.

7 Mipaïta katinitahiawe xeime: “Ekita, ¿kepaïmeti peuyewetse pemirapikaki?” 'Iya rehawe: “Xeitsienituyari nekayari tiriku”. Mipai katinitahiawe: “Ka'i 'axapa kenanuhuri kepaïmemeki pemaye'uxa maine, xeime pita kenaka'utia nauka tewiyari maine”.

8 »Hiki kutsiyarieya 'aixia kanainekaitini ti'uximayatame hepaitsita tsepa heitseriemeki mikayianekai, timaiti miyianekaiki. Hiki miemete matsi metemaiti mekaniyaka yuteiterima wahapaitsita, hekariipa miemete yamekayiakaku wahapai.

9 Neta mipai nekatnix'e'utahiawe xeme, teiteri yupiniki yamekateniyurieka kemikatiheitserie, peru xeme yupiniki hipame xekeniwatemaw-ieritiaka, mipai xeteyurieti, kepauka pini mireutipare, xemeta xekanetanaki'eriwakuni hakewa kii mikahexiwetsie.

10 »Kemi'ane yamitikamie 'etsitipaimeme tihiritiarieti, miki yakatinikamiemiki xika waikawa hiritiarietika, kemi'ane heitseriemeki yamikatikamie 'etsitipaimeme tihiritiarieti, mikita yapikatikamieni xika waikawa

tihiritiarioka.

¹¹ Hipati pinitiarika yamekateniyurieka kemikatiheitserie, xeme xika yaxekatekahuni mipai 'aneme piinite hepaitsita xetehiritiarieti, ħkepaiki pitixehiritiani tita yuriki mitipiinite hepaitsita, yaxetekahume'erieteti? Hakewatsi.

¹² Xika yaxekatekahuni xeime piiniteya hepaitsita xetehiritiarieti, ħkemi'ane tita mitixepini pitixemini? Hakewatsi.

¹³ »Ti'uximayatame pikayiwe yuhutame yukut-siyarima wahetsiemieme miti'uximayakaki. Xeime kani'uxiwe'eriekamiki xeimeta naki'erieteti, yaxeimetsie katiniwiyamiki xeimeta xani'erieteti. Xepikayiwawe xemite'uximayakaki Kakaiyari hetsiemieme yupiinitetsieta xetewiyati».

¹⁴ Merikitsi paritseutsixi 'iki naime mekate-niu'enieni, miki tumini memihiwe'eriekaiki mekanitawe'eriekaitini.

¹⁵ Hiki Ketsutsi mipai katiniwarutahiawe: «Xeme yuri xekateniwa'eritiaka teiteri kename heitserie xeyia xe'utiyuati, peru Kakaiyari pimate xe'iyari. Tita teiteri mamariwaweme memitexeiya, miki pitixani'eriwa, Kakaiyari kemitixeiya.

Hipatita 'ikitiarika

¹⁶ »'Iniari niukiyari meta texaxatamete waniuki mekani'eniekaitini teiteri 'atsita Wani munuatsie. 'Ana mitiyehane niuki 'aixia manuyine pita kanikuxaxatsiwani Kakaiyari kemiti'aitatsie mieme, hiki yunaiti kwini mieme mekaniyuwairiyani hetsiena memitewiyaniki.

¹⁷ Matsi pikakwaniwe muyuawi meta kwie meutipareki, peru kwini mieme pikwaniwe

xei'utiari kayari xeihi xiyari mika'aye'aniki 'iniari niukiyari kemaine.

¹⁸ »Kemi'ane 'iku'eirieme yi'iya, xeime pita mitiwitini, miki xeime pita kanikumaiwani, meta kemi'ane mitiwitini 'uka muku'eiriwaxi, mikita kanikumaiwani xeime 'iyaya.

Xiku meta Ratsaru

¹⁹ »Merikitsi tewi 'aniuyeikakaitini xikutiti, tatairawime kananakatikikaitini, rinu 'ixurikiyari meta tukariki 'aixia ti'anemeki katinikwakaitini.

²⁰ Xewiti tixaiti mikarexeiya Ratsaru titewati mana kani'atariwakaitini xiku kitenie, kaneku'etsakaitini.

²¹ Kanihuxaimikikaitini, tikwaimiti tita miranakawiwiwekai xiku mexayatsie. Tsikiri 'ahurawa me'akikati mekanikatsenakaitini 'etsaya.

²² »Merikitsi tixaiti mikarexeiya kaniumini, Kakaiyari hetsia miemete niuki tuayamete mekanenutiwitini 'Apirahami 'aurie. Metatsiere xiku tiumi tiukateukie.

²³ Mikite watsata 'ukaiti xiku kananukuniere 'uximatarieti, 'ateewa paiti kanixeiya 'Apirahami meta Ratsaru 'auriena 'utikaime.

²⁴ Hiki mipai katiniuhiwa: “Nepaapa 'Apirahami, kenenenenimayaka, Ratsaru kenani'a yu'itiwame kitsimeyari tahawiyame minetsixeriyaki nenenitsie, nemi tiuka'eniwaki 'ena taipa”.

²⁵ Hiki 'Apirahami mipai kaniutayini: “Neniwe, kena'eriwani 'aixia 'anemeki pepuyeikakai kepauka pemayeyurikai, peru Ratsaru 'aixia 'anemeki pika'uyeikakai, hikiri miki 'uwa kaninitiarieka, 'eki pita pepi'uximatarietie.

26 Miki meta, xeme tame tahixiata 'aki 'emeukatewa putseiriyarie, para 'ena memikayiwaweniki tsepa memanukiniku xehetsia paiti, meta para muwa memiye'uwa tahetsia paiti memika'anakineki”.

27 »Hiki xiku mipai kaniutayini: “Nepaapa, nepimatsiwawirie Ratsaru pemanuni'aniki nepaapa hetsia,

28 yu'auxiwime nepiwarexeiya ne'iwama, miwaraye'eritianiki, kapa mikita 'uwa me'u'axianiki 'uximatiarika maxuawe”.

29 Peru 'Apirahami mipai katinita'eiya: “Muitsexi xapaya mekanexeiya, texaxatamete waxapa, mekewa'enieka miki kememutiyuane”.

30 Xiku mipai katinitahiawe: “Tixai nepaapa 'Apirahami, matsi xika xewiti mikite watsata mieme wahetsia henuani, mepitehehayewa kememiteheyurie”.

31 'Apirahami mipai katinitahiawe: “Xika mekawa'enieka Muitsexi meta texaxatamete, tsepa xewiti manukukenike mikite watsata, mepikayuwairiyanikeyu”».

17

'Axaxikatiuyurieni, yuri kemit'erieka meta kemireuyewetse

¹ Mipaia katiniwarutahiawe yuhetsia miemete teyi'ikitiwamete:

—Peuyewetse teiteri memikunuitarieniki, peru xia'ui kemi'ane miwakunuitiani.

² Hetsiena mieme matsi 'aixia piyini xika mata 'akatitarieme yukiipitia, xika haramaratsie

heukahiyanike, kapa 'ikunuitianiki xeime 'iki tsepa waikawa memikamamariwawe.

³ Xekeneyi'iwiyani xeme.

»Xika 'a'iwa 'axatiuyurieni, keneutati'a, xika tiuhayewa kemitiyurienekai, ketineuyehiwiri.

⁴ Tsepa xeutukaritsie mīxa 'axamatsi'uyurieni 'atahutamexia, tawarita xika 'atahutamexia nuanike 'ahetsia, mipai 'utaiti: “Nepitihayewa kenetineuyehiwiri”, 'ekita ketineuyehiwiri».

⁵ Hiki ni'ariekate Ti'aitame mipai mekatentahiawe:

—Ketanepitiaka matsi waikawa yuri temite'eriekaki.

⁶ Ti'aitame mipai katiniwarutahiawe:

—Xika xeme mutsitatsa 'imiariyari hepai 'etsipemeki yuri xete'eriekake, xepiyiwawenike mipai xemite'itahiawe 'iki xapa mana muwe: “Keniwatihuni, hamaratsie pita keneuka'iteitsie”, yapitikamienikayu kexemutiyuane.

⁷ »Xewiti xeme xika ti'uximayatame hexeiyani mukwietsanane, yamuxatsi miwahine, xika nuani ti'uximayatame retahayewame, ¿mipai titahiawe: “Kenaye'a xeiya, ketinekwaka”?

⁸ Pikatixai, ¿mipai matsi kutsiyari katitahiawe: “Aixia ketineuyuri para nemitikwaniki ne, kene'atikemaritia kena'ahia kenetineumikwa mexi netikwa'a mexi neti'ie, hiki 'ariketa pepitikwani pepiti'ieni 'ekitari?

⁹ ¿Pamipariyutsi tipitiani ti'uximayatame yatiyurienekaku kemitiu'aitarie? Tixai xiari.

¹⁰ Xemetari yaxeixia, kepauka yaxemiteyurieka naimexemite'u'aitiarie, mipai xekeneutiyuaneni: “Te'uximayatamete tekanihikitini xeixia, tixaiti tahetsie pikatinake, kemireuyewekai xeixia tepite'uyuri”».

Tamamata kememite'u'itiya kwiniyaki

¹¹ Merikitsi Kerutsareme tamieti, Tsamariya kwieyari Karereya kwieyari mayunakekaitsie kaniuyemiekaitini.

¹² Xeime kiekaritsie ta'aximekaku tamamata teiteri menenukunake kwiniyaki memika'itiatikatei. Tewa meti'uti

¹³ mekaniutihiwakaitini mipai me'utiyuati:

—Ketsutsi 'aku, Ti'ikitame 'aku, ketaneutineni-mayata.

¹⁴ Waruxeiyaka mipai katiniwarutahiawe:

—Xekenehu mawari wewiwamete memixexeyaki.

Hiki me'uhuti me'itiatikaiti mekanakine.

¹⁵ Hiki xewiti miki 'unieroka kemiranayehiia, pukunua 'aixia 'utaiti Kakaiyari hepaitsita, karima 'utaniuti.

¹⁶ Kaniutihiximakeni Ketsutsi hetia pamipariyutsi 'ipitiat, miki Tsamariya kaniekametikaitini.

¹⁷ Hiki Ketsutsi mipai kaniutayini:

—¿Tamamata mekate'u'itiya? ¿'Atanaukati keme-teheuyunixi?

¹⁸ ¿Xewiti tawari katiukunua para 'aixia mitayiniki Kakaiyari hepaitsita, 'iki xeixia xaitsie kiekametiti?

¹⁹ Hiki mipai katinitahiawe:

—Kenanukukexi kenemie, yuri pemitiuta'eriki 'ayumieme peputawikweitsitarie.

Kepauka tukari maye'ani Kakaiyari mitsutiani ti'aitati

(Ruk 17:26-27 - Mat 24:37-39)

²⁰ Merikitsi paritseutsixi mekaniku'iwawiyakaitini kepauka maye'aniekai tukari para Kakaiyari mitsutianiki ti'aitati. Mipai katiniwarutahiawe:

—Taniereti xeikia 'atsipikaretimani kepauka mitsutiani ti'aitati Kakaiyari.

²¹ Pikayiweni mipai mitayini: “Kami 'ena. Kami huma”. Kemiti'ane Kakaiyari ti'aitametikaku, 'ari xetsata kanitsutiani ti'aitati.

²² Hiki mipai katiniwarutahiawe teyi'ikitiwamete:

—Tukari kanaye'amiki kepauka mipai xemutiyuaneni: “Xika tima 'aye'anike Yuri Tewi tukarieya tsikere xewiti”. Peru xepika'ixeiya miki tukari.

²³ Mipai mepitexetahiawe: “Kami huma peyeika. Kami 'ena”. Muwa xepikaheuhuni, xepikawareweweyani.

²⁴ Merikariya muyuawitsie naitsarie kemitihekiariwie 'umerikati tatserieta ta'utata paiti, mipaita yaxeikia nepitimatsikire naitsarie netukari 'aye'ayu ne Yuri Tewi.

²⁵ Perutsi kaneuyeweka meri waikawa nemitikwineki, meminetsitixani'erieniki hiki miemete teiteri.

²⁶ Kemitiuyi kepauka Nuhexi 'amuyeikakaitsie, mipaita yaxeikia katiniyimiki kepauka Yuri Tewi munuani.

²⁷ 'Ana mepitekwatiwekai, mepi'ietiwekai, mepineketiwekai meta mepitewikitiatiwekai, kepauka Nuhexi meutaha kanuwatsie, 'ana haa tiyaka yunaime katiniwareuyehiani.

²⁸ »Mipairita kemitiuyi kepauka Ruti 'amuyeikakai yapitiyini: 'Ana mepitekwatiwekai meta mepi'ietiwekai, mepitenanekai meta mepitetuakai, mepuka'etsakai meta mepikitiwekai.

²⁹ Tukari 'aye'aku kepauka Ruti meyetia Tsurumatsie, 'ana muyuawitsie tai 'atsupireyari kaniukawiye, yunaime kaniwareuyehiani.

³⁰ »Mipaita katiniyimiki kepauka nematsiikiti nemayani, Yuri Tewi kenemititewa.

³¹ 'Iya tukaritsie, kemi'ane yukii heima makakani, yupiinite yukiita xika tiyepika, miki 'anakayame pikatiwayepineni. Yaxeikiata kemi'ane yuwaxata meyeika yu'utima pikahakununuwani.

³² Xekena'eriwani Ruti 'iyaya kemu'itiarie.

³³ Kemi'ane yutukari yemeki miwikweitsitiamiki kanitatimaiyamiki, kemi'ane mitatimaiya, miki kanitawikweitsitiarimiki.

³⁴ Mipai nepixerahiawe, 'iya tikaritsie yuhutati mepikahini xel'utayaritsie: xewiti kananutiwitikiemiki, xewitita kaniku'eiriwamiki.

³⁵ Yuhutati 'ukari mepitixini 'axeikia: xewiti panutiwitikieni xewitita kaniku'eiriwamiki.

³⁶ Yuhutati waxata mepe'uwani: xewiti panutiwitikieni, xewitita piku'eiriwa».

³⁷ Mipai mekatenitahiawe:

—Ti'aitame, Ɂhakewa mipai pireyini?

Mipai katiniwarutahiawe:

—Kanimatsiikini kaxari tsepa hakewa meka,
mana mekaniyukuxeirikuni wirikixi.

18

Wiura meta 'itsikame niukiyari

¹ Merikitsi 'iki 'ixatsi hepaitisa tikuxatati mipai katiniwaruta'ikitiani kename heuyewetse yuheyemeki miyunenewiekaki, kawairipieti.

² Mipai kaniutayini: «'Itsikame xeime kiekaritsie kanekateitini, Kakaiyari pikamakarikai, pikawa'eniekai teiteri.

³ Merikitsi 'uka kinaya mumi mana kanekateitini miki kiekaritsie, 'itsikame hetsia kani'axekaitini mipai 'utaiti: “Heitserie kenene-upitia minetsi'aye'unie yamikatiyurieneniki”.

⁴ Miixa pikayuwairiyakai 'itsikame, peru 'arike mipai katiniyikihawekaitini: “Tsepa nemika'imakaxe Kakaiyari, tsepa nemikawa'enie teiteri,

⁵ 'iki 'ukaratsi kinaya mumi kanetini'uxitiaka, mekuxi heitserie nekanipitiamiki, tawariri mikanetsi'uximatiakaki”».

⁶ Merikitsi Ti'aitame mipai kaniutayini: «Xekani'enieni niukieya kemutayi miki 'itsikame heitseriemeki yamikatiyurienekai.

⁷ ¿Kakaiyari matsi heitserie katiwapitiani miki miwaranayexei tukariki tikariki memihiwie? ¿'Areutere kawaparewimiti?

⁸ Yanepitixekihawe, kwiti heitserie kaniwapitiamiki. Matsi, kepauka nemunuani Yuri Tewi nehikititi, ¿yuri mete'eriekame netiwataxeiya kwiepa 'aku?»

Paritseu meta tiwawame niukiyari

⁹ 'Ipaïta katini'ikitakaitini 'ixatsi hepaitisita tikuxatati, hipati yuhetsie yuri memite'eriekaiki kename heitseriemeki yametekahukai, mewaxani'erietî hipame, miki mipai katiniwarutahiawe:

¹⁰ «Teiteri tukipa mekaneutiyune meytane-newienike yuhutati, xewiti paritseu pihikitikai, xewitita tewi kuwiexinu hetsiemieme tiwawame pihikitikai.

¹¹ Merikitsi paritseu mana 'utakeka nenewieri kaniyupitiakaitini mipai 'utaiti: “Kakaiyari, pamipariyutsi nekamanipitiaka hipame teiteri wahapai nemika'aneiki ne —miki mepitenawaya, heitseriemeki yamepikatekahu, hipame wa'itama mepiwakumaiwa— meta nitsikere 'iki tiwawame hepai nepika'ane.

¹² Ne matsi hutakia nepunetihakiwa xexuime tsemanatsie, ne'iwatika tamamatatsie mieme xeime nepiyetuaya tukita”.

¹³ Hiki tiwawame yatewa 'uweti pikayuwairiyakai tsikere yuheima meutiniereki, matsi yutawitsie yukuhutsunati hiwerikaki mipai kaniutainekaitini: “Kakaiyari 'aku, kene'awairiya 'aixia peminetixeyaki, 'axanetiyyuruwametime”.

¹⁴ »Mipai nepitixekihawe, miki matsi yukie kaneyani heitserie hexeyati, paritseu pikatixai. Yunaiti yuxaita mariweme memayuyeitiwa tixaiti mekatehikititi mekanayeitiariyekuni, peru kemi'ane tixaiti katihikitime mayuyeitiwa miki mariweme kanayeitiariemiki».

Ketsutsi kemitiuyuri t#ri wahetsie

(Ruk 18:15-17 – Mat 19:13-15, Mar 10:13-16)

15 Merikitsita tiiri mekaniwa'atiwakaitini hetsiana wahetsie mutimeniki. Mewaruxeiyaka, teyi'ikitiwamete mekaniwarutate'akaitini memiwa'atiwakai.

16 Peru Ketsutsi yu'aurie kaniwarutahiawe tiiri mipai 'utaiti: «Xekeniwapitiaka tiiri nehetsia memi'axeniki, wahixie xepika'u'uka, mipai memi'anene kaniwahetsiemietini Kakaiyari mira'aita.

17 Yuriki mipai nepixerahiawe, kemi'ane mika'itanaki'erieni Kakaiyari kemiti'aita nunutsi hepai yuri ti'eriet, pikayiwe mana meutahani».

'Uki mixikutikai

(Ruk 18:18-30 - Mat 19:16-29, Mar 10:17-30)

18 Merikitsi xewiti teiteri watsata mexiakametiti mipai katinita'iwawiya:

—Ti'ikitame 'aixia pemiuka'iyari, ¿tita reuyewetse kenetiyurieni, nehetsie mitinakeki tukari mikaxiwe?

19 Ketsutsi mipai katinita'eiya: ¿Titayari 'aixia netiuka'iyarime penetixata? Tewi 'aixia mitiuka'iyari 'apika'uyeika, Kakaiyari yuxewiti 'aixia pitiuka'iyari pita.

20 'Ekitsi 'aitsikate pepimate: “Xeime 'iyaya kinaya pepikakumaiwani, pepikati'amemiwani, pepikatinawayani, xeimetsie pepikarahipani peti'itawati, 'apaapa meta 'amaama keniwareu'enieka”.

21 Iya mipai katinitahiawe:

—Miki naimetsie yanepitikamie temaikiyari paiti.

22 Ketsutsi 'u'enaka mipai katinitahiawe:

—'Akuxi xewiti xeikia peuyewetse yapemitiyurieni: kinitetua 'apiinitiarika naime, ketiniwarutamikwa haweri memi'anene, mipai petiyurieme waikawa perexeiyati pepayani taheima. 'Ana kenaye'a nehetsie ketineuwiya.

²³ Kepauka tewi 'iki niuki mu'eni, waikawa kaniyukahiwerieni waikawa mirexeiyakaiki.

²⁴ Hiki Ketsutsi 'ixeyaka waikawa yuheiw-eriekame, mipai kaniutayini:

—Kanikwaniweni xikutsixi memeutahaxianiki Kakaiyari mira'aitatsie.

²⁵ Yuriki matsi, pikakwaniwe kameyu 'iwipame hixieyatsie manuyehaniki matsi pikwaniwe xiku meutahaniki Kakaiyari mira'aitatsie.

²⁶ Memi'enanakai mipai mekaniutiyuani:

—Kamitsi, ¿kemi'ane piyiwe mitawikweni?

²⁷ Ketsutsi mipai kaniutayini:

—Teiteri titatsie memikateyiwawe, Kakaiyari hetsiemieme katiniiyiweni.

²⁸ Hiki Pekuru mipai kaniutayini:

—Neuxei, tame tapiini tepite'uku'eiri naime 'ahetsie temitewiyaki.

²⁹ Ketsutsi mipai katiniwarutahiawe:

—Yuriki mipai nepixerahiawe, kemi'ane mitiuku'eiri Kakaiyari kemiti'aita hetsiemieme yukii, yi'ya, yu'iwama, yupaapama yatini yitiriyama,

³⁰ miki kwini mieme matsi waikawa warexeiyati kanayeimiki hiki, meta tukari 'umamiet-sie kepauka maye'ani, tukari mikaxiwe hexeiyati kanayeimiki.

*Tawari Ketsutsi kemutayi kemitimierienikekai
(Ruk 18:31-33 - Mat 20:17-19, Mar 10:32-34)*

³¹ Hiki tamamata heimana memiyuhuta yatewa warewitika mipai katiniwarutahiawe: «Neuxei, Kerutsareme tekanitahuni hiki, naiti kemire'uxa Kakaiyari niukametemama waxapatsie Yuri Tewi hepaitsita, naiti katinaye'amiki.

³² Nekaniyetuiyamiki miki memikahuriyutsixi wahetsia. Nekanitewiyatsitariemiki, 'axanekatinitahiawariemiki,

³³ mekaneniti'aitsikawiyakuni meha'ati, hiki menetsikuwaxiame mekanenimiekuni. Peru hairieka tukari 'aye'ayu nekananukuketiariemiki».

³⁴ Miki 'atsimepikatemalaikai tita mitixataikai. Niukieya matsi pi'awietsiekai wahetsiemieme, 'atsimepikatehetima kemitikuxataikai.

*Makipekai kemiranutanierixi kerikutanaka
(Ruk 18:35-43 - Mat 20:29-34, Mar 10:46-52)*

³⁵ Merikitsi Keriku kiekariyaritsie 'aye'aximekaku Ketsutsi, xewiti tewi mikaheuniere mana huye tetsita kaniukateitini tiwauti.

³⁶ Hiki waru'enieka yumireme teiteri me'anuyekikame kaniuta'iwauni kemitiyianekai.

³⁷ Mipai mekatenitahiawe kename Ketsutsi nat-saretitanaka mana 'uyemieikai.

³⁸ Hiki mikaheuniere karima kaniutahiwa mipai 'utaiti:

—Ketsutsi, Rawiri peminu'aya, keneneutineni-mayata kwerieti.

39 Memanuyetekai mekanitate'akaitini kayuwati mitikaniki, peru matsi miki karima mipai katiniuhiwakaitini:

—Rawiri peminu'aya 'aku, keneneutinenimay-ata kwerieti.

40 Hiki Ketsutsi mana 'utakeka kanita'aita mahaniéniki hetsiana. Nuaku 'auriena mipai katinitahiawe:

41 —¿Tita pereuyehiwa kenetiyurieni 'ahetsiemieme?

Miki rehiawe:

—Ti'aitame, nepeunierenikeyu.

42 Hiki Ketsutsi mipai katinitahiawe:

—Peheuniereti kenaye'a. Yuri pemiti'erieki 'aixia pe'aneti pepatia.

43 Yapauka heuniereti kanayani. Hiki 'aixia 'utaiti Kakaïyari hepaitisita, Ketsutsi 'utia kaneyani, meta yunaiti teiteri memixei witsimekaniutiuyanekaitini Kakaïyari hepaitisita.

19

Tsakeu kuwiyexinu hetsiemieme tiwawame

1 Hiki heutahaka Kerikutsie hixiata kaniuyemiekaitini.

2 Merikitsi tewi mana kaniukateitini Tsakeu titewati, miki tewawamete katiniwa'aitiwametikaitini kuwiyexinu hetsiemieme, pixikutikai.

3 Kanixeyamikikaitini Ketsutsi kemipaikitikai, peru 'etsimutewikaiki puyutatexi teiteri memiyumiirekaiki.

4 Wahixie 'utanautsaka wapaiti kanitimake xapatsie mixeyiyaki, mana muyeyanikekaiki.

⁵ Hiki Ketsutsi mana 'uyemieti kaneutiniere, mipai katinitahiawe:

—Tsakeu, kenakamaki xeiya. Peuyewetse 'akita nemenuaniki hiki.

⁶ Kwitiwa kanakamake, yutemawieti kanitanaki'erieni yukiita.

⁷ Me'ixeiya yunaiti mekaniniukixiekaitini hepaitsitana mipai me'utiyuati: «Tewi 'axatiyuruwame hetsia punua».

⁸ Peru Tsakeu mana 'uweti mipai katinitahiawe Ti'aitame:

—Neuxei, Ti'aitame: Nepiinite hixiata 'arikame nepitiwamini tixaiti memikatehexeiya, 'itarikaki kenemitiwakwamanakai hipame, naukameki nepirapika.

⁹ Hiki Ketsutsi mipai katinitahiawe:

—Kami, 'iki kie kiekatari meputawikweitsitiarie hiki, 'ikita 'Apirahami kanixiyarieyatini.

¹⁰ Yuri Tewi kenemitiwewa, nekaninuani nemiwakuwauneniki miki memeyexirie nemiwatawikkweitsitianiki.

Tumini niukiyari

¹¹ Merikitsi 'iki me'eniekaku tawari 'ixatsi hepaitsita tikuxatati katiniwaruta'ikitiani, Kerutsareme mehurakaiki, meta teiteri mipai memiteku'eriwakaiki kename kwiti 'itsutianikekai ti'aitati Kakaiyari matsiikiti 'ayame.

¹² Mipai kaniutayini: «Tewi we'eme minu'ayatikai tewa kaniyemiekaitini xeime kwieyaritsie, mana ti'aitame mayeitiarieniki, 'arikeke kaninuaniekaitini.

¹³ Hiki tamamata yuhetsia miemete te'uximayatamete warutakwewieka yuhixie,

tumini kaniwaru'itiani xeitsienituyari yuxexuime. Mipai katiniwarutahiawe: “Xekenemiiriyani 'iki tumini mexi nekanuawe”.

14 Merikitsi hetsiana miemete kiekatari mekani'uxiwe'eriekaitini, niukamete mekaniwareni'ani 'utimana mipai me'utiyuati: “Tame tepika'inaki'erie 'iki mitati'aitiakaki”.

15 »Peru miyatiti, ti'aitame kanayeitiarieni. Kepauka makunua yukwieyaritsie, katiniuta'aita hetsiana memi'axianiki te'uximayatamete tumini miwaru'itiakai, yamiretimaniki yuxexuiti kememite'itimiriayaxia.

16 Merikitsi mexiakame kaninuani mipai 'utaiti: “Neti'aitiwame, 'atumini xeitsienituyariki, tamamata tsienituyari nepana'iwaxi”.

17 Ti'aitame mipai katinitahiawe: “Aixia pepitiuyuri, ti'uximayatame 'aixia pemituuka'iyari pekanihikiti, 'etsitipaimeme petiuhiritiarieka yapemitikatiaki, heitserie nekamenipitiamiki tamamata kiekariyaritsie kuwexinaruri pemayaniki”.

18 Hiki xewiti kaninuani mipai 'utaiti: “Neti'aitiwame, 'atumini xeitsienituyariki, 'auxiwi tsienituyari nepana'iwaxi”.

19 Ti'aitame mipai katinitahiawe: “Ekita nekanihiritiamiki 'auxiwime kiekariyari”.

20 »Hiki xewitita kaninuani mipai 'utaiti: “Neti'aitiwame, kami 'atumini, nepi'utakai tuwaxaki 'eimeme.

21 Nematsimakati tewi pemitu'akawawiriemiki pemihikiki: pemenu'uwe tita pemikatiyetua meta pemika'itsana tita pemikatiuka'e”.

22 Ti'aitame mipai katinita'eiya:
 "Ti'uximayatame 'axapemitiuka'iyari, 'ahetsie
 pepirahipa 'akimana kepemutayi. 'Ekitsi mipai
 pepitimaikai kenemitiuyukawawiriemiki,
 nemenu'iwe tita nemikatiyetua meta
 nemuka'itsana tita nemikatiuka'e.

23 Kamitsi, titayari tsikere netumini pekatiyetua
 tumini hiwemete wahetsia, ne nenuame
 nemwaye'inikekai mena'iwaxi?"

24 Hiki mipai katiniwarutahiawe mana
 memitanenierekai: "Miki tumini xekeneu-
 nawairi, meta xekeneu'itia 'iya tamamata
 tsienituyari mexeiya".

25 Mipai mekatenitahiawe: "Ti'aitame, tama-
 mata kanexeianiri miki".

26 Mipai katiniwarutahiawe ti'aitame: "Mipai
 nepixerahiawe, kemi'ane tixaiti mirexeiya, tawari
 matsi pitimikieni, peru kemi'ane mikarexeiya,
 tsepa 'etsiwa mirexeiya katininawaiyariemiki.

27 Miki meta meminetsi'aye'uniekai
 memikanetsinaki'eriekai netiwa'aitiwame
 nemayaniki, xekeniwarahapaka, nehixie
 xekeniwarukuya"».

Kerutsareme kiekariyaritsie kemireutaha

*(Ruk 19:29-38 - Mat 21:1-9, Mar 11:1-10, Wa
 12:12-15)*

28 Merikitsi mipai 'utayika kaneyani
 Kerutsareme tiyuneke.

29 Kepauka Wetipake meta Wetaniya kiekari-
 yaritetsie mita'aximekai, yemuri Huriwa Mati'u
 mirakutewatsie hetia, teyi'ikitawamete yuhetsia
 miemete yuhutame kaniwarutani'ani,

30 mipai haiti: «Kiekari 'anutaie mukumat-sie xekenehu, meta mana xemeutahaxianitsie, xepeitaxeiya puxu temaiki hakuwiekame, tewi hetsiena mika'anutiyeriwe 'akuxi. Xekenakuxina meta xekenahani 'ena.

31 Xewiti xika mipai tixeku'iwawiyani: “¿Titayari xete'ekuxina?”, mipai xeketenetahiawi: “Ti'aitame peiyehiwa”».

32 Hiki memutani'arie mekanekine, mekaneitaxeiya kemitiwarutahiawixi.

33 Puxu temaiki me'akuxinakaku, kutsiyari-mama mipai mekateniwarutahiawe:

—¿Titayari xete'ekixina puxu temaiki?

34 Miki mipai mekateniwarutahiawe:

—Ti'aitame peiyehiwa.

35 Hiki Ketsutsi hetsia mekaneihana. Hikita yi'ikarite me'anuti'itaka puxu temaiki hetsie, Ketsutsi mekananutiyeni.

36 Kepauka mumiekai, teiteri mekani'itiximekaitini yi'ikarite huyeta.

37 Hiki Huriwa Maku'u yemuriyari hetia wiyeta me'ukahuti, yunaiti teyi'ikitiwamete meyumireti meyutemamawieti mekanitsutiani karima 'aixia me'utiyuati Kakaiyari hepaitsita, naime kememite'uxei tirikaiyemek kemitiuyi hepaitsita, mipai me'utiyuati:

38 —'Aixia ke'itiarieka Ti'aitame 'umamie Tati'aitiwame hetsia miemetiti.

—Taheima 'aixia meketeyuxeiyani, wapaiti witsimeke'utiyuaneni.

39 Hiki paritseutsixi hipati memu'uwakai teiteri watsata mipai mekatenitahiawe:

—Ti'ikitame, 'ahetsia miemete keniwarutati'a teyi'ikitiwamete.

⁴⁰ Mipai miki katiniwarutahiawe:

—Mipai nepixerahiawe, 'iki xika kayuwati me'umakake, tetexi pita mepitihwakeyu.

Ketsutsi tukita

(Ruk 19:45-46 - Mat 21:12-16, Mar 11:15-18, Wa 2:13-16)

⁴¹ Merikitsi 'ahurawa 'umieti 'ixeyaka kiekari, kaniutatsuani he'eriwati,

⁴² mipai 'utaiti:

—'Ekititi tsikere 'iki tukaritsie xika tima peheitimanike tita mireuyewetse para 'aixia pemitixeyariekaki. Matsi kaniuti'awietsieni hiki 'ahixiki pemika'ixeyaki.

⁴³ Tukari kanaye'amiki, 'ana miki memimatsi'aye'unie kuya tetsariyayari mekaniti'uitiakuni 'a'aurie, 'ana 'a'aurie mekaniti'uikuni, para teiteri memikawayekineki.

⁴⁴ Mekamanatihakuni kwiepa 'eki meta 'ateiterima 'ahetsie memiyetei mepatixiriyani kwiepa. 'Ahetsie tete xewiti pikaku'eiriwa yuheima 'ateti, mipai katiniyimiki 'eki yuri pemikatiuta'eriki kepauka Kakaiyari munua matsitawikweitsitianeke.

⁴⁵ Meta Kakaiyari tukieya kuraruyarita ka-neutahani hiki kanitsutiani waranuyeweweyati muwa memitetuakai,

⁴⁶ mipai katiniwarutahiawe: «'Ipai katine'uka: “Nekii nenewieri kiyari pihikitini”. Peru xeme teri xekanayeitiani “hakewa tenawayamete memeyu'awieta”».

⁴⁷ Merikitsi tukariki katini'ikitakaitini tuki kuraruyarita, mawari wewi-wamete tewa'aitiwamete, meta 'iniariki memite'ikitametetikai, meta teiteri wa'ukiyarima yunaiti mekanikuwautiwekaitini me'imienike.

⁴⁸ Peru miki mekaniyutatexieni mipai meteyurienike, yunaiti teiteri memi'eniekaiki me'ihawe'erieti niukieya.

20

Ketsutsi heitserie kemirexeiyakai

(Ruk 20:1-8 - Mat 21:23-27, Mar 11:27-33)

¹ Merikitsi heiwa teiteri tiwa'ikitiakaku tuki 'amipa kuraruyarita, niuki 'aixia manuyine wakuxaxatiwakaku, mawari wewiwamete tewa'aitiwamete meta 'iniariki memite'ikitametetikai meta 'ukirawetsixi hurawa mekanukine.

² Mipai mekatenita'iawawiya:

—Ketatineutaxatia, ¿Hakewa miemeki heitserie pehexeyati miya pepitiyuriene? ¿Kemi'ane miki heitserie pimatsi'upitia?

³ Ketsutsi mipai katiniwaruta'eiya:

—Netatsiere nepixeta'iawawiya xeme. Yaxekeneteneutahiawi:

⁴ Wani kemiti'iyane kai, ¿taheima timiemetikai, nutsu teiteri wahetsia pimiemetikai?

⁵ Miki, mipai mekateniyutahiawekaitini: «Xika tame mipai te'utiyuani: “Taheima makawe pipitiakai”, miki mipai pitatitahiawe: “Merikite, titayari yuri xekate'ita'eriri”.

⁶ Xikata mipai te'utiyuani: “Teiteri mepipitiakai”, yunaiti teiteri teteki

mepitatsitituaxa, yuri memite'erieki kename Wani Kaka'yari niukameya hikitikai».

⁷ Hiki mipai mektenita'eiya:

—'Atsitepikatemate hakewa mieme mepitiariekai.

⁸ Mikita mipai katiniwarutahiawe:

—Merikite, neta 'atsinepikatixetahiawe kemi'ane heitserie minetsi'upitia yanemitiyurieneniki 'iki naime.

*Te'iwiyamete 'axamemite'u'iyari niukiyari
(Ruk 20:9-19 - Mat 21:33-46, Mar 12:1-12)*

⁹ Merikitsita kaniwarutaxatiani teiteri 'iki 'ixatsi 'iniariki mitikuxata mipai 'utaiti:

—Tewi kaxie haraweriyari kaniutawewieni, te'iwiyamete kaniwaruhiritiani wakwetatiati, hiki 'ateewa paiti kaneyani miixa heuyehunike.

¹⁰ Hiki tukari 'aye'aku matikwakwaxetsie, xeime ti'uximayatame kaniutani'ani te'iwiyamete wahetsia memiyetuirieniki harawerita timieme yapaimeme kutsiyari hetsiemieme. Peru te'iwiyamete mekanitiwaxiani meta yumaweme mekaneni'ani.

¹¹ Hiki tawarita xeime ti'uximayatame kaniutani'ani, peru mikita mekaneitiwaxiani, mekaniti-tieni meta yumaweme mekaneni'ani.

¹² Tawari hairieka xeime kaniutani'ani, mikita mekanixuritiani meta mekaneyeweia.

¹³ »Hiki kaxie haraweriyari kutsiyari mipai kaniutayini: “¿Keri netiyurieni? Neniwe nepanuni'ani neminaki'erie, yuriki miki hirixia mekanetimakakuni”.

¹⁴ Peru, kepauka te'iwiyamete memixei, niuki mekanitixiatatikine mipai me'utiyuati: “Iki

hetsie 'arike katininakimiki kutsiyari tipiinieya. Hikimi tepimieni, tita hetsiena mitinaekeke kai tapiini pirayani”.

¹⁵ Hiki haraweri warie mekaneikahiani meta mekanimieni.

»¿Kewayurieni haraweri kutsiyari?

¹⁶ Kaninuamiki, kaniwakwimiki miki te'iwiyamete, hipame pita kaniwahiritiamiki yuharaweri».

Miki memi'enanakai mipai mekaniutiyuani:

—Mipai mikatiniuyinike.

¹⁷ 'Iya waxeyati mipai kaniutayini:

—Merikite, xika mipai katiuyini, ¿titayari 'ipai raine 'utiarika:

»“Miki teté memitixani'eri kii wewiwamete, miki teté 'itsikina mieme kanayani”?

¹⁸ Yunaiti miki tetetsie memikaxirieni mepitanexiani, xika miki teté xeime hetsie 'ukaweni, kwauni xeikia pitanexiani».

¹⁹ Merikitsi 'ana miki 'iniariki memite'ikitametetikai meta mawari wewiwamete tew'a'itiwamete mekatenikuwautiwekaitini kememite'iwiyaki, mipai metehetimaika miki miwaxatakaiki miki 'ixatsi hepaitsita ti'ikitati, peru mekaniwa-makarikaitini teiteri.

Kuwiyexinu tuminieya

(Ruk 20:20-26 - Mat 22:15-22, Mar 12:13-17)

²⁰ Hiki me'itihupienike mekaniwarutani'ani 'awie nenieremete teiteri heitseriemeki yamemitekahu wahepai meteyumaikame. Me'iwiyame niukieyaki mekaniyetuanikekaitini, kuwexinaruri mita'iwawiyaki 'itsikame.

21 Hiki miki mekaniku'iwawiyakaitini mipai me'utiyuati:

—Ti'ikitame, tame tepitemate 'eki heitseriemeki pepitikuxata, heitseriemeki pepiti'ikita. Yiki pepikatiwaxeiya teiteri, matsi Kakaiyari huyeya hepaitsita pepiti'ikita yuriki.

22 ¿Ti'aitame Tsetsaxi tumini kemitiwawa, 'aixia ti'ane temiteyutuaka nutsu pikatixai?

23 Timaiti kememite'i'iriwiyakai, mipai katini-warutahiawe:

—Titayari xenete'iniatatiwe.

24 Tumini xekeneneuxeitsitia. ¿Kepai ramu'u pira'uxa, kepai pira'utiarika?

Miki mipai mekatenitahiawe:

—Tsetsaxi mu'uya kanihikitini meta pi'utiarikaya.

25 Mipai katiniwarutahiawe:

—Kamitsi xeketeneyetua Tsetsaxi hetsia tita Tsetsaxi hetsia mitimieme, meta xeketeneyetua Kakaiyari hetsia tita Kakaiyari hetsia mitimieme.

26 Mepiyutatexi niukieyatsie me'iwiyakuti teiteri wahixie, mehixiyati miya mitiwarutahiawixiki, kayuwati mekaniutamare.

Mikite kememite'anuku'uni hepaitsita

(Ruk 20:27-40 - Mat 22:23-33, Mar 12:18-27)

27 Merikitsi hipati tsarutseutsixi meka-niu'axiani, mipai memutiyuanekai kename mikite meka'anuku'uwe, hiki mipai mekatenita'iwawiya:

28 —Ti'ikitame, Muitsexi mipai katiniu'utiani tahetsiemieme, tewi xika 'umini xika 'uka 'uku'eirieni tiri kawarayexeyaweti, mutaya

kanitiwiti miki yukwe, tiiri miwarayexeiya matsieya nuiwarieya memakineki.

²⁹ Merikitsi 'amenititekaitini 'iwamarixi 'atahuta meyupaimeti. Wamatsika 'utineikeka kaniumini tiiri kawarayexei yaweti.

³⁰ Hiki hutarieka mieme

³¹ meta hairieka mieme mekanitiwiti miki 'uka, mipai yaxeikia 'atahutati yunaiti mekanik-wini tiiri mekawarayexei yaka.

³² Imatirieka, kaniuminita 'uka.

³³ Merikite, kepauka xeniu memanuku'uni, 'atahutati memitiwiti, k'kemi'ane ra'iya pirayani?

³⁴ Hiki Ketsutsi mipai katiniwarutahiawe:

—Hiki miemete teiteri mepineneike mepiwikie.

³⁵ Miki wahetsie mitinake miki kwie mihekwatsie memaye'axianiki, wahetsie mitinake memanuku'uniki mikite watsata, miki mepikatineikixiani meta mepikatiwikitiariexiani.

³⁶ Miki meta, 'ana mepikayiwaweni tawari memikwiniki, Kakaiyari niukieya tuayametemama wahapai mepi'eneneni. Matsi Kakaiyari niwemama mekanihikitini, miki memanuku'uiki.

³⁷ Mikite kememite'anuku'uni, mipaita Mui sexi katiniu'ikita, yuxapatsie hakewa 'itsi maxaxata, mana Ti'aitame mipai pirahiawe: “Apirahami, 'Itsahaki meta Kakuwu wakakaiyari”.

³⁸ 'Ayumieme mikite pikawaxata kename wakakaiyari maine, memayeyuyuri pita wakakaiyari kaniyuxatani, tsepa memukwi, yunaiti miki mepayeneniere hepaitsitana.

³⁹ Hiki miki 'iniariki memite'ikitametetikai hipati mipai mekatenitahiawe:

—Ti'ikitame, 'aixia pepaine.

40 Hiki tawariri mepikayuwairi tixaitiki memite'ita iwawiyaki.

Kiritsitu kemi'ane piranuiwari

(Ruk 20:41-47 - Mat 22:41-23:7, Mar 12:35-40)

41 Hiki mipai katiniwarutahiawe Ketsutsi:

—¿Titayari mipai mete'utiyuane kename Kiritsitu Rawiri nuiwarieya hiki?

42 Miki Rawiri titi kwikari xapayaritsie mipai kanainenini:

»“Ti'aitame mipai katiniutahiawe Neti'aitiwame: 'Netserieta kenakani,

43 ne nekaniwaka'unamiki memimatsi'aye'unie, 'ahixie nekaniwa'atiamiki’”.

44 Rawiri “Neti'aitiwame” Kiritsitu katini-uteriwani, ¿kehapaititi nu'aya pihikitini?»

45 Merikitsi yunaiti teiteri me'i'eniekaku mipai katiniwarutahiawe teyi'ikitwamete:

46 —Xekeneyukweriwayurieka miki 'iniariki memite'ikitamete wahepaitisita. Miki piwanake 'etitime me'anakatiti memeu'uaniki, meta yemeki piwanake wairitsika memipitiarieniki kiekari hixiapa meta teiteri wahixie memayaxeki tuki 'etsimipepeta, meta kiekame 'aurie memayaxeki 'ixiararipa.

47 Miki wiuratsixi wapiini mepitewarutixitiri, meta 'emepiteheutetere meyunenewieti mikamatsiikiniki kememiteyurie. Miki wahetsie matsi waikawa katinahiyamiki.

21

Wiura Kaka'yari tumini kemiti'atiri

(Ruk 21:1-4 - Mar 12:41-44)

¹ Merikitsi heutaniereka kaniwaruxeiya xikut-sixi tumini mawariyari me'akaxiriwame tumini kakuniyaritsie tukita.

² Meta 'uka tiuxei kinaya mumi tuminiki mimawekai mana heikaxiriwame huta tsenitawuyari.

³ Mipai kaniutayini:

—Yuriki mipai nepixerahiawe, 'iki wiura tuminiki maweti kakunitsie kaneikaxirieni waikawa, miki yunaiti 'etsiwa xeikia mekaneikaxirieni.

⁴ Miki yunaiti manayuhayewa meka-neukaxirieni Kakaiyari hetsiemieme 'imikieri. 'Iki 'uka yuhaweri mieme pita neukaxirieni kimana mitiyumikwakai naime.

*Ketsutsi kemutayi tuki kemitika'unarieniekai
(Ruk 21:5-36, 12-17 - Mat 24:1-51, 10:17-22, Mar 13:1-37)*

⁵ Merikitsi hipati teyi'ikitawametemama tuki 'amipa hepaitisita mekatenikuxatakaitini, kemitikemaritariiekai tete witsi'ananemeki mawari witsi'ananemeki. Peru mipai kaniutayini Ketsutsi:

⁶ —Xepixeiya 'iki, tukari kanaye'amiki kepauka mikahayewarieni tete yuheima 'ateti, naiti kanika'unariemiki.

⁷ Miki mipai mekatenita'iwawiya:

—Ti'ikitame, ¿kepauka mipai pitiyini kepemaine, tita ti'inariyaritini maye'aximenitsie mipai mitiyinitsie?

⁸ Hiki mipai kaniutayini:

—Xekeneyukweriwayurieka nika xete'u'itaiyarieni. Yumiireti mepi'axiani kename

ne neyiane, mipai me'utiyuati: “Neri nepihiki. Tukari kanaye'aniri”. Wa'utima xepikahekikani.

⁹ Kepauka mipai xemite'enanani kename xaitsie kuyaxa hexuawe, meta kepauka xemitetamarieni kename hipati me'anuku'uixime kuyaki, xepikamamaka. Peuyewetse mipai mitiyiniki meri, peru 'akuxi 'ana kwiti kwie pikaheutipare.

¹⁰ 'Ana mipai katiniwarutahiawe:

—Nuiwarite mekaniwatakwikuni hipame nuiwarite meta xexuime kwieyaritsie kiekatari hipame kwieyaritsie kiekatari.

¹¹ Kwie karima kanitayuamiki, haka kanitawemiki meta waikawa kwiniya naitsarie mitiuyehane, muyuawitsie 'iniri mamariwaweti kanitixuawerimiki kimana xekanimamakakuni.

¹² »Peru 'iki yakatiyiwekaku 'akuxi, mepixetiwiya xeme meta mepixe'anuyeweia. Mepixeyetuanu tukiteta meta katsariyanata xemanutaxiriyani, meta nehetsia xemimieteki xepanuhapanieni te'aitamete meta kuwexinaruritsixi wahixie.

¹³ Mipai xe'itirieme xeme xekaniyiwawekuni xemitetahekiataki miki wahixie.

¹⁴ 'Ayumieme yu'iyari xekenetseiriyani, xetiwi-yarieme xepikayu'iyaritiaka kexemutiyuaneni,

¹⁵ ne pita temaiwawemete nekanixe'ayeitiamiki, xemitiniuniki, 'ayumieme yunaiti memixe'aye'unie mekaniyutatexikuni mexe'a'iwakuti mexeniukimakuti.

¹⁶ 'Atsita xe'ukiyarima, xe'iwama, xemarema, xehamikuma mekanixeyetuakuni, meta hipati xeme xekanikwi'iwakuni.

¹⁷ Yunaiti mekanixe'uxiwe'eriekakuni nehetsia xemimieteki.

18 Peru nixei kipayari pikaheuyeweni xemu'utsie mieme.

19 Xika xeme heitseriemeki xe'uhuni, xekaniyutawikweitsitiakuni.

20 »Kepauka xemiwaxeiya kuyaxi Kerutsareme 'aurie meyukuxeirieximekaku, 'ana mipai xekatenimaikakuni kename 'ari hehura kepauka 'akumaweti mayani.

21 Hiki 'ana miki Kureya kwieyaritsie memu'uwani meke'uyuta'una hiritisie, kemi'ane kiekaritsie memititeni meke-wayekine, meta kemi'ane yeuta memu'uwani mepikahakununuwani kiekaritsie.

22 Miki tukaritsie heitseriemeki mepite'apiniyarieni kiekatari, 'ana katinaye'amiki naiti kemire'uxa.

23 Xia'ui miki memuhukani meta memitetsitsitiwani miki tukaritsie. Kariki 'uximatiarika waikawa kanitawemiki kwiepa, meta haxia kanitixuawerimiki 'iki teiteri wahepaitsita.

24 'Ixiarakiki mekanitakwi'iwakuni, yunaime nuiwarite wahetsia mekananuhapaniekuni wairiyarika. Nuiwarite memikateiterima mepika'una Kerutsareme mexi mikita watukari katapariwe.

25 »'Iniarite pitixuawere, tautsie, metsatsie meta xurawetsixi wahetsie. Kwiepa, nuiwarite mepiyuhiwerieka meta mekanimamakakuni haramara yuarikaya me'enieti meta hamewari.

26 Marikaki teiteri mepi'amixiani metemaiti kwiepa memitama kememi'itiarieni, kariki tirikariya memexeiya muyuawitsie miemete mepikuyuitiarieni.

27 Hiki 'ana Yuri Tewi kenemititewa mekanenixeiyakuni haitsata ne'akamieme netirikaiyeme meta waikawa nexawatime.

28 Yatitsutiariximekaku xekeneutineniereni 'aixia xeketeneyumaika, 'ana paye'aximeni kepauka xemitixinarieni».

29 Hiki 'ixatsi hepaitsita tikuxatati katini-waruta'ikitiani mipai 'utaiti:

—Xekeneu'ixiari pini meta hipame kiyexi.

30 Kepauka mitixawata, xe'i'ixiarieti yikimana xepitemaika tatsiari 'ahurakaku.

31 Yaxeikiata 'iki, kepauka xemineniere kenemutayi tiyianeme, mipai xeketenemaika Kakaiyari kemitita'aita 'ari kanehuraniri.

32 »Yuriki mipai nepixerahiawe, 'iki naiti yapitiyini mexi hiki miemete mekakwiwawe.

33 Muyuawi meta kwie pukumawere, peru ne-niuki pikakumawere.

34 »Xekeneyi'iwiyani kapa xe'iyari 'u'itutupereki xeku'ixiaratiwekaku xetariwekaku kwiepa mieme tukariki xeyu'iyaritiakaku. Xika mipai xeteyuriekake, 'iya tukari yapauka paxe'axe,

35 winiyari hepai, miki tukaritsie mekanita'axiyariekuni yunaiti kwiepa memitama naitsarie.

36 Xekenayeneniereni 'aixia, yuheyemeki xeyunenewieti para xemi'iwaweniki, Yuri Tewi hixie xemaye'axianiki xetawikweme 'uximatariakatsata 'umiramie».

37 Merikitsi tukariki tuki 'amipa kuraruyarita kaniuyeikakaitini ti'ikitati, tikariki wayeyeikati Huriwa Maku'u yemuriyaritsie nehupukaitini.

38 Yunaiti teiteri ximeri yuimuana
mekani'axekaitini hetsiana me'i'enienike tukipa.

22

Kura Ketsutsi kemitiyetuanikekai

(Ruk 22:1-2 - Mat 26:2-5, Mar 14:1-2, 10-11)

¹ Merikitsi Paa mikakuxanariyarietika
'ixiarariyari kanahurakaitini, Patsikwa
'ixiarariyari mititewakai.

² Hiki mawari wewiwamete tewa'aitiwamete
meta 'iniariki memite'ikitametetikai tixaiti
mekatenikuwautiwekaitini Ketsutsi ke-
memitemienikekai, teiteri mewamakati.

³ Hiki Kauyumarie Kura 'Itsikariutitanaka
hetsie kaneutahani, miki tamamata heimana
memiyuhuta miwanikai.

⁴ Heyaka mawari wewiwamete
tewa'aitiwamete meta wakuyaxima
wahetsia, katiniiwarutaxatiani Ketsutsi
kemitiwayetuirienikekai.

⁵ Miki mekaniyutemamawiekaitini, mekani-
uyu'enieni kename tumini me'i'itianikekai.

⁶ Mikita yakatiniutanaki'erieni, hiki
katinikuwaunekaitini kepauka 'aixia miyinikekai
miwayetuirieniki teiteri me'umawekaku.

Ti'aitame 'ikwaiya

*(Ruk 22:7-34 - Mat 26:17-35, Mar 14:12-31,
14:18-21, 1Kur 11:23-25, Wa 13:21-30, 37-38)*

⁷ Merikitsi kepauka Paa mikakuxanariyarietika
'ixiarariyari maye'a, kepauka muxa nunutsi mu-
timemieriwa Patsikwa 'ikwaiyari hetsiemieme.

⁸ Hiki Ketsutsi kaniwarutani'ani Pekuru meta
Wani mipai tiwarahiaweti:

—Xekenehu 'aixia xeketenekuyuri Patsikwa 'ik-waiyari temekwaniki.

⁹ Miki mipai mekatenitahiawe:

—Hakewa pimatsihenake 'aixia temitehekuyurieniki.

¹⁰ Mipai katiniwarutahiawe:

—Xeme xeheutahaxiamekaku kiekaritsie tewi mana pixe'anukunake ye'i 'ahanati hekuhanika. Miki xekenanuweiya kiita hakewa meutahani.

¹¹ Mipai xeketenetahiawi kiekame: “Ti'ikitame mipai paine: ¿Hakewa kii miki muwa nemitiwa'ikitia wahamatia Patsikwa 'ikwaiyari nemukwani?”

¹² Miki kii taita xeheutiwitime kanixex-eitsitiamiki hipame kii 'amuyeyewa naiti 'ureyepikame. Muwa 'aixia xeketeneyuri.

¹³ Hiki mekanekine, mekaneitaxeiya kemitiwarutahawixi. Muwa Patsikwa 'ikwaiyari hetsiemieme 'aixia mekateniukuyurieni.

¹⁴ Hiki 'aye'aku, mexatsie kaniutiyerini meta ni'arimama yaxeikia.

¹⁵ Hiki mipai katiniwarutahiawe:

—Kwinimieme nepihiwe'eriekai xehamatia 'iki 'ixiarari 'ikwaiyari nemikwaniki nekatikwiniweti 'akuxi.

¹⁶ Yanepitixekihawe, tawari 'iki nepikakwani mexi ka'aye'awe tita 'ixiarari miti'iniariyari Kakaiyari ti'aitametikaku.

¹⁷ Hiki tekixi 'anuhanaka pamipariyutsi 'ipitiaka Kakaiyari mipai kaniutayini:

—Xekenanuhani 'iki, yuxexuiti xeke-nanuti'iniataxia.

18 Mipai nepixerahiawe, tawari kaxie hayari nepika'anuieni mexi ka'aye'awe Kakaiyari mit-sutiani ti'aitati.

19 Hiki paa 'anu'ika pamipariyutsi 'ipitiaka Kakaiyari 'ititaraka kaniwarumini mipai 'utaiti:

—'Iki kaninewaiyaritini xehetsiemieme miyetuiyani, 'ipai xeketeneyurieka xeminetsiha'eriwaniki.

20 Yaxeikiata katiniuyurieni tekixi hepaitsita mete'ukwaku, mipai kaniutayini:

—'Iki tekixita mieme tiratu mihekwa kanihikitini nexuriyaki 'aixia mi'itarieni, xehetsiemieme kemititayeuriani.

21 Perutsi kemi'ane minetsiyetuani 'ena paka, mamaya mexatsie pama hakewa nemaka.

22 Yuri Tewi kenemititewa, nekaniyemieni nemimierieniki, kemiti'aitsie yamitiyini, perutsi xia'ui kemi'ane minetsiyetuani.

23 Miki mekanitsutiani niuki mexiatiati kemi'ane miki mixatakai kename miya tiyurienikekai 'utaiti.

24 Metatsiereta meyuniukimati mekanakine kemi'ane miki matsi waikawa meuyewetse mayanikekai.

25 Ketsutsi mipai katiniwarutahiawe:

—Nuiwarite tewa'aitiwamete mekateniwa'uxitiaka yuteiterima, meta miki wahetsie 'itsikate memihiki yuhetsiemieme mipai mekaniutiyuaneni kename 'aixia meteyuruwamete.

26 Xeme pita mipai xepikayiaka. 'Apita, kemi'ane xeme mimariwe miki kemi'ane tixaiti mikatihiki hepai keyianeni, meta kemi'ane mitixe'aitia miki

kemi'ane xehetsiemieme miti'uximaya hepai keyianeni.

²⁷ Kexeteku'eriwa, ¿kemi'ane matsi pumariwe, kemi'ane kiekametiti mitikwa'a, kemi'ane miparewie timikwati, miki nutsu pumariwe? Xiari kiekame matsi pumariwe. Perutsi ne xetsata nepuyeika xehetsiemieme neti'uximayati pita.

²⁸ Xeme nehetsie xekateniwiyakaitini xekatehayewati ne'iniatsienekaku.

²⁹ Ne'ukiyari keminerayeitia ti'aitame, neta yax-eikia te'aitamete nekanixe'ayeitiamiki.

³⁰ Nehamatia xekatenikwaikuni xekateni'ikuni mexa 'aurie ne'akaime neti'aitametikaku, 'itsikate xekanakinikuni, 'uwenitsie xe'ayaheme xekateniwa'aitiakakuni teiteri tamamata heimana huta 'Ixaheri nuiwarimama.

³¹ »Neuxei, Tsimuni, yumarima 'aixia, Kauyumarie pixe'uta'iwau, pixeta'iniata, pixetikatse tiriku hepai.

³² Ne matsi nepinetanenewi 'ahetsiemieme pemikatihayewaki yuri peti'eriet. 'Ekita kepauka pemitihayewa peheuyewautseti keniwatuikani 'a'iwama».

³³ Miki mipai katinitahiawe:

—Ti'aitame, nepinewairiya 'ahetsie nemitiwiyani tsepa nemanutahiya tsepa nemumierie.

³⁴ Ketsutsi mipai katinitahiawe:

—Pekuru 'aku, mipai nepimatikihawe, wakana katahiwawekaku 'akuxi hiki, 'eki haikakia pekani'aku'imawamiki, kename pekanetsimate pe'utaiti.

³⁵ Hiki mipaita katiniwarutahiawe:

—Kepauka nemixeheutani'axia kitsiuri, xerai, kakai xekate'upikame, ʔtixai xeteheuyehiakai 'aku?

Miki mipai mekatenitahiawe:

—Tixai.

³⁶ Mipai katiniwarutahiawe:

—Hikitsi pita mipai pikatiyini, kemi'ane kitsiuri mexeiya keheihurieni, xerai meta yaxeikia. Kemi'ane mikaheixeiya kuya kutsiraya yi'ikari ke'utuani ke'inaneni.

³⁷ Yanepitixekihawe, peuyewetse nehetsie maye'atarieniki mipai kemire'uxa: “Iniari niukiyari tsanamete wahepai kaniu'itarieni”. Naiti nehepaitita kemire'uxa kanaye'atarieximeni.

³⁸ Hiki miki mipai mekaniutyuani:

—Ti'aitame, neuxei 'ena kutsirate hutati.

Ketsutsi mipai katiniwarutahiawe:

—Neuxei 'ariri.

Ketsutsi kemityutanenewi Ketitsemanitsie

(Ruk 22:40-46 - Mat 26:36-46, Mar 14:32-42)

³⁹ Merikitsi wayeyaka kaneyani hakewa me'axekai Huriwa Maku'u yemuriyaritsie, teyi'ikitiwamete mekaniweiyakaitini.

⁴⁰ Hiki muwa heta'aka mipai katiniwarutahiawe: «Xekeneyunenewieka, kapa 'axaxete'uyurieniki xemita'iniatsienitsie».

⁴¹ Hiki yuxaita kananayeyani memakutekaitsie yatewa kaniuyani tete kemirehiwa yakititi, 'uti-tunumakeka kaniyutanenewieni,

⁴² mipai 'utaiti: «Ne'ukiyari, xika pe'awairiyani, yanepira'eriwakaku mika'aye'aniki kenemitikwinitarieni, matsi keminetinake ne pikatixai, kemimatinake 'eki pita yaketiuyini».

⁴³ Hiki niuki tuayame matsiikiti kanayuyeitiani
hixiena taheima mieme 'itirikariyati.

⁴⁴ Hiki kwiyaneti hiwerikaki, matsi kwini
mieme yutatuati kaniyunenewiekaitini,
kwaxiyaya xuriya tsuniriyari hepai
kani'anenekaitini kwiepa kaxiriweti.

⁴⁵ Kepauka mitiutahayewaxi yunenewieti
'anukukeka teyi'ikitiwamete wahetsia nuaka
mana kaniwarutaxeiya mekutsume hiwerikaki.

⁴⁶ Mipai katiniwarutahiawe:

—¿Titayari xetekutsu? Xekenanuku'uti
xekeneyunenewieka kapa 'axaxete'uyurieniki
xemita'iniatsienitsie.

Ketsutsi kemitiuwiyarie

*(Ruk 22:47-53 - Mat 26:47-56, Mar 14:43-50, Wa
18:3-11)*

⁴⁷ Merikite 'utaniukakaku 'akuxi
yumiireti teiteri mekaniu'axiani, xewiti
kaniwarawitikikaitini tamamata heimana
memiyuhuta miwanikai Kura titewati. Ketsutsi
'aurie kaniutakeni 'i'itsenike.

⁴⁸ Peru Ketsutsi mipai katinitahiawe:

—Kura, ¿penetsi'itseme penetiyetuanu Yuri Tewi
kenemitiwewa?

⁴⁹ Teiterimama metemarieti kemitiyianekai
mipai mekaniutiyuani:

—Ti'aitame, ¿takutsirateki tetewatakwini?

⁵⁰ Xewiti miki tewi mawari wewiwamete
tiwa'aitiwame hetsia mieme ti'uximayatame
nakaya kanawiteni tserietana mieme.

⁵¹ Peru Ketsutsi mipai kaniutayini:

—'Ari xeketeneuhayewa.

Hiki 'imayiaka nakaya 'aixia kaniuyurieni.

52 Hiki Ketsutsi mipai katiniwarutahiawe mawari wewiwamete tewa'aitiwamete, kuyaxi tukipa miemete, meta 'ukirawetsixi memeyeki me'iwiyake:

—¿Kari xepeyeki 'ixiparate meta kiyexite xete'u'iti xenetsiwiya, kemitiwiwiyariwa tinawayame?

53 Tukariki xehetsia ne'uyeikakaku tukipa xepikanetsi'umayia. Peru hiki xetukari kanihikitini yamitiyini, Yiwikame heitserie pexeiya hiki.

Pekuru kemitiyuku'imawakai

(Ruk 22:55-62 - Mat 26:69-75, Mar 14:66-72, Wa 18:16-18, 25-27)

54 Merikite me'iwiyaka mekaneihana mawari wewiwamete tiwa'aitiwame kiita mekani'atiani. Pekuru kaniweiyakaitini yatewa.

55 Hiki takwa hixiapa metinaika mana mekaniutiyaxe meta Pekuru wahamatia kaniutiyerini.

56 Hiki xewiti 'imari mana miti'uximayakai 'ixeyaka hekariapa 'ukaime 'ixeyati mipai kaniutayini:

—'Ikita hamatiana kaniuyeikakaitini.

57 Miki kaniyuku'imawakaitini mipai 'utaiti:

—'Uka 'aku, ne nepika'imate.

58 Yareutewikakuta xewiti 'ixeyaka mipai kaniutayini:

—'Ekitsi xewiti miki wa'iwa pekanihikitini.

Pekuru mipai kaniutayini:

—Tewi, ne nepikahiki.

59 Hiki xehurayari 'aye'aku yakitiniketi xewitita heitseriemeki mipai kaniutayini:

—Yuriki 'iki hamatiana kaniuyeikakaitini, neuxe Karereya kiekame kanihikitini.

⁶⁰ Pekuru mipai kaniutayini:

—Tewi, ne 'atsinepikatitude kepephine.

Yapauka haniukakaku 'akuxi, wakana kene-tahiwa.

⁶¹ Ti'aitame ta'aurie 'aweka kaneutaniere Pekuru kaniuxeiya. Hiki Pekuru Ti'aitame niukieya kanaye'erieni kemititahiawixi: «Wakana katahiwawekaku 'akuxi hiki, 'eki haikakia pepi'aku'imawani kename pekanetsimate pe'utaiti».

⁶² Wayeyaka kaniutatsuani kwini mieme tiyuhiwarieti.

*Ketsutsi kemitinanaimariekai
kemitikuweiwakai*
(Ruk 22:63-65 - Mat 26:67-68, Mar 14:65, Wa 18:22-23)

⁶³ Hiki teiteri Ketsutsi memi'iwiyakai mekanitsutiani me'inanaimati meta mekanikuwayakaitini.

⁶⁴ Hixiena meheikihika, mekanikuwayakaitini, meta mipai mekateniku'iawiyakaitini:

—Ketatineutahekiatia, kemi'ane pimatsi'uwa.

⁶⁵ Waikawa matsi mipai mekatenikihawekaitini 'axame'utiyuati.

Ketsutsi kemitiutahiawarie 'itsikate wahixie
(Ruk 22:67-71, 23:2-3, 18-25 - Mat 26:63-66, 27:11-26, Mar 14:61-63, 15:2-15, Wa 18:19-21, 29-37, 39-19:16)

⁶⁶ Merikitsi 'ukatareku mekaniyukuxerieni teiteri wa'ukiyarima meta mawari wewiwamete tewa'aitiwamete, meta 'iniariki

memite'ikitametetikai, miki mekani'atiani
memayuxeiriekaisie.

⁶⁷ Mipai mekatenitahiawe:

—Ketatineutaxatia, xika 'eki Kiritsitu pehikini.

Mipai katiniwaruta'eiya:

—Xika yanetixe'utahiawe, yuri
xepikaneteta'eririeni.

⁶⁸ Xika nexeku'iwwawiyani
xepikanetsita'eiyakeyu, meta xepikanetsixinakeyu.

⁶⁹ Peru hikiti Yuri Tewi kenemititewa
Kakaiyari Naimekimitirikaiye tserieta nepakani.

⁷⁰ Yunaiti mipai mekatenitahiawe:

—'Aa, ɛ'eki xeniu Kakaiyari petinu'aya?

Miki mipai katiniwarutahiawe:

—Xemetsi mipai xekaniutiyuaneni kename
nehiki.

⁷¹ Hiki miki mipai mekaniutiyuani:

—ɛKetitayari 'akuxi tetewareuyehiwa
tehekiamete? tametsieti tepi'eni tetana mieme.

23

¹ Hiki yunaiti mekananuku'uni mekaneihana
mita'iwwawiyarieniki Piratu hetsia.

² 'Ana menitsutiani me'ixanetati mipai
me'utiyuati:

—Te'iku'iwwawiyati 'ipai tekatenimaika,
kwamanarika wewieti tiniwa'ikitiaka tateiterima,
pikawapitia memiteyukutuayaniki Tsetsaxi
kuwiyexinuya hetsiemieme, mipai kanaineni
kename heitserie 'upitiarie Kiritsitutiti, ti'aitame
yuxatati.

³ Hiki Piratu mipai katinita'iwwawiya:

—ǂ'Eki huriyutsixi teiteriyari tiwa'aitiwame petihiki?

Miki mipai katinita'eiya:

—'Ekitsi mipai pekanaineni.

⁴ Hiki Piratu mipai katiniwarutahiawe mawari wewiwamete tewa'aitiwamete meta teiteri memiyukuxeiri:

—Kenemitimate, tixai pikareuyewetse 'iki tewi mixanetsiekaki.

⁵ Miki matsi kwini mieme meniku'imawakaitini yame'utiyuati:

—Kaniwaxamurieneni teiteri, ti'ikitati naitsarie Kureya kwieyaritsie, Karereya kwieyaritsie heit-sutiaka 'uwapaitita.

Ketsutsi kemitiutahiawarie Herurexi hixie

⁶ Merikitsi Piratu 'u'enaka kaniku'iwwakaitini xika karereyanaka hikitikaitini tewi.

⁷ Tiutamariaka Herurexi mehiritiariekaitisie mikiekametikaiki, hetsiana neini'ani, Herurexi Kerutsareme muyeikakaiki 'ana.

⁸ Merikitsi Herurexi Ketsutsi xeiya kaniyutemawiekaitini waikawa, miixa kanixeyamikikaitini mi'enakaiki hepaitisana, mipai katiniku'eriwakaitini, Ketsutsi tixaiti mitiyurienikekaiki 'iniari, 'ixeyamiti.

⁹ Waikawa kaniku'iwwawiyakaitini, peru Ketsutsi 'atsipikatita'ei.

¹⁰ Manata mekaniku'ukaitini mawari wewiwamete tewa'aitiwamete meta 'iniariki memite'ikitametetikai, miki mepikatehayewakai me'ixanetati.

¹¹ Hiki Herurexi yukuyaxima wahamatia tixaiti mekate'eyeitiati me'inanaimati,

'ixuriki witsi'aneme me'enakuwirieka tawari mekaneini'ani Piratu hetsia.

¹² Miki tukaritsie Herurexi meta Piratu mekaniyutemawiekaitini, mepayuka'uniekai miixa, 'anake 'aixia mepiteyuxeyakai.

¹³ Hiki Piratu warukuxerieka mawari wewi-wamete tewa'aitiwamete, 'itsikate meta teiteri yunaima,

¹⁴ mipai katiniwarutahiawe:

—Nehetsia xepi'atia 'iki tewi, kename kwananarika wewieti tiwa'ikitia teiteri xe'utiyuati, kami, xehixie ne'ita'iwawiyaka ne, kenemitime, tixai pikareuyewetse 'iki tewi hetsie mirahiyaniki kexemite'ixaneta.

¹⁵ Herurexi meta yaxeikia kaniutayini, nexeutani'aku hetsiana, tawari nehetsia kaneiyeni'ani. 'Atsipikatiuyuri hetsiana mitinakeniki mimierieniki.

¹⁶ 'Ayumieme nepitita'aita mikuweiyaxianiki, 'arike nepixina.

¹⁷ Merikitsi 'ixiararipa kaneuyewekaitini xeime miwaxinirieniki 'anutahi yakame.

¹⁸ 'Ana yunaiti yaxeikia mekatenuhiwa mipai me'utiyuati:

—Keneumi'a miki, ketaneuxiniri Waxawaxi.

¹⁹ Miki miyumienekaiki kiekaritsie, meta xeime mumiki katsariyanata kananutahi yakaitini.

²⁰ Piratu tawari kaniwarutahiawe, Ketsutsi xinamiti.

²¹ Miki matsi mekaniutihwakaitini mipai me'utiyuati:

—Kuruxitsie keneukawi, Kuruxitsie keneukawi.

²² Hairieka mipai katiniwarutahiawe:

—ǂTitaki 'axatiuyuri 'iki tewi? Kenemitime ne, tixaiti 'atsipikatiuyuri pikaheuyewetse mimierieniki, 'ayumieme kuweiyaxiayu nepixina.

²³ Miki matsi karima mekaniwawiriekaitini kuruxitsie mimierieniki. Teiteri meta mawari wewiwamete memihiritiariekai hiwariki mekane'iwa.

²⁴ Hiki Piratu mipai katiniuta'aita yamitiyini kememite'iwawiriekai miki.

²⁵ Kanixina kemi'ane memiwaukai, kemi'ane manutahiyyakai katsariyanata miyumienekaiki meta xeime mumiki, meta Ketsutsi kaniyetuani wahetsia kemitiwanakakai.

Ketsutsi kemitiukawiya kuruxitsie

(Ruk 23:33-43 - Mat 27:33-44, Mar 15:22-32, Wa 19:17-24)

²⁶ Merikitsi kepauka memiwitiximekai meheimienike, xeime mekaniuwiya Tsimuni titewakame Tsirenetanaka, miki xaitsie hanuyaka kiekaritsie kanaye'aximekaitini, hiki mekanititiani kuruxi Ketsutsi 'utima menutiniki.

²⁷ 'Ana yumiireti teiteri meniweiyakaitini, 'ukari meta me'utitsuati me'itsuariwiyati.

²⁸ Hiki ta'aurie 'aweka mipai Ketsutsi tiniwarutahiawe:

—Xeme 'ukari Kerutsaremetari xepika'utitsuanani nehepaitsita, yuhepaitsita pita meta yuniwema wahepaitsita xekeneutitsuanani.

²⁹ Tukari kanaye'amiki kepauka mipai memutiyaneni: “Miki memikayiwawe tiri memiwarexeiyani, miki 'aixia mepi'itarie, miki memikatiniwewawe miki memikatetsitsitiawawe 'aixia mepi'itarie”.

³⁰ 'Anari mekanitsutiakuni:

»“Mipai meteniwatahiawikuni hiriite: ‘Taheima kenanakaxiri’, yemurite meta mipai meteniwatahiawikuni: ‘Xeketaneuti’awieta’ ”.

³¹ Hiki mipai xika mete'uyurieni kiye yurikaku, Ɂketsi tiyini tawayu?»

³² Hipatita yuhutati mepehapanie 'axateyuruwamete memikwi'iwaki hepaina.

³³ Merikite kepauka memu'axia Miki Mu'uya Manuka mirakutewatsie, mana kuruxitsie mekanikawieni meta tenawayamete wahamatia, tserietana xeime meta 'utatana xeime.

³⁴ Hiki Ketsutsi mipai kaniutayini:

—Ne'ukiyari, ketiniwareuyehiwirieka, 'atsimemikatemateki kememiteyurie.

'Ana kuyaxi mekaniyuta'iwa 'ixurikiteya meyutahuritiani.

³⁵ Teiteri mana mekaniti'ukaitini metanieniereti, 'itsikate mekanitawe'eriekaitini mipai me'utiyuati:

—Hipame waniu kaniwatawikweitsiwakaitini, yikimana keyutawikweitsitiani xika 'aku Kiritsitu hikiti Kaka'yari hetsia mieme, kemi'ane manayexeiyarie.

³⁶ Meta kuyaxi yaxeikia mekaninanaimakaitini hurawa me'ukineka, matsina mekanixatiakaitini menu'ieniki,

³⁷ mipai me'utiyuati:

—'Eki huriyutsixi tiwa'aitiwame xika pehikiti, keneu'atawikweitsitia.

³⁸ Meta mu'uya heima mekaneimani 'utiarika, mipai pire'ukai: «'IKI HURIYUTSIXI TIWA'AITIWAME KANIHIKITINI».

³⁹ Hiki teyukwikate mana memutiwikai xewiti 'axakatinikihiawekaitini, mipai 'utaiti:

—ǂEki pekatihiki Kiritsitu? Merikite, kene'atawikweitsitia, meta tame ketaneutawikweitsitia.

⁴⁰ Xewiti pita tapa mutiwiekai nitatieni mipai 'utaiti:

—ǂKari 'eki Kakaiyari pepikamakaxe tsepa hepaina pemi'itiarine yaxeikia petiutahiawarieka?

⁴¹ Peru kaniheitserietini tahetsie kemitiunakixi, kemireuyewetse xeikia tepi'itiarietawe yatemiteyuriekaiki. 'Iki matsi tixai 'at-sipikatiyuriewe.

⁴² Mipai meta kaniutayini:

—Ketsutsi 'aku, kenena'eriwani kepauka pemu-nuani ti'aitame pehikititi.

⁴³ Hiki Ketsutsi mipai katinitahiawe:

—Yuriki mipai nepimarahiawe, hikititi nehetsia pepeyeikani witsimiraku'anetsie.

Ketsutsi kemitiyetua yu'iyari

(Ruk 23:44-49 - Mat 27:45-56, Mar 15:33-41)

⁴⁴ Merikite tuka kaniukuyire yemeki naitsarie kwiepa tau kia kawiekakuke kaniukuhekiare.

⁴⁵ Tau 'uyireku 'ixuriki meuwiekai tuki 'amipata hixiata kanitsane.

⁴⁶ Hiki Ketsutsi karima 'utahiwaka mipai kaniutayini:

—Ne'ukiyari, ne'iyari nepimatsihiritia.

Mipai 'utayika kaniumini.

⁴⁷ Xeitsienituyari kuyaxi tiwa'aitiwame 'uniereka kemitiuyi 'aixia kaniutayini Kakaiyari hepaitsita, mipai 'utaiti:

—Yuriki 'iki tewi heitserie pexeiyakai.

⁴⁸ Yunaiti teiteri meneniereke memiyukuxeiri, me'uneniereka kemitiuyi, yu'utima mekanekine yutawitsie meyukuhutsunati hiwerikaki.

⁴⁹ Peru yunaiti memimatekai mana mekaniti'ukaitini yatewa, meta 'ukari hamatiana memeyeki Karereyatsie, miki mana mekaniti'ukaitinita meneniereti.

Ketsutsi kemitiuteukie

(Ruk 23:50-56 - Mat 27:57-61, Mar 15:42-47, Wa 19:38-42)

⁵⁰⁻⁵¹ Merikitsi tewi 'akaniuyeikakaitini Kutse titewati, 'itsikate muwani'i kanihikititikaitini, 'aixia pitiuka'iyarikai heitseriemeki yapitikamiekai, miki yapikara'eriwakai kememiteyu'eni kememite'uyuri. 'Arimateya kaniekametikaitini Kureya kwieyaritsie, yuri katini'eriekaitini ta'ikwewati Kakaiyari mitsutianiki ti'aitati.

⁵² Miki Piratu hetsia nuaka kanitawawirieni Ketsutsi kaxarieya.

⁵³ Hekakweka kanita'eima rinu tsawana-yariki, kaneikuteuku teukiyapa 'aitia muwaye'inieriekatsie hakewa tewi hatsuaku mikaheutatekiewekatsie.

⁵⁴ Merikitsi pipienixitikai 'ana, 'uxipiya tukari pitsutiariximekai.

⁵⁵ Mekaneiweiya 'ukari Karereyatsie memeyeki 'utimana, mekanixeya teukiya, meta kaxarieya mekaniuxeya kemitiutekie.

⁵⁶ Yu'utima mehekineka 'aixia meniyurieni witsimu'ia mixaxi nikame 'uaye.

Merikitsi 'uxipiya tukaritsie
mekani'uxipiekaitini 'aitsika kemaine.

24

Kemiranutanierixi 'umierieka

(Ruk 24:1-10 - Mat 28:1-8, Mar 16:1-8, Wa 20:1-8)

¹ Tsemana mexiakame tukaritsie ximeri kwitiwa, teukiyapa mekanekine 'ukarawetsixi witsimu'ia me'ahapati memikuha'aritakai.

² Hiki teté mekaniutaxeiya heuhiyakame kitenie meukatei.

³ Meheutahaxiaka teukiyapa, mepika'itaxeitaitame Ketsutsi kaxarieya.

⁴ 'Atsimepikatemalaikai kememiteyurienikekai mipai mitiuyiki, hiki 'ukitsi yuhutati wa'aurie mekaniti'uni merikawime me'anakatiti.

⁵ Memamati kwiepa mekaniukahixima'uni, peru miki mipai mekateniwarutahiawe:

—¿Titayari mikite watsata xete'iwautiwe miki mayeniere?

⁶ 'Uwa pikayeka, kananukuketiarieni. Xekena'eriwani kemitixe'utahiawixi Karereyatsie 'uyeikati 'akuxi,

⁷ kexemite'utahiawarie: “Yuri Tewi hepaitsita, kemireuyewekai miyetuiyaniki 'axateyuruwamete memiwiwaki, kuruxitsie mimierieniki, hairieka tukaritsie manukukeniki kemireuyewekai”.

⁸ Hiki 'ana Ketsutsi niukieya menaye'erieni.

⁹ Hiki teukiyapa mewayekineka mekanekine, 'iki naima mekateniwarutaxatiani tamamata heimana xeime, meta hipame yunaima.

¹⁰ 'Ukari Mariya Mararatanaka, Wana, Mariya Kakuwu miwarutsieyatikai metenitetewakaitini meta hipatita wahamatia memu'uwakai 'ukari yunaiti yamekateniwarutaxatiani ni'ariekate.

¹¹ Peru miki yaki me'utiyuaneme mekani'eriekaitini metekuxatakaku, yuri mepikatewaruta'eriri.

¹² Perutsi Pekuru kaneyani teukiyapa 'unautsarimeti. 'Anahuka nixeiya 'ixuriki mana 'akateme 'uyemaweme. Yukie kaneyani waika 'iyarixieti kemitiunierixi hepaitsita.

Kememite'ixei 'Emahu huyeyari 'utia me'uhuti

¹³ Merikitsi miki tukaritsie yuhutati miki huyeta menekine, kiekaritsie meneta'axianikekaitini 'Emahu mirakutewatsie, Kerutsareme nehurakaitini, yanetewakaitini tamamata heimana huta kirumetiruyari xeikia.

¹⁴ Metenikuxatakaitini naiti kemitiuyi hepaitsita.

¹⁵ Merikitsi metekuxatakaku niuki mexiatiaakaku Ketsutsititi niwaranuku'axe me'uhukaku, wahamatia niumiekaitini,

¹⁶ peru mepikapitiariekai memeitimaniki.

¹⁷ Mipai katiniwarutahiawe:

—¿Ketitita 'iki niuki xemixiatia xe'uhuti, titayari xeteyuhiwerie?

Miki mana meniti'uni me'ayexixiniti yihixie,

¹⁸ xewiti miki Kireupaxi mititewakai mipai katinitahiawe:

—¿Kari 'eki 'atsipepikatitude Kerutsareme kemireyi takai 'atu, 'atsita kikamete mipai mepitemate?

¹⁹ 'Iya mipai katiniwarutahiawe:

—¿Kereyikuta?

Miki mipai mekatenitahiawe:

—Ketsutsi Natsaretitanaka, kemiranayetia pekatimate. Miki tewi Kakaiyari hetsiemieme katinixaxatametikaitini, kemitiyurienekai kemitikuxatakai, kanitirikaiyekaitini Kakaiyari hixie yunaimete teriteri wahixie.

²⁰ Mawari wewiwamete tewa'aitiwamete ta'itsikate meta mekaniyetuani hetsiena mirahiyaniki mimierieniki, 'arike kuruxitsie mepeimi.

²¹ Tametsieti tekanita'ikwewakaitini yuri tete'erietu 'iya mihikitikaiki kemi'ane mitatsitixinakekai 'ixaheritsixi teiteriyari. Miki meta, haika tukari kaniyuriekari hiki, miya reyiku.

²² Matsi meta 'ukari tatsata miemete mepitatsi'ihixiyatsitia hiki, ximeri waniu menekukinixiani teukiyapa,

²³ peru kaxarieya mepikahexei. Mekanu'axiani mipai me'utiyuati kename niuki tuayamete mewarexei meteheinime meyu'erietu, miki waniu kename Ketsutsi 'ayeniere mekateniwaretahiawe.

²⁴ 'Ana hipatita tahamatia memu'uwa teukiyapa mekanekine, 'ukari kememaitikatei, mipai 'aneme mepetaxe, peru Ketsutsi mepikahexei.

²⁵ Hiki Ketsutsi mipai katiniwarutahiawe:

—Kari 'atsixepikatemate, yu'iyaritsie xepu'itutupe, 'akuxi yuri xepikateta'eriwawe texaxatamete kememitekuxatakaisie naimete.

²⁶ ¿Kareuyewekai Kiritsitu mipai mitikwineki, 'arike mikake witsi'aneti karayanikekai?

27 'Ana Muitsexi xapaya xatati meri yunaimē
texaxatamete waxapa xatati, kanitsutiani
tiwahekiatsitiyati kemire'ukai hepaitsitana
naimē 'utiarikatsie.

28 Merikitsi kiekaritsie hakewa
memeta'axianiekai mekaneta'axiani, 'iya matsi
'ateewa kaniumiekaitini.

29 Miki kwinimieme mekani'iniekaitini mipai
me'utiyuati:

—Tahamatia kene'ahayewa, 'etsiwatikaku
putaikai pakayunirime.

Hiki muwa kaneutahani wahamatia
miyuhayewaki.

30 Hiki wahamatia 'ayerika mexa 'aurie, 'enu'ika
paa, 'aixia kaniutayini Kaka'yari hepaitsita paa
hepaitsita, 'ititaraka kaniwarumini.

31 'Ana wahixie katineukuyepiere hiki
mekaneitimani, peru miki kamatsiikiti
kanayuyeitiani tawari mepika'ixei.

32 Hiki mipai mekateniyikihawekaitini:

—'E'e, 'ayumieme ta'iyaritsie kwini mieme
tepitayetuakai mexi tatikuxaxatiwakai huyeta
te'uhukaku, mexi tatsihekiatsitiyakai 'utiarika
kemainē.

33 Hiki me'anuku'uka kwiti, Kerutsareme
mekanekine yu'utima. Tamamata heimana xeime
hipameta mekaniwaretaxeiya meyuxeirikame.

34 Miki mipai mekaniutiyuanekaitini:
«Kaniyuritini, Ti'aitame panukuke. Matsiikiti
kanayuyeitiani Tsimuni 'ixei yakaku».

35 Miki meta mekateniwarutaxatiani huyeta
kemireyi, kememiteheitima paa 'utitaraku.

Ketsutsi matsiikiti kemirayuyeitia
teyi'ikitiwamete wahixie

³⁶ Merikitsi metekuxatakaku 'akuxi, 'iya wahixiata kaniutakeni, mipai kaniutayini:

—'Aixia 'aku.

³⁷ Miki mekaniutimamani, miki mexeiame meyu'erieti.

³⁸ Mikitsi mipai katiniwarutahiawe:

—¿Titayari xeteyuxamurie? ¿Titayari xete'itsutia niuki xexiatia yu'iyaritsie?

³⁹ Xekeneu'ixiari nemamate ne'ikate, ne nekanihikitini, xekeneneumayia xekeneneux-eiya, 'iyari 'ume pikahexeiya wai pikahexeiya nehapai.

⁴⁰ Mipai 'utayika yumamate yi'ikate kaniwaruxeitsitiani.

⁴¹ Meyutemamawieti mehixiyati, kayuritime mepi'eriekai 'akuxi, hiki mipai katiniwarutahiawe:

—¿Tixai xekatehexeiya 'ena tikwaiwame?

⁴² Tsaapa waiyari yayeukame mekanimini warikime.

⁴³ 'Enu'ika kanitakwani wahixie.

⁴⁴ Merikitsi mipai katiniwarutahiawe:

—'Iki niuki nekanixekuxaxatiwakaitini xehamatia ne'uyeikati 'akuxi, mipai ne'utaiti kename heuyewekai maye'atarieniki naiti nehapaitsita kemire'uxa Muitsexi 'iniarieya niukiyaritsie, texaxatamete waxapatsie meta kwikari xapayaritsie ne'utaiti.

⁴⁵ 'Ana wa'iyari kaniwatiyepieni memeiti-maniki tita 'utiarika xapayari mitixatakai.

⁴⁶ Mipaita katiniwarutahiawe:

—Mipai pire'uxa, kemireuyewekai Kiritsitu nehikiti miya nekatnikwinekekaitini, hairieka tukaritsie nekananukukeniekekaitini mikite watsata.

⁴⁷ Miki meta, yunaiti nuiwarite mipai mekatenitahiawariekuni, xika xete'uhayewa kexemiteyuriekai, xika pita xenetsihahiaweni kemi'ane nemihiki, xepiteheuyehiwiarieni 'axaxemite'uyuriki, Kerutsareme meri, 'ariketa xaitsie yakatinikuxaxatsiwamiki.

⁴⁸ Xeme xekanihikitini xemunenierixi xemi-hekiata 'iki kemitiuyi hepaitsita.

⁴⁹ Ne meta nepitixehani'airieni tita ne'ukiyari mirainekai mitixeminikekaiki, xeme kiekaritsie xekeneyuhayewani tukari 'aye'ayuke kepauka tirikariya xemipitarieni taheima mieme, 'anake xepayekine.

Kemiranutitia

⁵⁰ Hiki kaniwarayewitini Wetaniya 'aurie, yumamá teiki hetserati kaniutaniuni 'aixia memi'ititarieniki.

⁵¹ Mexi 'utaniukakai wahetsia kanayeyani, muyuawitsie kananutiwitikieni.

⁵² Miki nenewieri me'ipitiaka Kerutsareme mekanekine kwini mieme meyutemamawieti.

⁵³ Tukariki tuki kuraruyarita mekaniu'uwakaitini 'aixia me'utiyuati Kakaiyari hepaitsita. Mipai xeikia kani'aneni.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3